



110
A
6.1.

110
a
6'

83
11
49





*Detrahit & pellem nitidas quic quisque per ora
Ambulet, introrsum corpus. ROSS.*

Inv. Alessandri sculp.

Q U I N T I
H O R A T I I
F L A C C I
O P E R A .

Cum Notis Selectis.

T O M U S I



VENETIIS MDCCLXXXIII
Apud Thomam Bettinelli

Cum Facultate ac Privilegio.





Q. HORATII FLACCI

V I T A

AUCTORE

C. SUETONIO TRANQUILLO.

QUINTUS HORATIUS FLACCUS Venusinus, patre, ut ipse quidem tradit, libertino & exactionum coactore; ut vero creditum est, salsamentario, quum illi quidam in altercatione exprobrasset: *Quoties ego vidi patrem tuum brachio se emungentem!*

Bello Philippensi, excitus a M. Bruto Imperatore, tribunus militum meruit; victisque partibus, venia impetrata, scriptum quæstorium comparavit; ac primo Mæcenati, mox Augusto in gratiam insinuatus, non mediocrem in amorum amicitia locum tenuit. Mæcenas quantopere eum dilexerit, satis demonstratur illo epigrammate:

Q. Horat. T. I.

A

*Ni te visceribus meis, Horati,
Plus jam diligo, tu tuum sodalem
Hinno me videas strigiosiore.*

Sed multo magis extremis judiciis tali ad Augustum elogio: *Horatii Flacci, ut mei, esto memor.* Augustus epistolarum quoque ei officium obtulit, ut hoc ad Mæcenatem scripto significat: *Ante ipse sufficebam scribendis epistolis amicorum; nunc occupatissimus & infirmus Horatium nostrum te cupio adducere. Veniet igitur ab ista parasitica mensa ad hanc regiam, & nos in epistolis scribendis adjuvabit.* Ac ne recusanti quidem aut succensuit quicquam, aut amicitiam suam ingerere desiit. Exstant epistolæ, e quibus, argumenti gratia, pauca subjeci. *Sume tibi aliquid juris apud me, tanquam si convictor mihi fueris: quoniam id usus mihi tecum esse volui, si per valetudinem tuam fieri posset.* Et rursus: *Tui qualem habeam memoriam, poteris ex Septimio quoque nostro audire: nam incidit, ut illo coram fieret a me tui mentio.* Neque enim, si tu superbus amicitiam nostram spreveris, ideo nos quoque *ἐνδοξοῦμεν*.

Præterea sæpe eum inter alios jocos putissimum penem, & Lomuncionem lepidissimum ap-

pellat; unaque & altera liberalitate locupletavit. Scripta quidem ejus usque adeo probavit, mansuraque perpetuo opinatus est, ut non modo *Seculare Carmen* componendum injunxerit, sed & *Vindelicam victoriam* Tiberii Drusique privignorum suorum; enique coegerit propter hoc, tribus Carminum libris ex longo intervallo quartum addere; post Sermones vero lectos quosdam, nullam sui mentionem habitam, ita sit questus: *Irasci me tibi scito, quod non in plerisque ejusmodi scriptis mecum potissimum loquaris. An vereris, ne apud posteros tibi infame sit, quod videaris familiaris nobis esse?* Expressitque Eclogam, cujus initium est:

*Quum tot sustineas & tanta negotia solus,
Res Italas armis tuteris, moribus ornes,
Legibus emendes, in publica commoda peccem,
Si longo sermone morer tua tempora, Cæsar.*

Habitu corporis brevis fuit atque obesus; qualis & a semetipso in Satyris describitur, & ab Augusto hac epistola: *Pertulit ad me Dionysius libellum tuum, quem ego, ne accusem brevitatem, quantuluscumque est, boni consulo. Vereri autem*

mibi videris, ne majores libelli tui sint, quam ipse es; sed si tibi statura deest, corpusculum non deest. Itaque licebit in sextariolo scribas, quum circuitus voluminis tui sit ὀγκωδίσματος, sicut est ventriculi tui.

Vixit plurimum in secessu ruris sui Sabini aut Tiburtini; domusque ejus ostenditur circa Tiburni luculum.

Venerunt in manus meas & Elegi sub ejus titulo, & Epistola prosa oratione quasi commendantis se Mæcenati; sed utraque falsa puto. Nam elegi vulgares, epistola obscura, quo vitio minime tenebatur.

Natus est sexto Idus Decembris, L. Cotta, & L. Manlio Torquato Coss. Decessit quinto Calendas Decemb. C. Martio Censorino, & C. Asinio Gallo Coss. post septimum (*) & quinquagesimum annum, hærede Augusto palam nuncupato, quum urgente vi valetudinis non sufficeret ad obsignandas testamenti tabulas. Humatus & conditus est extremis Esquiliis juxta Mæcenatis tumulum.

(*) *Septimum* reposuit ex Eusebiano Chronico Rutgersius, cum alii legant *nonum*. Chronographi dispiciant.



Q. HORATII FLACCI V I T A,

Ex ipsiusmet Scriptis excerpta.

QUINTUS HORATIUS FLACCUS natus est sexto Idus Decembris, anno post Romam conditam sexcentesimo octogesimo nono, Lucio Aurelio Cotta, & L. Manlio Torquato consulibus; quod Vates in Odis docet (1): Patriam habuit Venusiam (2), Apuliæ Dauniae oppidum; patrem vero libertinum & coactorem (3), hoc est, publicanorum administrum, qui pecunias publice pensitari solitas colligeret.

Vix septennis erat Horatius, quum ab optimo parente Romam deportatus est (4), traditusque in disciplinam Orbilii (5) Pupilli, qui

(1) Od. III, 21, i. Od. V, 13, 8.

(2) Od. III, 4, 9.

(3) S. I, 6, 86.

(4) S. I, 6, 76.

(5) Ep. II, 1, 71. Ep. II, 2, 41.

nuper, relicta Benevento patria, Romam demigrarat, ut ibi bonas artes doceret. Puer itaque Horatius honeste & decenter vestitus, additis etiam servulis qui sequerentur, doctrinis omnibus, quæ Equitum ac Senatorum liberi imbebantur, una eruditus est, advigilante interim, & cunctis fere locis præsentē, optimo parente, ne quid accideret, quo puerilis ætatis integritas corrumpetur: quod quidem vere paternum beneficium perenni & aureo grati animi monumento (1) filius memor consignatum voluit.

Romæ igitur sic institutus, humanitatisque & eloquentiæ studiis imbutus, annos natus circiter duodeviginti, Athenas (2) jam adolescens petiit Philosophiæ perdiscendæ causa: inde secutus est Brutum (3), qui, post interfectum in Senatu C. Julium Cæsarem, anno U. C. 710. fugiebat in Macedoniam, & adversus Octavium comparabat exercitum. Is Horatium e Philosopho militem, immo Tribunum (4) militum esse jussit, non sine multorum, ut ipse declarat, invidia.

(1) S. I, 6, 76-84.

(2) Ep. II, 2, 43.

(3) Od. II, 7, 1 & 9.

(4) S. I, 6, 48.

Victo ad Philippos (1), urbem Thessaliæ, Cassii & Bruti exercitu, Horatius, nec paucis prius, nec parvis defunctus belli periculis, fugam arripuit, armis turpiter abjectis, ipso faciente reo. Qua in re præclarum sane, neque usitatum, ingenui candoris specimen edidit; *Est eaim, ut quidam ait non illepide, altera magnanimitas, ignaviæ confessio.*

Mox oblata iis, qui victori Octavio se dederent, libenter usus venia, in Italiam appulit, Romæque redditus, urgente inopia (2), quippe orbatus patre, domo paterna & agro (3) spoliatus, ad factitandos versus (4) se contulit. Hos mirifice comprobavit Varius & Virgilius, Poetarum in Urbe tum principes; atque ita laudaverunt apud Mæcenatem, virum in primis nobilem, & eruditorum patronum, ut is novi, nec adhuc Latinis cogniti, auctorem carminis videre & alloqui percuperet. Interrogavit ille, more suo, paucis Horatium, cujas esset? quo natus patre? aliaque id genus; quæ omnia, ita ut erant, ingenue confessus, placuit quidem, sed

(1) Od. II, 7, 9.

(2) E. II, 2, 51.

(3) Ep. II, 2, 52.

(4) *Ibid.*

non nisi nono post mense Poeta rursus arcessitus in amicorum Mæcenatis numero esse jussus est (1). Sic Vates noster, sequestro ingenio, Musa conciliatrice, in Mæcenatis primum, ac subinde Octavii Caesaris, cui postea Augusti cognomen fuit inditum, gratiam admissus, villam in Sabinis dono datam accepit; cujus situm, formam & commoda, quum aliis locis bene multis, tum epistola 16, Lib. 1 graphice describit.

Hic porro fundus *Ustica*, perinde atque ipsæ villa, nominatus, excurrerat per clivum cognominem, eundemque unum e Lucretilis jugi perpetui lateribus, in tractu *Bandusia*, Sabinienſis agrî regione, uti Scholiastes asserit. Quam autem non modice patuerit Horatii prædium, ex eo videtur posse conjici, quod toto anni curriculo inibi exercerentur octo servi una cum villico, qui rusticanis præſſet operis, quodque olim habitatum quinque focis familias totidem separatas suis fructibus aluiſſet. Oriens indidem rivus, *Digentia* nomine, agrum interfluebat; pererratisque *Bandusia* & *Mandela* pagis, necnon luco ac fano Deæ Vacunæ sacris, in Curensem fluvium suas aquas deferebat. Post mutatam ite-

(1) S. I, 6, 62.

rum & sæpius villæ faciem, totas ædes Poeta beatulus reficiendas omnino curavit; develtis e Tibure vicino saxis candentibus.

Jam vero si quæras in quam hæresi Philosophica ille fuerit, nihil æque certum est ac nullius fuisse; idque apparet ex prima epistola L. I, ubi, provecta tunc ætate maturus, postquam significavit se, nugis omnibus tandem omis- sis, vacare velle Philosophiæ, subjungit:


*Ac, ne forte roges quo me duce, quo Lare tuter,
Nullius addictus jurare in verba magistri,
Quo me cumque rapit tempestas, deferor hospes.*

Et bene ait *hospes*: neque enim si quidpiam ex aliqua secta semel probasset, idem semper probabat; sed, more hospitum, apud singulos tamdiu devertebatur, quamdiu libebat. Ita postquam initio cum Stoicis & Academicis senserat de divina in res humanas providentia, eandem visus est negare cum Epicuro, Sat. 5, Lib. I, quam scripsit juvenis; iterumque Ode 34, L. I, errorem istum ejuravit; & ea, qua parerat, religione de Deis judicavit, utpote quos & invocaret, & precaretur pro se, pro Mæcenate, pro Augusto, populoque Romano. Unde satis liquet

Horatium nihil minus, quam Epicureum fuisse. Neque obest iis quæ diximus, quod Epist. 4, L. I se vocat *Epicuri de grege porcum*: nihil enim aliud, quam cum suo Tibullo ridere voluit, ac significare se pinguem esse & bene nitidum, quales erant Epicuræ doctrinæ sectatores.

Verum ut coronidem imponamus huic nostræ opellæ, fuit Horatius brevis & obesus corpore, ingens & subtilis ingenio; miles imbellis, vates animosus; dictus *Olor Venusinus*, a patria & cantus suavitate: utinam & Oloris munditiem referret in omnibus, nec se impurissimo cœno aliquando fœdissime inquinaret! Latinorum primus & unus forsitan carmina fidibus modulatus est, magno spiritu, dulci sono, felici audacia: idem vitia insectatus Satyris, virtutes Epistolis commendavit: in illis acrior, in his amœnior: in utrisque tersus, elegans, sermone purus, sed numeris durus interdum, & ordine verborum inverso subobscurus: dignus qui Mæcenatibus & Augustis placuerit, qui viris aulicis litterarum studiosis nunc etiam placeat.

Ad extremum, Vates noster obiit V Calendas Decembr. anno ætatis 57, diebus minus undecim, uno fere mense ante Mæcenatis obitum.



TESTIMONIA

DESCRIPTIS

HORATII.

M. FABIIUS QUINTILIANUS,

De Lyricis Horatii.

At Lyricorum idem Horatius fere solus legi dignus. Nam & insurgit aliquando, & plenus est jucunditatis & gratiæ, variis figuris & verbis felicissime audax.

De iisdem PETRONIUS.

Præterea curandum est, ne sententiæ emineant extra corpus orationis expressæ, sed intexto vestibus colore niteant. Homerus testis, & lyrici, Romanasque Virgilius, & Horatii curiosa felicitas.

De Satyris, QUINTILIANUS.

Satyra quidem tota nostra est; in qua primus insignem laudem adeptus est Lucilius: qui quosdam ita deditos sibi adhuc habet amatores, ut eum non ejusdem modo operis auctoribus, sed omnibus poetis

præferre non dubitent. Ego quantum ab illis, tantum ab Horatio dissentio, qui Lucilium fluere lutulentum, & esse aliquid quod tollere possis, putat. Multo est tersior ac purus magis Horatius, & ad notandos hominum mores præcipuus.

De iisdem auctor libri, De causis corruptæ eloquentiæ.

Sed vobis utique versantur ante oculos, qui Lucilium pro Horatio, & Lucretium pro Virgilio legunt.

Idem, de HORATIO.

Exigitur enim jam ab oratore etiam poeticus decor; non Attii aut Pacuvii veterino inquinatus, sed ex Horatii, & Virgilii, & Lucani sacrario prolatus.





Q. HORATII FLACCI
CARMINUM

LIBER I.

AD MÆCENATEM.

ODE I.

*Alios alia delectant; Horatius vero poetæ nomen,
præsertim lyrici, adfectat.*

MÆcenas atavis edite regibus,
O & præsidium, & dulce decus (1) meum :
Sunt quos curriculo (2) pulverem Olympicum
Collegisse juvat, metaque fervidis
Evitata rotis, palmaque nobilis
Terrarum dominos evehit ad Deos (3).
Hunc, si mobilium (a) turba Quiritium

(a) nobilium *codex Bembi & Oxonienses.*

Certat tergeminis tollere honoribus (4):

Illum, si proprio condidit horreo

Quidquid de Libycis verritur areis,

10

Gaudentem patrios findere sarculo

Agros, Attalicis conditionibus

Numquam dimoveas, ut trabe Cypria

Myrtoum pavidus nauta secet mare.

Lusantem Icariis fluctibus Africum

15

Mercator metuens, otium, & oppidi

Laudat rura sui: mox reficit rates

Quassas, indocilis pauperiem pati.

Est qui nec veteris pocula Massici,

Nec partem solido demere de die

20

Spernit, nunc viridi membra sub arbuto

Stratus, nunc ad aquæ lene caput sacræ.

Multos castra juvant, & lituo tubæ

Permistus sonitus, bellaque matribus

Detestata. Manet sub Jove frigido

25

Venator, teneræ conjugis immemor,

Seu visa est catulis cerva fidelibus,

Seu rupit teretes Marsus aper plagas (5).

Me doctarum hederæ præmia frontium

Dīs miscent superis: me gelidum nemus,

30

Nympharumque leves cum Satyris chori

Secernunt populo: si neque tibus

Euterpe cohibet; nec Polyhymnia

Lesboum refugit tendere barbiton (6).

Quod si me lyricis vatibus inseris, 35
Sublimi feriam sidera vertice.



AD AUGUSTUM CÆSAREM.

O D E II.

In vindictam Julii Caesaris occisi multæ tempestatas Pop. Romano immittuntur. Unica imperiî spes in Augusti incolumitate constituitur.

JAm satis terris nivis, atque diræ
Grandinis misit pater, & rubente
Dextera sacras jaculatus arces,
Terruit urbem:
Terruit gentes, grave ne rediret 5
Sæculum Pyrrhæ, nova monstra questæ;
Omne quum Proteus pecus egit altos
Visere montes:
Piscium & summa genus hæsit ulmo,
Nota quæ sedes fuerat columbis: 10
Et superjecto pavidæ natarunt
Æquore damæ:
Vidimus flavum Tiberim, retortis
Litore Etrusco violenter undis,
Ire dejectum monumenta regis, 15
Templaque Vestæ:

Hiæ dum se ninium querenti
 Jactat ultorem, vagus & sinistra
 Labitur ripa (Jove non probante)

Uxorius amnis.

20

Audiet cives acuisse ferrum,
 Quo graves Persæ melius perirent:
 Audiet pugas, vitio parentum

Rara juvenus.

Quem vocet Divûm populus ruentis
 Imperi rebus? prece qua fatigent
 Virgines sanctæ minus audientem

23

Carmina Vestam?

Cui dabit partes scelus expiandi
 Jupiter? tandem venias, precamur,
 Nube candentes (a) humeros amictus

30

Augur Apollo.

Sive tu mavis Erycina ridens,
 Quam Jocus circumvolat, & Cupido:
 Sive neglectum genus, & nepotes

35

Respicis auctor,

Heu, nimis longo satiate ludo:
 Quem juvat clamor, galeæque leves,
 Acer & Mauri peditis cruentum

Vultus in hostem.

40

Sive mutata juvenem figura

Ales

(a) candenti in duobus Lambini.

Ales in terris imitaris, almæ

Filius Majæ, patiens vocari

Cæsar is ultor:

Serus in cælum redeas, diuque

45

Lætus intersis populo Quirini;

Neve te nostris vitiis iniquum

Ocior aura


Tollat. Hic magnos potius triumphos,

Hic ames dici pater, atque princeps:

50

Neu sinas Medos equitare inultos,

Te duce, Cæsar.



O D E III.

Navi Virgilium Athenas vehenti incolumitatem precatur: deinde in hominum temeritatem audaciamque vehementer insurgit.

Sic (7) te diva potens Cypri,

Sic fratres Helenæ, lucida sidera,

Ventorumque regat pater,

Obstrictis (a) aliis, præter Iapyga,

Navis, quæ tibi creditum

5

Debes Virgilium: finibus Atticis

(a) obstructis *Mureti editio.*

Q. Horat. T. I.

Reddas incolumem, precor,

Et serves animæ dimidium meæ.

Illi robur & æs triplex

Circa pectus erat, qui fragilem truci
Commisit pelago ratem

Primus, nec timuit præcipitem Africum
Decertantem Aquilonibus,

Nec tristes Hyadas, nec rabiem Noti:
Quo non arbiter Adriæ

Major, tollere, seu ponere vult freta.
Quem mortis timuit gradum,

Qui siccis oculis monstra natantia,
Qui vidit mare turgidum (a), &

Infames scopulos Acroceraunia?
Nequicquam Deus abscidit

Prudens Oceano dissociabili
Terras: si tamen impiæ

Non tangenda rates transiliunt vada.
Audax omnia perpeti

Gens humana ruit per vetitum nefas:
Audax Iapeti genus (8)

Ignem fraude mala gentibus intulit.
Post ignem ætheria domo

Subductum, macies, & nova februm
Terris incubuit cohors,

(a) turbidum *Bemb.*

Semotique prius tarda necessitas
Leti, corripuit gradum.

Expertus vacuum Dædalus aera
Pennis non homini datis. 35

Perrupit Acheronta Herculeus labor.
Nil mortalibus arduum (a) est.

Cælum ipsum petimus stultitia: neque
Per nostrum patimur scelus
Iracunda Jovem ponere fulmina. 40



AD L. SEXTIUM (b) CONSULAREM.

O D E IV.

*Amœnitate veris descripta, & communi moriendi
consuetudine proposita, tanquam Epicureus ad
vitam voluptuosam Sestium hortatur.*

Solvitur acris hiems grata vice Veris, & Favonî:
Trahuntque siccas machinæ (9) carinas:

Ac neque jam stabulis gaudet pecus, aut arator igni:
Nec prata canis albicant pruinis.

Jam Cytherea choros ducit Venus imminente Luna: 5
Junctæque Nymphis Gratia decentes

(a) ardui Bemb.

(b) potius legendum Sestium.

Alterno terram quatiunt pede: dum graves Cyclopum
Vulcanus ardens urit officinas.

Nunc decet aut viridi nitidum caput impedire myrto,

Aut flore, terræ quem ferunt solutæ. 10

Nunc & in umbrosis Fauno decet immolare lucis,

Seu poscat agna, sive malit hædo (a).

Pallida mors æquo pulsat pede pauperum tabernas,

Regumque turres. O beate Sexti,

Vitæ summa brevis spem nos vetat inchoare longam. 15

Jam te premet nox, fabulæque manes (b),

Et domus exilis Plutonia: quo simul mearis,

Nec regna vini sortiire talis,


Nec tenerum Lycidam mirabere, quo calet juvenis

Nunc omnis, & mox virgines tepebunt. 20

(a) agnam-hædum *codex Bembi.*

(b) inanes *in MSS. Bembi.*





AD PYRRHAM.

ODE V.

Horatius ex Pyrrhæ illecebris tamquam e naufragio enataverat, cujus amore irretitos adfirmat esse miseros.

Quis multa gracilis te puer in rosa
Perfusus liquidis urget odoribus

Grato, Pyrrha, sub antro?

Cui flavam religas comam,

Simplex munditiis? Heu, quoties fidem,

Mutatosque Deos flebit, & aspera

Nigris æquora ventis

Emirabitur insolens,

Qui nunc te fruitur credulus aurea:

Qui semper vacuam, semper amabilem

Sperat, nescius auræ

Fallacis! Miseri, quibus

Intentata nites. Me tabula sacer

Votiva paries indicat uvida (a)

Suspendisse potenti

Vestimenta maris Deo.

(a) humida vulgo.



AD AGRIPPAM.

ODE VI.

Varius tragediographus bella ab Agrippa gesta decantabit: Horatius vero conviviiis tantum & moribus describendis aptus & idoneus.

Scriberis Vario fortis, & hostium
 Victor, Mæonii carminis alite,
 Quam rem cumque ferox navibus, aut equis
 Miles te duce gesserit.
 Nos, Agrippa, neque hæc dicere, nec gravem 5
 Pelidæ stomachum cedere nescii,
 Nec cursus duplicis (a) per mare Ulyssei,
 Nec sævam Pelopis domum
 Conamur tennes grandia: dum pudor,
 Imbellisque lyræ Musa potens vetat 10
 Laudes egregii Cæsaris, & tuas
 Culpa deterere ingens.
 Quis Martem tunica testum adamantina (10)
 Digne scripserit? aut pulvere Troico
 Nigrum Merionen? aut ope Palladis 15
 Tydiden superis parem?

(a) duplices Lambin. Cruq. & alii.

Nos convivia, nos prælia virginum
 Sectis in juvenes unguibus acrium
 Cantamus, vacui, sive quid urimur,
 Non præter solitum leves.

20



AD MUNATIUM PLANCUM CONSULAREM.

O D E VII.

*Alii alias laudant civitates & regiones: Horatius
 vero reliquis anteponit Tibur, ubi natus est
 Plancus, quem ad diluendas vino curas cohor-
 tatur.*

LAudabunt alii claram Rhodon, aut Mitylenen,
 Aut Ephesum, bimarisque Corinthi
 Mœnia, vel Baccho Thebas, vel Apolline Delphos
 Insignes, aut Thessala Tempe.
 Sunt, quibus unum opus est, intactæ Palladis urbem &
 Carmine perpetuo celebrare, &
 Undique decerptam fronti (a) præponere olivam.
 Plurimus in Junonis honorem,
 Aptum dicit equis Argos, ditesque Mycenæ.
 Me nec tam patiens Lacedæmon,

10

(a) decerptæ frondi *Lambinus cum turba assecrarum.*

Nec tam Larissæ percussit campus optimæ,
 Quam domus Albunæ resonantis (11),
 Et præceps Anio, & Tiburni (a) lucus, & uda
 Mobilibus pomaria rivis.
 Albus ut obscuro deterget nubila cælo 15
 Sæpe Notus; neque parturit imbres
 Perpetuos: sic tu sapiens finire memento
 Tristitiam, vitæque labores
 Molli, Plance, mero: seu te fulgentia signis
 Castra tenent; seu densa tenebit 20
 Tiburis umbra tui. Teucer Salamina, patremque
 Quum fugeret, tamen uda Lyæo
 Tempora populea fertur vinxisse corona,
 Sic tristes adfatus amicos:
 Quo nos cumque feret melior fortuna parente, 25
 Ibimus, o socii comitesque.
 Nil desperandum Teucro duce, & auspice Teucro:
 Certus enim promisit Apollo,
 Ambiguam (12) tellure nova Salamina futuram.
 O fortes, pejoraque passi 30
 Mecum sæpe viri, nunc vino pellite curas;
 Cras ingens iterabimus æquor.

(a) Tiburti *alii*.



AD LYDIAM.

O D E VIII.

Juvenem Sybarin, Lydiæ amore perditum, & voluptatibus colliquefactum notat.

LYdia dic, per omnes

Te Deos oro, Sybarin cur properas amando
Perdere? cur apricum

Oderit campum, patiens pulveris atque solis?
Cur neque militaris

Inter æquales equitat, Gallica nec lupatis
Temperat ora frenis?

Cur timet flavum (13) Tiberim tangere? cur olivum
Sanguine viperino

Cautius vitat? neque jam livida gestat armis 10
Brachia, sæpe disco (14),

Sæpe trans finem jaculo nobilis expedito?
Quid latet, ut marinæ

Filium dicunt Thetidis sub lacrymosa Trojæ
Funera, ne virilis

Cultus in cædem, & Lycias proriperet catervas? 15



AD THALIARCHUM

ODE IX.

Quo magis sævit hiems, eo magis voluptati indulgendum.

V Ides, ut alta stet nive candidum
 Soracte: nec jam sustineant onus
 Silvæ laborantes: geluque
 Flumina constiterint acuto?
 Dissolve frigus, ligna super foco 5
 Large reponens: atque benignius
 Deprome quadrimum Sabina,
 O Thaliarche (15), merum diota (16).
 Permite divis cetera: qui simul
 Stravere ventos æquore fervido 10
 Depræliantes, nec cupressi,
 Nec veteres agitantur orni.
 Quid sit futurum cras, fuge quærere: &
 Quem fors dierum cumque dabit, lucro
 Adpone: nec dulces amores 15
 Sperne puer, neque tu choreas,
 Donec virenti canities abest
 Morosa. Nunc & campus, & aræ,

Lenesque sub noctem susurri

Composita repetantur hora.

25

Nunc & latentis proditor intimo

Gratus puellæ risus ab angulo,

Pignusque direptum lacertis,

Aut digito male pertinaci.



AD MERCURIUM.

ODE X.

*Quem laudat a facundia, a parentibus, a palæstræ
& lyræ inventione, a maxima in jurando cal-
liditate, atque ab iis, quibus fungitur, mune-
ribus.*

Mercuri facunde, nepos Atlantis,
Qui feros cultus hominum recentum
Voce formasti catus, & decoræ

More palæstræ:

Te canam magni Jovis, & Deorum

5

Nuntium, curvæque lyræ parentem:

Callidum quidquid placuit jocoso

Condere furto.

Te, boves olim nisi reddidisses

Per dolum amotas, puerum minaci

10

Voce dum terret, viduus pharetra,
Risit (17) Apollo.

Quin & Atridas, duce te, superbos
Ilio dives Priamus relicto,
Thessalosque ignes, & iniqua Trojæ
Castra fefellit.

15

Tu pias lætis animas reponis
Sedibus, virgaque (18) levem coerces
Aurea turbam, superis Deorum
Gratus, & imis.

20



AD LEUCONOEN.

ODE XI.

Hortatur Leuconoen, omitta futurorum cura, voluptati indulgere, argumento a vitæ brevitate & celeritate ducto.

TU ne quæsieris scire (nefas) quem mihi, quem tibi
Finem Dî dederint, Leuconoe: nec Babylonios
Tentaris numeros (19); ut melius quidquid erit pati,
(Seu plures hiemes, seu tribuit Jupiter ultimam,
Quæ nunc oppositis debilitat pumicibus mare
Tyrrenum) sapias, vina liques, & spatio brevi
Spem longam reseces: dum loquimur, fugerit invida
Ætas: carpe diem, quam minimum credula postero;



AD AUGUSTUM.

O D E XII.

*Collaudatis Dīs, heroibus, virisque aliquot claris,
tandem ad divinas Augusti laudes descendit.*

Quem virum, aut heroa, lyra, vel acri
Tibia sumis (a) celebrare, Clio?

Quem Deum? cujus recinet jocosa

Nomen imago,

Aut in umbrosis Heliconis oris,

Aut super Pindo, gelidove in Hæmo?

Unde vocalem (20) temere insecutæ

Orphea silvæ,

Arte materna rapidos morantem

Fluminum lapsus, celeresque ventos,

Blandum & auritas fidibus canoris

Ducere quercus.

Quid prius dicam solitis parentis (b)

Laudibus? qui res hominum, ac Deorum,

Qui mare, & terras, variisque mundum

Temperat horis?

(a) sumes *codd. Lamb. & Oxon.*

(b) parentum *codd. Oxon. parentem Mæwetis.*

Unde nil majus generatur ipso,
 Nec viget quidquam simile aut secundum:
 Proximos (21) illi tamen occupavit

Pallas honores.

20

Præliis audax neque te silebo

Liber: & sævis inimica virgo

Belluis: nec te metuende certa

Phœbe sagitta.

Dicam & Alciden, puerosque Ledæ,

25

Hunc equis, illum superare pugnis

Nobilem: quorum simul alba nautis

Stella refulsit,

Defluit saxis agitatus humor:

Concidunt venti, fugiuntque nubes:

30

Et minax (quod sic voluere) ponto

Unda recumbit.

Romulum post hos prius, an quietum

Pompili regnum memorem, an superbos

Tarquinî fasces, dubito, an Catonis

35

Nobile letum.

Regulum, & Scauros, animæque magnæ

Prodigum Paulum, superante Pæno,

Gratus insigni referam Camœna,

Fabriciumque.

40

Hunc, & incomtis Curium capillis

Utilem bello tulit, & Camillum

Sæva paupertas, & avitus apto

Cum lare fundus.

Crescit occulto velut arbor ævo 45

Fama Marcelli: micat inter omnes

Julium sidus, velut inter ignes

Luna minores.

Gentis humanæ pater atque custos,

Orte Saturno, tibi cura magni 50

Cæsaris fatis data: tu secundo

Cæsare regnes.

Ille seu Parthos Latio imminentes

Egerit justo domitos triumpho,

Sive subjectos orientis oris 55

Seras & Indos:

Te minor latum (a) reget æquus orbem:

Tu gravi curru quaties Olympum,

Tu parum castis inimica mittes

Fulmina lucis. (22) 60

(a) lætum *multi MSS. codd.*





AD LYDIAM

ODE XIII.

Moleste fert Telephum rivalem sibi a Lydia anteponi.

QUum tu, Lydia, Telephi
 Cervicem roseam, & cerea Telephi
 Laudas brachia, væ! meum
 Fervens difficili bile tumet jecur.
 Tunc nec mens mihi, nec color
 Certa sede manet: humor & in genas
 Furtim labitur, arguens
 Quam lentis penitus macerer ignibus.
 Uror, seu tibi candidos
 Turparunt humeros immodicæ mero
 Rixæ: sive puer furens
 Impressit memorem dente labris notam.
 Non, si me satis audias,
 Speres perpetuum, dulcia barbæ
 Lædentem oscula, quæ Venus
 Quinta (a) parte sui nectaris imbuit.

Fe-

(a) quanta alii.

Felices ter, & amplius,

Quos irrupta tenet copula, nec malis

Divulsus querimoniis

Suprema citius solvet amor die.

20



AD REMPUBLICAM BELLUM CIVILE REPARANTEM.

O D E XIV.

O Navis, referent in mare te novi

Fluctus? o! quid agis? fortiter occupa

Portum. Nonne vides, ut

Nudum remigio latus,

Et malus celeri saucius Africo,

5

Antennæque gemant? ac sine funibus

Vix durare carinæ

Possint imperiosius

Æquor? non tibi sunt integra lintea,

Non Dî, quos iterum pressa voces malo;

10

Quamvis Pontica pinus,

Silvæ filia nobilis,

Jactes & genus, & nomen inutile.

Q. Horat. T. I.

C

Nil pictis timidus navita puppibus

Fidit: tu, nisi ventis

15

Debes ludibrium, cave.

Nuper sollicitum quæ mihi tædium,

Nunc desiderium, curaque non levis,

Interfusa nitentes

Vites æquora Cycladas.

20



NEREI VATICINIUM DE RUINA TROJÆ.

ODE XV.

P Astor quum traheret per freta navibus
Idæis Helenam perfidus hospitam,
Ingrato celeres obruit otio

Ventos, ut caneret fera

Nereus fata. Mala ducis avi domum,

5

Quam multo repetet Græcia milite,

Conjurata tuas rumpere nuptias,

Et regnum Priami vetus.

Eheu (23) quantus equis, quantus adest viris

Sudor! quanta moves funera Dardanæ

10

Genti! jam galeam Pallas, & ægida (24),

Currusque & rabiem parat.

Nequicquam, Veneris præsidio ferox,

Pedes cæsariem, grataque feminis

Imbelli cithara carmina divides.

15

Nequicquam thalamo graves

Hastas, & calami spicula Gnossii

Vitabis, strepitumque, & celerem sequi

Ajacem: tamen, heu! serus adulteros

Crines pulvere collines.

20

Non Laertiaden, exitium tuæ

Gentis, non Pylum Nestora respicis?

Urgent impavidi te Salaminus

Teucer, te Sthenelus sciens

Pugnæ, sive opus est imperitare equis,

25

Non auriga piger: Merionen quoque

Nosces: ecce furit te reperire atrox

Tydides, melior patre:

Quem tu, cervus uti vallis in altera

Visum parte lupum graminis immemor,

30

Sublimi fugies mollis anhelitu,

Non hoc pollicitus tuæ.

Iracunda diem proferet Ilio,

Matronisque Phrygum classis Achillei.

Post certas hiemes uret Achaicus

35

Ignis Iliacas domos.



AD AMICAM.

ODE XVI.

*Palinodiam canit. Nam veniam petit a puella, quam
jambis laserat: culpamque transfert in iram, cu-
jus vim indomitam describit.*

O Matre pulchra filia pulchrior,
 Quem crimosus cumque voles modum
 Pones iambis: sive flamma,
 Sive mari (25) libet Adriano.
 Non Dindymene (26), non adytis quatit
 Mentem sacerdotum incola Pythius,
 Non Liber æque; non acuta
 Sic geminant Corybantes æra,
 Tristes ut iræ, quas neque Noricus
 Deterret ensis, nec mare naufragum,
 Nec sævus ignis, nec tremendo
 Jupiter ipse ruens tumultu.
 Fertur Prometheus addere principi
 Limo coactus particulam undique
 Desectam, & insani leonis
 Vim stomacho apposuisse nostro.
 Iræ Thyesten exitio gravi
 Stravere, & altis urbibus ultimæ

5

10

15

Stetere caussæ, cur perirent

Funditus, imprimeretque muris

20

Hostile aratrum (17). exercitus insolens.

Compesce mentem: me quoque pectoris

Tentavit in dulci juventa

Fervor, & in celeres iambos

Misit furem: nunc ego mitibus

25

Mutare quæro tristia, dum mihi

Fias recantatis amica

Opprobriis, animumque reddas.



AD TYNDARIDEM.

O D E XVII.

Invitat eam in Lucretilem, multa ostendens commoda, quæ ex eo percipiet.

V Elox amœnum sæpe Lucretilem

Mutat Lycæo Faunus, & igneam

Defendit æstatem capellis

Usque meis, pluviosque ventos.

Impune tutum per nemus arbutos

5

Quærunt latentes, & thyma devia

Olentis uxores mariti;

Nec virides metuunt colubras,

C 3

Nec Martiales hæduleæ (a) lupos:

Ut cumque dulci Tyndari fistula

Valles, & Usticæ cubantis

Lævia personuere saxa.

Dñ me tuentur: Dñ pietas mea,

Et Musa cordi est. Hinc tibi copia

Manabit ad plenum benigno

Ruris honorum opulenta cornu.

Hic in reducã valle caniculæ

Vitabis æstus, & fide Teia

Dices laborantes in uno

Penelopen, vitreamque Circen.

Hic innocentis pocula Lesbii

Duces sub umbra: nec Semeleius

Cum Marte confundet Thyoneus

Prælia: nec metues protervum

Suspecta Cyrum (28), ne male dispari

Incontinentes injiciat manus,

Et scindat hærentem coronam

Crinibus, immeritamque vestem.

(a) hædilia plerique Lambin. & Cruq.





AD QUINTILIUM VARUM.

ODE XVIII.

*Vinum moderate sumtum exbilarat animum, at
baustum immoderate furorem concitat.*

NUllam, Vare (29), sacra vite prius severis arborem
Circa mite solum Tiburis, & mœnia Catili.
Siccis omnia nam dura Deus proposuit; neque
Mordaces aliter diffugiunt sollicitudines.

Quis post vina gravem militiam aut pauperiem (a) cre-
pat? (30) 5

Quis non te potius, Bacche pater, teque, decens Venus?

At ne quis modici transiliat munera Liberi,

Centaurea monet cum Lapithis rixa super mero

Debellata: monet Sithoniis non levis Euius;

Quum fas atque nefas exiguo fine libidinum 10

Discernunt avidi. Non ego te, candide Bassareu,

Invitum quatiam; nec variis obsita frondibus

Sub divum rapiam: sæva tene cum Berecynthio

Cornu tympana, quæ subsequitur cæcus amor sui,

Et tollens vacuum plus nimio gloria verticem, 15

Arcanique fides prodiga, perlucidior vitro.

(a) increpat multi.



AD GLYCERAM.

ODE XIX.

Se illius amore urit.

MAter sæva Cupidinum,
 Thebanæque jubet me Semeles puer,
 Et lasciva licentia
 Finitis animum reddere amoribus.
 Urit me Glyceræ nitor
 Splendentis Pario marmore purius:
 Urit grata protervitas,
 Et vultus nimium lubricus adspici.
 In me tota ruens Venus
 Cyprum deseruit; nec patitur Scythas,
 Et versis animosum equis
 Parthum dicere, nec quæ nihil adtinent.
 Hic vivum mihi cespitem, hinc
 Verbenas, pueri, ponite, thuraque,
 Bimi cum patera meri:
 Maciata veniet lenior hostia (31).



AD MÆCENATEM.

ODE XX.

*Invitat Mæcenatem ad convivium minime sumtu-
sum.*

V Ille potabis modicis Sabinum
Cantharis, Græca quod ego ipse testa
Conditum levi, datus in theatro

Quum tibi plausus,

Care Mæcenas, eques; ut paterai
Fluminis ripæ, simul & jocosa
Redderet laudes tibi Vaticanæ

Montis imago.

Cæcubum, & prælo domitam Caleno
Tu bibes uvam; mea nec Falernæ
Temperant vites, neque Formiani
Pocula colles.

10





IN DIANAM ET APOLLINEM.

ODE XXI.

*Hortatur virgines & pueros ad canendas eorum
laudes.*

Dianam teneræ dicite virgines,
Intonsum pueri dicite Cynthium,
Latonamque supremo
Dilectam penitus Jovi.

Vos lætam fluviis, & nemorum coma,
Quæcumque aut gelido prominet Algido,
Nigris aut Erymanthi

Silvis, aut viridis Cragi:
Vos Tempe totidem tollite laudibus,
Natalemque, mares, Delon Apollinis,
Insignemque pharetra,
Fraternaque humerum lyra.

Hic bellum lacrymosum, hic miseram famem
Pestemque, a populo & principe Cæsare, in
Persas (32) atque Britannos

Vestra motus aget prece.



AD ARISTIUM.

ODE XXII.

Vitæ integritas ubique tuta est; idque suo exemplo probat.

INteger vitæ (33), scelerisque purus
Non eget Mauri (a) jaculis, neque arcu,
Nec venenatis gravida sagittis,

Fusce, pharetra:

Sive per Syrtes iter æstuosas,
Sive facturus per inhospitalem
Caucasum, vel quæ loca fabulosus

Lambit Hydaspes.

Namque me silva lupus in Sabina,
Dum meam canto Lalagen, & ultra
Terminum curis vagor expeditus (b),

Fugit inermem.

Quale portentum neque militaris
Daunia in latis alit esculetis,
Nec Jubæ tellus generat, leonum

Arida nutrix.

Pone me pigris ubi nulla campis

(a) Mauris *Bemb. Muret. Cruq.*


(b) expeditis *alii.*

Arbor æstiva recreatur aura;
 Quod latus mundi nebulæ malusque

Jupiter (34) urget:

10

Pone sub curru nimium propinqui
 Solis, in terra domibus negata;
 Dulce ridentem Lalagen amabo,
 Dulce loquentem.



AD CHLOEN.

ODE XXIII.

Non est cur Cloe viros fugiat, quum sit jam ætate matura.

Vitas hinnuleo me similis, Chloe,
 Quærenti pavidam montibus aviis
 Matrem, non sine vano
 Aurarum & silvæ metu.

Nam seu mobilibus Veris inhorruit
 Adventus (a) foliis, seu virides rubum
 Dimovere lacertæ,

Et corde, & genibus tremit.
 Atqui non ego te, tigris ut aspera,

(a) vitis-ad ventum *Heinsius ex Mureto.*

Gætulusve leo, frangere persequor.

10

Tandem desine matrem

Tempestiva sequi viro.



AD VIRGILIUM.

ODE XXIV.

Deslet Quintilii mortem.

QUIS desiderio sit pudor aut modus
 Tam cari capitis? Præcipe lugubres
 Cantus (a), Melpomene, cui siquidam pater
 Vocem cum cithara dedit.

Ergo Quintilium perpetuus sopor
 Urget? cui pudor, & justitiæ soror
 Incorrupta fides, nudaque veritas,

Quando ullum invenient parem?
 Multis ille bonis flebilis occidit:
 Nulli flebilior quam tibi, Virgili.

Tu frustra pius, heu! non ita creditum
 Poscis Quintilium deos.


Quod si Threicio blandius Orpheo
 Auditam moderere arboribus fidem;

(a) lugubris cantus *alii*.

Non vanæ redeat sanguis imagini,
 Quam virga semel horrida,
 Non lenis precibus fata recludere,
 Nigro compulerit Mercurius gregi.
 Durum: sed levius fit patientia,
 Quidquid corrigere est nefas.

15

20



AD LYDIAM.

ODE XXV.

Insultat ei, quod jam vetula, merito ab amatoribus spernatur.

P Arcius junctas (a) quatiunt fenestras
 Ictibus (b) crebris juvenes protervi,
 Nec tibi somnos adimunt; amatque
 Janua limen,
 Quæ prius multum faciles (c) movebat
 Cardines; audis minus, & minus jam,
 Me tuo longas pereunte noctes,
 Lydia, dormis?
 Invicem mœchos anus arrogantes

5

(a) vinctas alii.

(b) jactibus cod. Bomb.

(c) facilis alii.

Flebis in solo levis angiportu,	10
Threcio bacchante magis sub inter-	
Lunia vento;	
Quum tibi flagrans amor, & libido,	
Quæ solet matres furiare equorum,	
Sæviet circa jecur ulcerosum,	15
Non sine questu;	
Læta quod pubes hedera virenti	
Gaudeat pulla magis atque myrto:	
Aridas frondes hiemis sodali	
Dedicet Euro (a).	20



AD MUSAM, DE ÆLIO LAMIA:

ODE XXVI.

*Non decet Musarum cultores curis & mæroribus
esse obnoxios. Poetam suum Lamiam Musæ Pim-
pleæ commendat.*

MUSIS amicus, tristitiam & metus
Tradam protervis in mare Creticum
Portare ventis: quis sub Arcto
Rex gelidæ metuatur oræ (35),

(a) Hebre *alii*.

Quid Tiridatem terreat (36), unice 5
 Securus. O quæ fontibus integris
 Gaudes, apricos nectæ flores,
 Nectæ meo Lamiaë coronam,
 Pimplea dulcis. Nil sine te mei
 Prosunt honores. Hunc fidibus novis (37), 10
 Hunc Lesbio sacrare plectro
 Teque tuasque decet sorores.



AD SODALES CONVIVAS.

ODE XXVII.

Ne inter potandum rixentur, & poculis ipsis pugnent barbarorum more.

NAtis in usum lætitiæ scyphis
 Pugnare, Thracum est: tollite barbarum
 Morem, verecundumque Bacchum
 Sanguineis prohibete rixis.
 Vino & lucernis Medus acinaces 5
 Immane quantum discrepat! impium
 Lenite clamorem, sodales,
 Et cubito remanete presso.
 Vultis severi me quoque sumere
 Partem Falerni? dicat Opuntiaë 10

Frater

Frater Megillæ, quo beatus (38)

Vulnere, qua pereat sagitta.

Cessat voluntas? non alia bibam

Mercede. Quæ te cumque domat Venus,

Non erubescendis adurit

15

Ignibus: ingenuoque semper

Amore peccas: quidquid habes, age,

Depone tutis auribus. Ah miser,

Quanta laboras in (a) Charybdi;

Digne puer meliore flamma! 20

Quæ saga, quis te solvere Thessalis

Magus venenis, quis poterit Deus?

Vix illigatum te triformi

Pegasus expediet (b) Chimæra (39).

(a) laborabas commun.

(b) Chimærae vulgo.





NAUTA ET IMAGO ARCHYTÆ.

ODE XXVIII.

*Inducitur Archytas Philosophus & Geometra nau-
tæ cuidam respondens, quod omnibus sit mo-
riendum, petensque a nauta, ne sinat corpus
(suum jacere in litore insepultum.*

TE maris, & terræ, numeroque carentis arenæ
Mensorem cohibent; Archyta,
Pulveris exigui prope litus parva Matinum
Munera: nec quidquam tibi prodest
Aerias tentasse domos, animoque rotundum
Percurrisse polum, morituro.
Occidit & Pelopis genitor, conviva Deorum,
Tithonusque remotus in auras,
Et Jovis arcanis Minos admissus, habentque
Tartara Panthoiden, iterum orco
Demissum; quamvis clypeo Trojana refixo
Tempora testatus, nihil ultra
Nervos, atque cutem morti concesserat atræ;
Judice te, non sordidus auctor
Naturæ verique. Sed omnes una manet nox,
Et calcanda semel via leti.

Dant alios Furiæ torvo spectacula Marti:
 Exitio est avidum (a) mare nautis.
 Mista senum ac juvenum densantur funera: nullum
 Sæva caput Proserpina fugit (40). 20
 Me quoque devexi rapidus comes Orionis,
 Illyricis Notus obruit undis.
 At tu, nauta, vagæ ne parce malignus arænæ
 Ossibus, & capiti inhumato
 Particulam dare: sic, quodcumque minabitur Eurus 25
 Fluctibus Hesperiiis, Venusinæ
 Plestantur silvæ, te sospite: multaque merces,
 Unde potest, tibi defluat æquo
 Ab Jove, Neptunoque sacri custode Tarenti.
 Negligis immeritis nocituram 30
 Postmodo te natis fraudem committere? Fors &
 Debita jura vicesque superbæ
 Te maneant ipsum: precibus non linquar inultis;
 Teque piacula nulla solvent.
 Quamquam festinas (non est mora longa) licebit 35
 Injecto ter pulvere curras.

(a) avidis *Muretus*.





AD ICCIUM.

O D E XXIX.

*Mirum est & monstri simile, Iccium Philosophum,
studio intermisso, ad militiam transisse divitia-
rum cupiditate.*

Icci, beatis nunc Arabum invides

Gazis; & acrem militiam paras

Non ante devictis Sabææ

Regibus, horribilique Medo

Nectis catenas. Quæ tibi virginum

Sponso necato barbara serviet?

Puer quis ex aula capillis

Ad cyathum statuatur unctis,

Doctus sagittas tendere Sericas

Arcu paterno? Quis neget arduis

Pronos relabi posse rivos

Montibus, & Tiberim reverti;


Quum tu coemptos undique nobiles

Libros Panætî, Socraticam & domum

Mutare lorice Iberis,

Pollicitus meliora, tendis (a)?

(a) temnis apud Acronem.



AD VENEREM.

ODE XXX.

*Rogat Venerem, ut in ædem Glyceræ, sibi dedica-
tam, veniat.*

O Venus, regina Gnidi Paphique,
Sperne dilectam Gytron, & vocantis
Ture te multo Glyceræ decoram
Transfer in ædem.
Fervidus tecum puer, & solutis
Gratiæ zonis, properentque Nymphæ,
Et parum comis sine te Juventas,
Mercuriusque.





AD APOLLINEM.

O D E XXXI.

*Non divitias petit ab Apolline, sed ut sit mens
sana in corpore sano.*

Quid dedicatum poscit Apollinem
Vates? quid orat, de patera novum
Fundens liquorem? non opimas
Sardinæ segetes feracis (a):

Non æstuosæ grata Calabria 5

Armenta: non aurum, aut ebur Indicum:

Non rura, quæ Liris quæta

Mordet aqua, taciturnus amnis.

Premant Calena falce, quibus dedit.

Fortuna, vitem: dives & aureis 10

Mercator exsiccat culullis (41)

Vina Syra reparata merce,

Dīs carus ipsis: quippe ter & quater

Anno revisens æquor Atlanticum


Impune. Me pascunt olivæ, 15

Me cichorea, levesque malvæ.

(a) opimæ-feraces *codd. Oxon. Lamb.*

Frui paratis & valido mihi,
 Latoe, dones, ac (precor) integra
 Cum mente; nec turpem senectam
 Degere, nec cithara carentem.

20



AD LYRAM.

O D E XXXII.

*Adloquitur lyram, eamque poscit, ut sibi adsit, &
 secum canere non desinat.*

P Oscimur (42). Si quid vacui sub umbra
 Lusimus tecum, quod & hunc in annum
 Vivat, & plures: age, dic Latinum (43)

Barbite carmen,

Lesbio primum modulate civi:

Qui ferox bello, tamen inter arma,

Sive jactatam religarat udo

Litore navim,

Liberum, & Musas, Veneremque, & illi

Semper hærentem puerum canebat,

Et Lycum, nigris oculis, nigroque

Crine decorum.

10

O decus Phœbi, & dapibus supremi
 Grata testudo Jovis, o laborum
 Dulce lenimen, mihi cumque salve
 Rite vocanti.

15

AD ALBIUM TIBULLUM.

ODE XXXIII.

*Ne plus æquo doleat, sibi rivalem a Glyceræ indi-
 gne anteponi.*

ALbi, ne doleas plus nimio, memor
 Immitis Glyceræ; neu miserabiles
 Decantes elegos, cur tibi junior
 Læsa præniteat fide.
 Insignem tenui fronte Lycorida
 Cyri torret amor; Cyrus in asperam
 Declinat Pholoen: sed prius Appulis
 Jungentur capreæ lupis,
 Quam turpi Pholoe peccet adultero.
 Sic visum Veneri, cui placet impares
 Formas, atque animos sub juga (44) ahenea
 Sævo mittere cum joco.
 Ipsum me melior quum peteret Venus,
 Grata detinuit compede Myrtale

10

Libertina, fretis acrior Adriæ

15

Curvantis Calabros sinus.



AD SE IPSUM.

ODE XXXIV.

Pænitet se, quod Epicureos sequutus, parum studiose Deos coluerit.

P Arcus Deorum cultor & infrequens,
Insanientis dum sapientiæ

Consultus erro, nunc retrorsum

Vela dare, atque iterare cursus

Cogor reliqtos: namque Diespiter,

Igni corusco nubila dividens

Plerumque, per purum tonantes

Egit equos volucremque currum (43),

Quo bruta tellus, & vaga flumina,

Quo Styx, & invisi horrida Tænarî

Sedes, Atlanteusque finis

Concutitur. Valet ima summis

Mutare, & insignem adtenuat Deus,

Obscura promens: hinc apicem rapax

Fortuna cum stridore acuto

Sustulit; hîc posuisse gaudet (46).



AD FORTUNAM.

ODE XXXV.

*Obsecrat eam, ut Cæsarem conservet in Britannos
iturum.*

O Diva, gratum quæ regis Antium,
 Præsens vel imo tollere de gradu
 Mortale corpus, vel superbos
 Vertere funeribus triumphos:
 Te pauper ambit sollicita prece
 Ruris colonus: te dominam æquoris,
 Quicumque Bithyna lacessit
 Carpathium pelagus carina.
 Te Dacus asper, te profugi Scythæ,
 Urbesque, gentesque, & Latium serox,
 Regumque matres barbarorum, &
 Purpurei metuunt tyranni:
 Injurioso ne pede proruas
 Stantem columnam (47): neu populus frequens
 Ad arma cessantes, ad arma
 Concitet, imperiumque frangat.
 Te semper anteit sæva Necessitas,
 Clavos trabales, & cuneos manu
 Gestans athena; nec severus

Uncus abest, liquidumque plumbum. 20

Te spes, & albo rara fides colit

Velata panno: nec comitem abnegat,

Utrumque mutata potentes

Veste domos inimica linquis.

At vulgus infidum, & meretrix retro 25

Perjura cedit: diffugiunt cadis

Cum fæce siccatis amici,

Ferre jugum pariter dolosi.

Serves iturum Cæsarem in ultimos

Orbis Britannos, & juvenum recens 30

Examem, Eois timendum

Partibus, Oceanoque rubro.

Eheu! cicatricum & sceleris pudet,

Fratrumque: quid nos dura refugimus

Ætas? quid intactum nefasti 35

Liquimus? unde manum (a) juvenus

Metu Deorum continuit? quibus

Pepercit aris? o utinam nova


Incude diffingas retusum (b) in

Massagetæ Arabasque ferrum. 40

(a) manum *Cruq. cum Acrono*. manus *alii*.

(b) recusum *Cruquii codd.*






AD POMPONIUM NUMIDAM.

O D E XXXVI.

Ob ejus ex Hispania reditum gaudio exsultat.

ET ture, & fidibus juvat
 Placare, & vituli sanguine debito
 Custodes Numidæ Deos:
 Qui nunc Hesperia sospes ab ultima,
 Caris multa sodalibus, 5
 Nulli plura tamen dividit oscula,
 Quam dulci Lamia; memor
 Actæ non alio rege puertia,
 Mutatæque simul togæ.
 Cressa ne careat pulchra dies nota (48): 10
 Neu promptæ modus amphoræ,
 Neu morem in Salium (49) sit requies pedum:
 Neu multi Damalis meri
 Bassum (50) Threicia vincat amystide:
 Neu desint epulis rosæ, 15
 Neu vivax apium, neu breve lilium.
 Omnes in Damalin putres
 Deponent oculos: nec Damalis novo
 Divelletur adultero,
 Lascivis ederis ambitiosior. 20



AD SODALES.

O D E XXXVII.

*Illos hortatur ad indulgendum genio ob victoriam
Æliacam.*

Nunc est bibendum, nunc pede libero
Pulsanda tellus: nunc Saliaribus

Ornare pulvinar Deorum (51)

Tempus erat dapibus, sodales.

Antehac nefas depromere Cæcubum

Cellis avitis, dum Capitolio

Regina dementes ruinas,

Funus & imperio parabat,

Contaminato cum grege turpium

Morbo virorum, quidlibet impotens

Sperare, fortunaque dulci

Ebria: sed minuit furorem

Vix una sospes navis ab ignibus:

Mentemque lymphatam Mareotico

Redegit in veros timores

Cæsar, ab Italia volantem

Remis adurgens, (accipiter velut

Molles columbas, aut leporem citus

Venator in campis nivalis.

15

10

5

Æmonia) daret ut catenis 20
 Fatale monstrum (52): quæ generosius
 Perire quærens, nec muliebriter
 Expavit ensem (53), nec latentes
 Classe cita reparavit oras.
 Ausa & jacentem visere regiam 25
 Vultu sereno fortis, & asperas
 Traçtare serpentes, ut atrum
 Corpore combiberet venenum,
 Deliberata morte ferocior:
 Sævis Liburnis (54) scilicet invidens, 30
 Privata deduci superbo
 Non humilis mulier triumpho.



AD MINISTRUM.

C I

O D E XXXVIII.

*Vult famulum suum nihil aliud adbibere ad exter-
num convivii adparatum, quam myrtum.*

Persicos odi puer adparatus (55):
 Displicent nexæ philyra (56) coronæ:
 Mitte sectari, rosa quo locorum
 Sera moretur.

Simplici myrto nihil adlabores
Sedulus, curo: neque te ministrum
Dedecet myrtus, neque me sub arcta
Vite bibentem.





Q. HORATII FLACCI
C A R M I N U M
L I B E R I I.

AD C. ASINIUM POLLIONEM.

O D E I.

Pollionem monet, ut tragædiarum scripturam tantisper intermittat, dum respublica sit composita. Deinde commendat illius scripta.

MOtum ex Metello consule (1) civicum,
Bellique caussas, & vitia, & modos,
Ludumque fortunæ, gravesque
Principum amicitias, & arma
Nondum expiatis uncta cruoribus,
Periculosæ plenum opus aleæ,
Tractas, & incedis per ignes
Suppositos cineri doloso.

Pau-

Paulum severæ Musa tragœdiæ

Desit theatris: mox, ubi publicas

10

Res ordinari, grande munus

Cecropio repetes cothurno,

Insigne mæstis præsidium reis,

Et consulenti Pollio curiæ:

Cui laurus æternos honores

15

Dalmatico peperit triumpho.

Jam nunc minaci murmure cornuum

Perstringis aures: jam litui strepunt:

Jam fulgor armorum fugaces

Terret equos, equitumque vultus.

20

Audire magnos jam videor duces

Non indecoro pulvere sordidos,

Et cuncta terrarum subacta,

Præter atrocem animum Catonis.

Juno, & Deorum quisquis amîcior

25

Afris, inulta cesserat impotens

Tellure: victorum nepotes

Rettulit inferias Jugurthæ.

Quis non Latino sanguine pinguior

Campus sepulcris impia prælia

30

Testatur, auditumque Medis

Hesperiae sonitum ruinæ?

Qui gurgis, aut quæ flumina lugubris

Ignara belli? quod mare Dauniae

Non decoloravere cædes?

35

Q. Horat. T. I.

E

Quæ caret ora cruore nostro?
 Sed ne relictis, Musa procax, jocis,
 Cææ retractes munera næniæ (2):
 Mecum Dionæo sub antro
 Quære modos levior pleſtro.

40



AD C. SALLUSTIUM CRISPUM.

O D E II.

*Proculejum laudat ob liberalitatem in fratres. Con-
 temtus pecuniæ regem efficit & beatum.*

NUllus argento color est avaris
 Abdito (a) terris, inimice lamnæ (3)
 Crispe Sallusti, nisi temperato
 Splendeat usu.

Vivet extento Proculeius (4) ævo,
 Notus in fratres animi paterni:
 Illum aget penna metuente solvi
 Fama superstes.

5

Latius regnes avidum domando
 Spiritum, quam si Libyam remotis

10

(a) abdito *rest. codd.*

Gadibus jungas, & uterque Pœnus (5)

Serviat uni.

Crescit indulgens sibi dirus hydrops,

Nec sitim pellit, nisi caussa morbi

Fugerit venis, & aquosus albo

15

Corpore languor.

Redditum Cyri solio Phraaten,

Dissidens plebi, numero beatorum

Eximit virtus (6); populumque falsis

Dedocet uti

20

Vocibus; regnum & diadema tutum

Deferens uni, propriamque laurum,

Quisquis ingentes oculo irretorto

Speſtat acervos.



AD DELIUM.

ODE III.

*Moderate ferenda utraque est fortuna, quum omni-
bus impendeat æqua moriendi conditio.*

ÆQuam memento rebus in arduis

Servare mentem; non secus in bonis

Ab insolenti temperatam

Lætitia, moriture Deli,

Seu mæstus omni tempore vixeris,	3
Seu te in remoto gramine per dies	
Festos reclinatum bearis	
Interiore nota Falerni;	
Quo pinus ingens, albaque populus	
Umbram hospitalem consociare amant	10
Ramis, & obliquo laborat	
Lympha fugax trepidare rivo.	
Huc vina, & unguenta, & nimium breves	
Flores amœnæ ferre jube rosæ:	
Dum res, & ætas, & sororum	15
Fila trium patiuntur atra.	
Cedes coemtis saltibus, & domo,	
Villaque, flavus quam Tiberis lavit,	
Cedes; & extructis in altum	
Divitiis potietur hæres.	20
Divesne, prisco natus ab Inacho,	
Nil interest, an pauper, & infima	
De gente sub divo moreris,	
Vidima nil miserantis Orci.	
Omnes eodem cogimur: omnium	25
Versatur urna, serius, ocius	
Sors exitura, & nos in æternum	
Exsiliū impositura cymbæ.	





AD XANTHIAM PHOCEUM.

ODE IV.

*Non est cur Xanthias erubescat, quod Phyllida
ancillam amet, quum multis magnis viris idem
usu venerit.*

NE sit ancillæ tibi amor pudori,
Xanthia Phoeu: prius insolentem
Serva Briseis niveo colore

Movit Achillem:

Movit Ajacem Telamone natum
Forma captivæ dominum Tecmessæ:
Arsit Atrides medio in triumpho

Virgine rapta (7):

Barbaræ postquam cecidere turmæ
Thessalo victore, & ademptus Hector 10
Tradidit fessis leviora tolli

Pergama Graiis.

Nescias an te generum beati
Phyllidis flavæ decorent parentes:
Regium certe genus, & Penates 13

Mœret iniquos.


Crede non illam tibi de scelestâ (8)

Plebe delectam (a); neque sic fidelem,
Sic lucro aversam potuisse nasci

Matre pudenda.

20

Brachia, & vultum, teretesque suras
Integer laudo: fuge suspicari,
Cujus octavum trepidavit ætas
Claudere lustrum.



IN LALAGEN.

ODE V.

*Pulcherrima Lalage est virgo viro immatura: ergo
ab ejus cupiditate est mens revocanda.*

Nondum subacta ferre jugum valet
Cervice, nondum munia comparis
Æquare, nec tauri ruentis
In Venerem tolerare pondus.
Circa virentes est animus tuæ
Campos juvencæ, nunc fluviis gravem
Solantis æstum, nunc in udo
Ludere cum vitulis salicto
Prægestientis: tolle cupidinem

5

(a) dilectam alii.

Immitis uvæ: jam tibi lividos 10
 Distinguet autumnus racemos
 Purpureo varius colore.
 Jam te sequetur, (currit enim ferox
 Ætas; & illi, quos tibi demserit,
 Adponet annos) jam proterva 15
 Fronte petet Lalage maritum;
 Dilecta, quantum non Pholoe fugax,
 Non Chloris: albo sic humero nitens,
 Ut pura nocturno renidet
 Luna mari, Cnidiisque Gyges; 20
 Quem si puellarum insereres choro,
 Mire sagaces falleret hospites
 Discrimen obscurum, solutis
 Crinibus, ambiguoque vultu.



AD SEPTIMIUM.

ODE VI.

*Optat habere suæ senectutis sedem Tibur, & Ta-
 rentum, quorum laudat amœnitatem.*

SEptimi, Gades aditure mecum, &
 Cantabrum indoctum juga ferre nostra, &

Barbaras Syrtes, ubi Maura semper

Æstuat unda:

Tibur Argeo positum colono,

5

Sit meæ sedes utinam senectæ:

Sit modus lasso maris, & viarum,

Militiæque.

Unde si Parcæ prohibent iniquæ,

Dulce pellitis ovibus Galesi

10

Flumen, & regnata petam Laconi

Rura Phalanto.

Ille terrarum mihi præter omnes.

Angulus ridet, ubi non Hymetto

Mella decedunt, viridique certat

15

Bacca Venafro:

Ver ubi longum, tepidasque præbet

Jupiter brumas, & amicus Aulon

Fertili (a) Baccho minimum Falernis

Invidet uvis.

20

Ille te mecum locus, & beatæ

Postulant arces: ibi tu calentem

Debita sparges lacryma favillam

Vatis amici.

(a) fertilis tres codd. Crug.



AD POMPEJUM VARUM.

ODE VII.

Ei reditum gratulatur in patriam.

O Sæpe mecum tempus in ultimum
 Deducte, Bruto militiæ duce,
 Quis te redonavit Quiritem
 Dīs patriis, Italoque cœlo,
 Pompei, meorum prime sodalium?
 Cum quo morantem sæpe diem mero
 Fregi, coronatus nitentes
 Malobathro (9) Syrio capillos.
 Tecum Philippos, & celerem fugam
 Sensi, relicta non bene parmula;
 Quum fracta virtus, & minaces
 Turpe solum tetigere mento.
 Sed me per hostes Mercurius celer
 Denso paventem sustulit aere:
 Te rursus in bellum resorbens
 Unda fretis tulit æstuosis.
 Ergo obligatam redde Jovi dapem;
 Longaque fessum militia latus
 Depone sub lauru mea; nec
 Parce cadis tibi destinatis.

5

10

15

20

Oblivioso levia Massico

Ciboria exple: funde capacibus

Unguenta de conchis: quis udo

Deproperare apio coronas

Curatve myrto? quem Venus arbitrum

25

Dicet bibendi? non ego sanius

Bacchabor Edonis: recepto

Dulce mihi furere est amico.



IN JULIAM BARINEN.

O D E VIII.

*Non est cur ei juranti credatur, quum ex per-
juriis pulchrior exoriatur.*

Ulla si juris tibi pejerati

Pœna, Barine, nocuisset unquam;

Dente si nigro fieres, vel uno

Turpior ungui;

Crederem: sed tu simul obligasti

5

Perfidum votis caput, enitescis

Pulchrior multo, juvenumque prodis

Publica cura.

Expedit matris cineres opertos

Fallere, & toto taciturna noctis

10

Signa cum cœlo, gelidaque divos

Morte carentes.

Ridet hoc (inquam) Venus ipsa; rident

Simplices Nymphæ, ferus & Cupido,

Semper ardentes acuens sagittas

15

Cote cruenta.

Adde quod pubes tibi crescit omnis:

Servitus crescit nova: nec priores

Impiæ tecum dominæ relinquunt

Sæpe minati.

20

Te suis matres metuunt juvenis (10),

Te senes parci, miseræque nuper

Virgines nuptæ, tua ne retardet

Aura maritos.



AD VALGIUM.

O D E IX.

Ut tandem aliquando mortem pueri sui Mystis deflere desinat.

NON semper imbres nubibus hispidos

Manant in agros; aut mare Caspium

Vexant inæquales procellæ

Usque; nec Armeniis in oris,

Amice Valgi, stat glacies iners
Menses per omnes; aut aquilonibus

Querceta Gargani laborant;

Et foliis viduantur orni.

Tu semper urges flebilibus modis

Mysten ademtum: nec tibi Vespero

Surgente decedunt amores,

Nec rapidum fugiente solem.

At non ter ævo (11) functus amabilem

Ploravit omnes Antilochum senex

Annos; nec impubem parentes

Troilon, aut Phrygiæ sorores

Flevire semper. Desine mollium

Tandem querelarum; & potius nova

Cantemus Augusti tropæa

Cæsaris; & rigidum Niphaten,


Medumque flumen gentibus additum

Victis, minores volvere vortices;

Intraque præscriptum Gelonos

Exiguus equitare campis.





AD LICINIUM.

ODE X.

Mediocritas in utraque fortuna est ferenda.

REctius vives, Licini, neque altum
Semper urgendo; neque dum procellas
Cautus horrescis, nimium premendo

Litus iniquum.

Auream quisquis mediocritatem
Diligit, tutus caret obsoleti
Sordibus tecti, caret invidenda

Sobrius aula.

Sæpius ventis agitur ingens
Pinus; & celsæ graviore casu
Decidunt turre; feriuntque summos

Fulgura montes.

Sperat infestis, metuit secundis
Alteram sortem bene præparatum
Pectus (12): informes hiemes reducit

Jupiter; idem

Summovet. Non, si male nunc, & olim
Sic erit: quondam cithara tacentem
Suscitat Musam, neque semper arcum

Tendit Apollo.

Rebus angustis animosus atque
 Fortis adpare: sapienter idem
 Contrahes vento nimium secundo
 Turgida vela.



AD Q. HIRPINUM.

ODE XI.

Omissis curis vivendum est hilariter.

Quid bellicosus Cantaber, & Scythes,
 Hirpine Quinti, cogitet, Adria
 Divisus objecto, remittas
 Quærere: nec trepides in usum
 Poscentis ævi pauca (13): fugit retro 5
 Levis juvenas, & decor, arida
 Pellente lascivos amores
 Canitie, facilemque somnum.
 Non semper idem floribus est honos
 Vernis; neque uno luna rubens nitet 10
 Vultu: quid æternis minorem
 Consiliis animum fatigas?
 Cur non sub alta vel platano, vel hac
 Pinu jacentes sic temere, & rosa (14)
 Canos odorati capillos, 15

Dum licet, Assyriaque nardo,
 Potamus uncti? dissipat Euius
 Curas edaces: quis puer ocus
 Restinguet ardentis Falerni
 Pocula prætereunte lympha?
 Quis devium scortum eliciet domo
 Lyden? eburna; dic age, cum lyra
 Maturet, incommatam (a) Lacænæ
 More comam religata nodo.

20



AD MÆCENATEM.

ODE XII.

Res graves & tragicæ carmini lyrico non conveniunt. Horatius præter Lycymniæ formam & res amatorias nihil canet.

Nolis longa feræ bella Numantiæ,
 Nec durum (b) Hannibalem, nec Siculum mare
 Pæno purpureum sanguine, mollibus
 Aptari citharæ modis;
 Nec sævos Lapithas, & nimium mero
 Hylæum; domitosque Herculeæ manu

5

(a) incommatam *codd. meliores.*

(b) durum *Membrana vet. durum alii.*

Telluris juvenes, unde periculum

Fulgens contremuit domus

Saturni veteris: tuque pedestribus

Dices historiis prælia Cæsaris,

10

Mæcenæ, melius, ductaque per vias

Regum colla minantium.

Me dulces dominæ Musa Lycymniæ

Cantus, me voluit dicere lucidum

Fulgentes oculos, & bene mutuis

15

Fidum pectus amoribus:

Quam nec ferre pedem dedecuit choris,

Nec certare joco, nec dare brachia

Ludentem nitidis virginibus, sacro

Dianæ celebris die,

20

Num tu, quæ tenuit dives Achæmenes,

Aut pinguis Phrygiæ Mygdonias opes

Permutare velis crine Lycymniæ,

Plenas aut Arabum domos?

Dum flagrantia detorquet ad oscula

25

Cervicem, aut facili sævitia negat

Quæ poscente magis gaudeat eripi,

Interdum rapere occupet.





IN ARBOREM, CUJUS CASU RE-
PENTINO PÆNE OPPRESSUS
FUERAT.

O D E XIII.

ILle & nefasto (15) te posuit die,
Quicumque primum, & sacrilega manu
Produxit, arbos, in nepotum
Perniciem, opprobriumque pagi.
Illum & parentis crediderim sui
Fregisse cervicem, & penetralia
Sparsisse nocturno cruore
Hospitis: ille venena Colchica,
Et quidquid usquam concipitur nefas,
Traçavit, agro qui statuit meo
Te triste (16) lignum, te caducum
In domini caput immerentis.
Quid quisque vitet, nunquam homini satis
Cautum est in horas: navita Bosporum
Pænus perhorrescit; neque ultra
Cæca timet aliunde fata:
Miles sagittas & celerem fugam
Parthi; catenas Parthus & Italum
Q. Horat. T. I. F

Robur (17): sed improvisa leti

Vis rapuit rapietque gentes.

20

Quam pæne furvæ regna Proserpinæ,

Et judicantem vidimus Æacum,

Sedesque discretas (a) piorum, &

Æoliis fidibus querentem¹

Sappho puellis de popularibus (18);

25

Et te sonantem plenius aureo,

Alcæe, plectro (19) dura navis,

Dura fugæ mala, dura belli.

Utrumque sacro digna silentio

Mirantur umbræ dicere: sed magis

30

Pugnas & exactos tyrannos

Densum humeris bibit aure vulgus.

Quid mirum? ubi illis carminibus stupens

Demittit atras bellua centiceps (20)

Aures, & intorti capillis

35

Eumenidum recreantur angues?

Quin & Prometheus, & Pelopis parens

Dulci laborum decipitur sono:

Nec curat Orion leones (21),

Aut timidos agitare lyncas.

40

(a) descriptas Lambin. ex septem MSS.





AD POSTUMUM.

O D E XIV.

Vita brevis, & mori necesse est.

Eheu fugaces, Postume, Postume,
 Labuntur anni: nec pietas moram
 Rugis & instanti senectæ
 Adferet, indomitæque morti.
 Non si trecenis, quotquot eunt dies,
 Amice, places illacrymabilem
 Plutona tauris; qui ter amplum
 Geryonem Tityonque tristi
 Compescit unda, scilicet omnibus,
 Quicunque terræ munere vescimur,
 Enaviganda, sive reges,
 Sive inopes erimus coloni.
 Frustra cruento Marte carebimus,
 Fractisque rauci fluctibus Adriæ:
 Frustra per autumnos nocentem
 Corporibus metuemus Austrum.
 Visendus ater flumine languido
 Cœcytus errans, & Danaï genus
 Infame, damnatusque longi
 Sisyphus Æolides laboris.

Linquenda tellus, & domus, & placens
Uxor: neque harum, quas colis, arborum

Te, præter invisas cupressos (22),

Ulla brevem dominum sequetur.

Absumet hæres Cæcuba dignior

25

Servata centum clavibus, & mero

Tinget pavementum superbum (a)

Pontificum potiore cœnis.



IN SUI SÆCULI LUXUM.

ODE XV.

IAM pauca aratro jugera regiæ
Moles relinquent: undique latius

Extenta visentur Lucrino

Stagna lacu; platanusque cœlebs (23)

Evincet ulmos: tum violaria, &

5

Myrtus, & omnis copia narium,

Spargent olivetis odorem,

Fertilibus domino priori.

Tum spissa ramis laurea fervidos

Excludet ictus: non ita Romuli

10

(a) superbum *Lambin.* superbo *vulgo.*

Præscriptum, & intonsi (24) Catonis

Auspiciis, veterumque norma.

Privatus illis census erat brevis,

Commune magnum: nulla decempedis

Metata privatis opacam 15


Porticus excipiebat Arcton (25):

Nec fortuitum (26) spernere cespitem (27)

Leges sinebant, oppida publico

Sumtu jubentes, & Deorum

Templa novo decorare saxo (28). 20



AD GROSPHUM.

O D E XVI.

*Omnes expetunt animi tranquillitatem, quæ neque
divitiis, neque honoribus potest adquiri, sed
cupiditates tantum coercendo.*

Otium Divos rogat in patenti

Prensus (a) Ægæo, simul atra nubes

Condedit Lunam, neque certa fulgent

Sidera nautis:

Otium bello furiosa Thrace, 5

(a) pressus unus Cruq.

Otium Medi pharetra decori,
Grosphæ, non gemmis, neque purpura ve-
nale, nec auro.

Non enim gazæ, neque consularis
Summovet licitor miseros tumultus
Mentis, & curas laqueata circum
(a) Tecta (29) volantes.

Vivitur parvo bene, cui paternum
Splendet in mensa tenui salinum (30);
Nec leves somnos timor aut cupido
Sordidus aufert.

Quid brevi fortes jaculamur ævo
Multa? quid terras alio calentes
Sole mutamus? patriæ quis exsul
Se quoque fugit?

Scandit æratas vitiosa naves
Cura; nec turmas equitum relinquit,
Ocior cervis, & agente nimbos
Ocior Euro.

Lætus in præsens animus, quod ultra est
Oderit curare, & amara lento (a)
Temperet risu. Nihil est ab omni
Parte beatum.

Abstulit clarum (31) cita mors Achillem:
Longa Tithonum minuît senectus:

(a) læto • Muretus.

Et mihi forsā, tibi quod negarit, dū

Porriget hora (32).

Te greges centum, Siculæque circum

Mugiunt vaccæ; tibi tollit hinnitum

Apta quadrigis equa; te bis Afro

Murice tinctæ

Vestiunt lanæ: mihi parva rura, &

Spiritum Grajæ tenuem Camœnæ

Parca (33) non mendax dedit; & malignum

Spernere vulgus.

AD MÆCENATEM ÆGROTUM.

O D E XVII.

Eo mortuo negat se velle vivere.

CUR me querelis exanimas tuis?

Nec Dīs amicum est, nec mihi, te prius

Obire, Mæcenas, mearum

Grande decus columenque rerum:

Ah! te meæ si partem animæ rapit

Maturior vis, quid moror altera,

Nec carus æque, nec superstes

Integer? ille dies utramque

Ducet ruinam. Non ego perfidum

Dixi sacramentum: ibimus, ibimus, 10

Utrumque præcedes, supremum

Carpere iter cômites parati.

Me nec Chimææ spiritus igneæ,

Nec, si resurgat, centimanus Gyges (a),

Divellet unquam: sic potenti 15

Justitiæ, placitumque Parcis.

Seu Libra, seu me Scorpius adspicit

Formidolosus, pars violentior

Natalis horæ, seu tyrannus

Hesperiaæ Capricornus undæ: 20

Utrumque nostrum incredibili modo

Consentit astrum: te Jovis impio

Tutela Saturno refulgens

Eripuit, volucrisque (b) fati

Tardavit alas; quum populus frequens 25

Lætum theatris ter crepuit sonum:

Me truncus illapsus cerebro

Sustulerat, nisi Faunus ictum

Dextra levasset; Mercurialium

Custos virorum. Reddere victimas 30

Ædemque votivam memento:

Nos humilem feriemus agnam.

(a) Gyas Muret. Lambin.

(b) volucresque codd. Lambin.



IN AVARUM.

ODE XVIII.

*Re tenui se contentum dicit, ubi alii cupiditatibus
suis & divitiis student, quasi perpetuo victuri.*

Non ebur, neque aureum

Mea renidet in domo lacunar:

Non trabes Hymettiae

Premunt columnas ultima recisas

Africa: neque Attali

Ignotus hæres regiam occupavi:

Nec Lacónicas mihi

Trahunt honestæ purpuras clientæ (a).

At fides, & ingenî

Benigna vena est; pauperemque dives

Me petit: nihil supra

Deos lacesso, nec potentem amicum

Largiora flagito,

Satis beatus unicus Sabinis.

Truditur dies diè,

Novæque pergunt interire Lunæ:

(a) clientæ unus Vaticanus. clientes in ceteris MSS.

Tu secunda marmora

Locas sub ipsum funus; & sepulcri

Immemor, struis domos;

Marisque Bais obstrepentis urges

20

Summovere litora;

Parum locuples continente ripa.

Quid, quod usque proximos

Revellis agri terminos, & ultra

Limites clientium

25

Salis avarus? pellitur paternos

In sinus ferens Deos

Et uxor, & vir, sordidosque natos.

Nulla certior tamen

Rapacis Orci fine (a) destinata

30

Aula divitem manet.

Herum. Quid ultra tendis?

Pauperi recluditur

Regumque pueris: nec satelles Orci

Callidum Promethea

35

Revexit, auro captus: hic superbum

Tantalum, atque Tantalum

Genus coercet: hic levare functum

Pauperem laboribus,

Vocatus atque non vocatus audit.

40

(a) sede alii.



IN BACCHUM.

ODE XIX.

Bacchi laudes, ejus numine plenus, canit Poeta.

Bacchum in remotis carmina rupibus
Vidi docentem (credite posteri)

Nymphasque discentes (34), & aures

Capripedum (35) Satyrorum acutas.

Euoe! recenti mens trepidat metu (36),

Plenoque Bacchi pectore turbidum

Lætatur: euoe! parce, Liber,

Parce, gravi metuende thyrsu.

Fas pervicaces est mihi Thyadas,

Vinique fontem (37), lactis & uberes 10

Cantarē rivos, atque truncis

Lapsa cavis iterare mella:

Fas & beatæ conjugis additum

Stellis honorem, testaque Penthei

Disiecta non levi (a) ruina, 15

Thracis & exitium Lycurgi.

Tu flectis amnes, tu mare barbarum (38):

Tu separatis uvidus in jugis

(a) non leni plures

Nodo coerces viperino

Bistonidum sine fraude crines (39). 20

Tu, quum parentis regna per arduum

Cohors gigantum scanderet impia,

Rhætum retorsisti leonis

Unguibus (40), horribilique mala:

Quamquam choreis aptior & jocis 25

Ludoque dictus, non sat idoneus

Pugnæ ferebaris; sed idem

Pacis eras mediusque belli.

Te vidit insons Cerberus aureo

Cornu decorum, leniter atterens 30

Caudam; & recedentis trilingui

Ore pedes tetigitque crura.



AD MÆCENATEM.

ODE XX.

Horatius in cygnum versus, per universum pervolabit orbem, unde sibi promittit suæ poescos immortalitatem.

NON usitata, nec tenui ferar
Penna, biformis per liquidum æthera
Vates; neque in terris morabor

Longius; invidiaque major

Urbes relinquam. Non ego pauperum

Sanguis parentum, non ego, quem vocas,

Dilecte Mæcenas, obibo,

Nec Stygia cohibebor unda.

Jam jam residunt cruribus asperæ

Pelles; & album mutor in alitem

Superne (a) (41); nascunturque leves

Per digitos humerosque plumæ.

Jam Dædaleo ocior Icaro.

Visam gementis litora Bospori,

Syrtesque Getulas, canorus

Ales, Hyperboreosque campos.

Me Colchus, & qui dissimulat metum

Marsæ (42) cohortis, Dacus, & ultimi

Noscent Geloni: me peritus

Discet Iber, Rhodanique potor.

Absint inani funere nœniæ,

Luctusque turpes, & querimoniæ:

Compesce clamorem, ac sepulcri

Mitte supervacuos honores.

(a) superne MSS. omnes. superna vulgo.





Q. HORATII FLACCI
CARMINUM

LIBER III.

VIRGINIBUS PUERISQUE
ROMANIS.

ODE I.

*Vita beata non opibus, aut honoribus, sed animi
tranquillitate efficitur.*

ODI profanum vulgus, & arceo.

Favete linguis: carmina non prius

Audita Musarum sacerdos

Virginibus puerisque canto (1).

Regum timendorum in proprios greges,

Reges in ipsos imperium est Jovis,

Clari giganteo triumpho,

Cuncta supercilio moventis.
 Est ut viro viridatius ordinet
 Arbusta sulcis; hic generosior
 Descendat in campum petitor;
 Moribus hic meliorque fama
 Contendat; illi turba clientium
 Sit major: æqua lege necessitas
 Sortitur insignes & imos;
 Omne capax movet urna (2) nomen.
 Districtus ensis cui super impia
 Cervice pendet, non Siculæ dapes
 Dulcem elaborabunt saporem;
 Non avium citharæque cantus
 Somnum reducent. Somnus agréstium
 Lenis virorum non humiles domos
 Fastidit umbrosamque ripam,
 Non Zephyris agitata Tempe.
 Desiderantem quod satis est, neque
 Tumultuosum sollicitat mare,
 Nec sævus Arcturi cadentis
 Impetus, aut orientis Hædi:
 Non verberatæ grandine vineæ,
 Fundusque mendax; arbore nunc aquas
 Culpante, nunc torrentia agros
 Sidera, nunc hiemes iniquas.
 Contracta pisces æquora sentiunt,
 Jactis in altum molibus: huc frequens

Cæmenta demittit (a) redemptor	35
Cum famulis, dominusque terræ	
Fastidiosus: sed timor & minæ	
Scandunt eodem quo dominus: neque	
Decedit ærata triremi, &	
Post equitem sedet atra cura.	40
Quod si dolentem nec Phrygius lapis,	
Nec purpurarum sidere clavior	
Delinit usus, nec Falerna	
Vitis, Achæmeniumque costum (3);	
Cur invidendis postibus, & novo	45
Sublime ritu moliar atrium?	
Cur valle permutem Sabina	
Divitias operosiores?	



AD AMICOS.

O D E II.

*Pueri a teneris annis paupertati, militia, & vitæ
laboriosæ sunt adsuescendi.*

ANgustam, amici, pauperiem pati
Robustus acri militia puer

Con-

(a) dimittit *Bemb. Cruq.*

Condiscat, & Parthos feroces
Vexet eques metuendus hasta;

Vitamque sub divo & trepidis agat 5

In rebus: illum ex mœnibus hosticis

Matrona bellantis tyranni

Prospiciens, & adulta virgo,
Suspiret: Eheu, ne rudis agminum

Sponsus lacessat regius asperum 10

Tactu leonem, quem cruenta

Per medias rapit ira cædes.

Dulce & decorum est pro patria mori.

Mors & fugacem persequitur virum;

Nec parcit imbellis juventæ 15

Poplitibus, timidoque tergo.

Virtus, repulsæ nescia sordidæ,

Intaminatis fulget honoribus;

Nec sumit aut ponit secures

Arbitrio popularis auræ. 20

Virtus, recludens immeritis mori

Cælum, negata tentat iter via;

Cœtusque vulgares, & udam

Spernit humum fugiente penna.

Est & fideli tuta silentio 25

Mercēs: vetabo, qui Cereris sacrum

Vulgarit arcanæ, sub iisdem

Sit trabibus, fragilemve mecum

Solvat phaselum: sæpe Diespiter

Q. Horatii T. I. G

Neglectus incesto (4) addidit integrum:

30

Raro antecedentem scelestum

Deseruit pede pœna claudo.



AD AUGUSTUM.

O D E III.

Ne Trojam excitet, & sedem eligat imperii.

Justum, & tenacem propositi virum,

Non civium ardor prava jubentium,

Non vultus instantis tyranni

Mente quatit solida, neque Auster,

Dux inquieti turbidus Adriæ,

5

Nec fulminantis magna Jovis manus.

Si fractus illabatur orbis,

Impavidum ferient ruinæ.

Hac arte Pollux, & vagus Hercules

Innixus, arces attingit igneas:

10

Quos inter Augustus recumbens

Purpureo bibit ore nectar.

Hac te merentem, Bacche pater, tuæ

Vexere tigres, indocili jugum

Collo trahentes: hac Quirinus

15

Martis equis (5) Acheronta fugit,

Gratum eloquuta consiliantibus

Junone divis: Ilion, Ilion

Fatalis incestusque iudex,

Et mulier peregrina vertit

10

In pulverem, ex quo destituit Deos (6)

Mercede pacta Laomedon, mihi

Castæque damnatum Minervæ

Cum populo & duce fraudulento.

Jam nec Lacænæ splendet adulteræ

25

Famosus hospes; nec Priami domus

Perjura pugnacēs Achivos

Hectoreis opibus refringit:

Nostrique ductum seditionibus

Bellum resedit: protinus & graves

30

Iras, & invisum nepotem (7),

Troica quem peperit sacerdos,

Marti redonabo: illum ego lucidas

Inire sedes, ducere (a) nectaris

Succos, & adscribi quietis

35

Ordinibus patiar Deorum.

Dum (8) longus inter sæviat Ilion

Romamque pontus; qualibet exsules

In parte regnanto beati:

Dum Priami Paridisque busto

40

Insultet armentum, & catulos feræ

(a) discere, duo Torrent.

Celent inultæ; stet Capitolium

Fulgens, triumphatisque possit

Roma ferox dare jura Medis.

Horrenda late nomen in ultimas

45

Extendat oras, qua medius liquor

Secernit Europen ab Afro,

Qua tumidus rigat arva Nilus:

Aurum irrepertum, & sic melius situm

Quum terra celat, spernere fortior,

50

Quam cogere humanos in usus,

Omne sacrum rapiente dextra.

Quicumque mundo: (a) terminus obstitit,

Hunc tangat armis; visere gestiens

Qua parte debacchentur ignes,

55

Qua nebulae pluviique rores.

Sed bellicosas fata Quiritibus

Hac lege dico; ne nimium pii (9),

Rebusque fidentes, avitæ

Tecta velint reparare Trojæ.

60

Trojæ renascens alite lugubri

Fortuna tristi clade iterabitur,

Ducente victrices catervas

Conjuge me Jovis, & sorore.

Ter si resurgat murus aeneus

65

Auctore (b) Phœbo, ter pereat meis

(a) mundo *plures* MSS. mundi *quidam* Lamb.

(b) auctore *unus* MS. Cruq.

Excisus Argivis; ter uxor

Capta virum puerosque ploret.

Non hæc jocosæ conveniunt (a) lyræ.

Quo Musa tendis? desine pervicax

70

Referre sermones Decorum, &

Magna modis tenuare parvis.



AD CALLIOPEN.

ODE IV.

*Poeta se a multis periculis Musarum ope ereptum
fuisse dicit.*

Descende cælo, & dic age tibia

Regina (10) longum Calliope melos;

Seu voce nunc mavis acuta,

Seu fidibus, citharave Phœbi.

Auditis? an me ludit amabilis

5

Insania? audire, & videor pios

Errare per lucos (11), amœnæ

Quos & aquæ subeunt, & auræ.

Me fabulosæ Vulture in Appulo,

Altricis extra limen Apuliæ,

10

(a) convenient, conveniet, conveniat *alii*.

Ludo fatigatumque somno,
 Fronde nova puerum palumbes
 Texere; mirum quod foret omnibus,
 Quicumque celsæ nidum Acherontiae,
 Saltusque Bantinos, & arvum 15
 Pingue tenent humilis Ferenti;
 Ut tuto ab atris corpore viperis
 Dormirem & ursis; ut premerer sacra
 Lauroque, collataque myrto,
 Non sine Dîs animosus infans. 20
 Vester, Camœnæ, vester in arduos
 Tollor Sabinos: seu mihi frigidum
 Prænestæ, seu Tibur supinum,
 Seu liquidæ placuere Bajæ (12).
 Vestris amicum fontibus & choris, 25
 Non me Philippis versa acies retro,
 Devota non exstinxit arbos,
 Nec Sicula Palinurus unda.
 Utcunque mecum vos eritis, libens
 Insanientem navita Bosporum 30
 Tentabo, & arentes (a) arenas
 Litoris Assyrii viator.
 Visam Britannos hospitibus feros (13),
 Et lætum equino sanguine Concanum (14):
 Visam pharetratos Gelonos (15), 35

(a) urentes *Acron*.

Et Scythicum inviolatus amnem (16).

Vos Cæsarem altum, militia simul .

Fessas cohortes abdidit (a) oppidis,

Finire quærentem labores

Pierio recreatis antro.

40

Vos lene consilium & datis, & dato

Gaudetis almæ. Scimus ut impios

Titanas immanemque turmam

Fulmine sustulerit caduco,

Qui terram inertem, qui mare temperat

45

Ventosum, & urbes (17), regnaque tristia,

Divosque, mortalesque turbas

Imperio regit unus æquo.

Magnum illa terrorem intulerat Jovi

Fidens juvenus horrida brachiis,

50

Fratresque tendentes opaco

Pelion imposuisse Olympo.

Sed quid Typhœus, & validus Mimas,

Aut quid minaci Porphyrion statu,

Quid Rhœtus, evulsisque truncis

55

Enceladus jaculator audax,

Contra sonantem Palladis ægida

Possent ruentes? Hinc avidus stetit

Vulcanus; hinc matrona Juno, &

Nunquam humeris positurus arcum,

60

(a) reddidit *duo Lambin. & Cruq.*

Qui rore puro Castaliæ lavit
Crines solutos, qui Lyciæ tenet

Dumeta, natalemque silvam
Delius & Patareus Apollo.

Vis consilii expers mole ruit sua: 65

Vim temperatam Dî quoque provehunt

In majus: idem odere vires
Omne nefas animo moventes.

Testis mearum centimanus Gyges

Sententiarum, notus & integræ 70

Tentator Orion Dianæ,
Virginea domitus sagitta.

Injecta monstris terra dolet suis;

Mæretque partus fulmine luridum

Missos ad Orcum: nec peredit 75

Impositam celer ignis Ætnam:

Incontinentis nec Tityi jecur

Relinquit ales, nequitiae additus

Custos: amatorem trecentæ

Pirithoum cohibent catenæ. 80





IN LAUDEM AUGUSTI.

ODE V.

*Augustum laudat, quod armorum suorum metu
Britannos, maxime vero Parthos, subegisset.
Reguli sapientia.*

Cælo tonantem credidimus Jovem
Regnare : præsens divus habebitur
Augustus, adjectis Britannis
Imperio, gravibusque Persis.
Milesne Crassi conjuge barbara 5
Turpis maritus vixit? & hostium
(Prò Curia, inversique mores!)
Consenuit socerorum in armis
Sub rege Medo, Marsus & Appulus,
Anciliorum (18), & nominis, & togæ 10
Oblitus, æternæque Vestæ,
Incolumi Jove, & urbe Roma?
Hoc caverat mens provida Reguli
Dissentientis conditionibus
Fœdis, & exemplo trahenti (a) 15
Perniciem veniens in ævum,

(a) trahentis alii.

Si non periret immiserabilis
 Captiva pubes. Signa ego Punicis
 Adfixa delubris, & arma
 Mililibus sine cæde, dixit, 20
 Derepta vidi: vidi ego civium
 Retorta tergo brachia libero,
 Portasque non clausas, & arva
 Marte coli populata nostro.
 Auro repensus scilicet acrior 25
 Miles redibit? flagitio additis
 Damnum; neque amissos colores
 Lana refert medicata fuco;
 Nec vera virtus, quum semel excidit,
 Curat reponi deterioribus. 30
 Si pugnât extricata (19) densis
 Cerva plagis, erit ille fortis,
 Qui perfidis se credidit hostibus;
 Et Marte Pœnos proteret altero,
 Qui lora restrictis lacertis 35
 Sensit iners, timuitque mortem.
 Hic, unde vitam sumeret inscius (a),
 Pacem duello miscuit: o pudor!
 O magna Carthago, probrosis
 Altior Italiæ ruinis! 40
 Fertur pudicæ conjugis osculum,

(a) aptius in MSS. Contii.

Parvosque natos, ut capitis minor (20),

Ab se removisse, & virilem

Torvus humi posuisse vultum;

Donec labantes consilio patres

45

Firmaret auctor nunquam alias dato,

Interque mœrentes amicos

Egregius properaret exsul.

Atqui sciebat quæ sibi barbarus

Tortor pararet: non aliter tamen

50

Dimovit obstantes propinquos,

Et populum reditus morantem;

Quam si clientum longa negotia,

Dijudicata lite, relinqueret,

Tendens Venafranos in agros,

55

Aut Lacedæmonium Tarentum.



AD ROMANOS.

O D E VI.

De moribus sui sæculi corruptis.

DElicta majorum immeritus (21) lues,

Romane, donec templa refeceris,

Ædesque labentes Deorum, &

Fœda nigro simulacra fumo.

Dīs te minorem (22) quod geris, imperas: 5
Hinc omne principium, huc refer exitum.

Dī multa neglecti dederunt

Hesperiae mala luctuosæ.

Jam bis (23) Monæses, & Pacori (24) manus
Non auspicatos contudit impetus 10

Nostros, & adjecisse prædam

Torquibus exiguis renidet.

Pæne occupatam seditionibus

Delevit urbem Dacus (25) & Æthiops;

Hic classe formidatus, ille 15

Missilibus melior sagittis.

Fœcunda culpæ sæcula nuptias

Primum inquinavere, & genus, & domos:

Hoc fonte derivata clades

In patriam populumque fluxit. 20

Motus doceri gaudet Ionicos

Matura virgo, & fingitur artubus

Jam nunc, & incestos amores

De tenero meditatur ungui.

Mox juniores quærit adulteros 25

Inter mariti vina; neque eligit,

Cui donet impermissa raptim (26)

Gaudia, luminibus remotis:

Sed jussa coram non sine conscio

Surgit marito; seu vocat institor, 30

Seu navis Hispanæ magister,

Dedecorum pretiosus emtor.

Non his juvenus orta parentibus

Infecit æquor sanguine Punico,

Pyrrhumque, & ingentem cecidit 35

Antiochum, Hannibalemque dirum (27):

Sed rusticorum mascula militum

Proles, Sabellis docta ligonibus

Versare glebas, & severæ

Matris ad arbitrium recisos 40

Portare fustes; sol ubi montium

Mutaret umbras, & juga demeret

Bobus fatigatis, amicum

Tempus agens abeunte curru.


Damnosa quid non imminuit dies? 45

Ætas parentum, pejor avis, tulit

Nos nequiores, mox daturos

Progeniem vitiosiore.





AD ASTERIEN.

ODE VII.

Consolatur eam de viri sui absentia mœstam.

Quid fles, Asterie, quem tibi candidi
 Primo restituent vere Favonii,
 Thyna (28) merce beatum
 Constanti juvenem fide
 Gygen? (29) Ille Notis actus ad Oricum (30), 5
 Post insana Capræ sidera, frigidas
 Noctes non sine multis
 Insomnis lacrymis agit.
 Atqui sollicitæ nuntius hospitæ,
 Suspirare Chloen, & miseram tuis 10
 Dicens ignibus uri,
 Tentat mille vafer modis.
 Ut Prætum mulier perfida (31) credulum
 Falsis impulerit criminibus, nimis
 Casto Bellerophonti 15
 Maturare necem, refert.
 Narrat pæne datum Pelea (32) tartaro,
 Magnessam Hippolyten dum fugit abstinens:
 Et peccare docentes
 Fallax historias monet, 20

Frustra: nam scopulis surdior Icari
 Voces audit adhuc integer: at, tibi
 Ne vicinus Enipeus
 Plus justo placeat, cave:
 Quamvis non alius flectere equum sciens
 Æque conspicitur gramine Martio;
 Nec quisquam citus æque
 Tusco denatat alveo.
 Prima nocte domum claude: neque in vias
 Sub cantu querulæ despice tibiæ:
 Et te sæpe vocanti
 Duram, difficilis mane.



AD MÆCENATEM.

O D E VIII.

*Quum uxorem non habeat, nihilominus Kalendas
 Martias cur celebret, Mæcenas mirari non debet.*

MArtiis cælebs quid agam Kalendis (33),
 Quid velint flores, & acerra turis
 Plena, miraris, positusque carbo in
 Cespite vivo,
 Docte sermones utriusque linguæ.
 Voveram dulces epulas, & album

Libero caprum, prope funeratus

Arboris iſtu.

Hic dies, anno redeunte, festus

Corticem adſtriſtum pice dimovebit

10

Amphoræ fumum bibere (34) inſtitutæ

Conſule Tullo (35).

Sume, Mæcenas, cyathos amici

Sospitis centum; & vigiles lucernas

Perfer in lucem: procul omnis eſto

15

Clamor & ira.

Mitte civiles ſuper urbe curas:

Occidit Daci Cotiſonis agmen:

Medus inſeſtus ſibi luſtuosis

Dissidet armis:

20

Servit Hispanæ vetus hoſtis oræ

Cantaber, ſera domitus catena:

Jam Scythæ laxo meditantur arcu

Cedere campis.

Negligens, ne qua populus laboreſt,

25

Parce (a) privatus nimium cavere; &

Dona præſentis rape lætus horæ, ac

Linque ſevera.

(a) parte *Arcensius* & *Heins.*

AD



AD LYDIAM.

ODE IX.

Dialogus est de præteritis amoribus eisdemque renovandis.

H O R A T I U S.

DOnec gratus eram tibi,
 Nec quisquam potior brachia candidæ
 Cervici juvenis dabat,
 Persarum vigui rege beator.

L Y D I A.

Donec non alia (a) magis
 Arsisti, neque erat Lydia post Chloen,
 Multi Lydia nominis
 Romana vigui clarior Ilia.

H O R A T I U S.

Me nunc Thressa Chloe regit,
 Dulces docta modos, & citharæ sciens;
 Pro qua non metuum mori,
 Si parcent animæ fata superstiti.

(a) aliam quidd. MSS. Lamb. Cruq.

Q. Horatii T. I.

H

L Y D I A.

Me torret face mutua

Thurini Calais filius Ornithi;

Pro quo bis pariar mori,

15

Si parcent puero fata superstiti.

H O R A T I U S.

Quid si prisca redit Venus,

Diductosque jugo cogit aheneo?

Si flava excutitur Chloe,

Rejedaæque patet janua Lydiæ?

20

L Y D I A.

Quamquam sidere pulchrior

Ille est, tu levior cortice, & improbo

Iracundior Adria;

Tecum vivere amem, tecum obeam libens.



IN LYCEN.

O D E X.

Lycen monet, ut posita duritie sibi supplici parcat.

EXtremum Tanain si biberes, Lyce,

Sævo nupta viro, me tamen asperas

Porrectum ante fores objicere incolis

Plorares Aquilonibus.

Audis quo strepitu janua, quo nemos

5

Inter pulchra situm testa remugiat

Ventis? & positas ut glaciēt nives

Puro numine Jupiter?

Ingratam Veneri pone superbiam;

Ne currente retro funis eat rota.

10

Non te Penelopen difficilem procis

Tyrrhenus genuit parens.

O, quamvis neque te munera, nec preces,

Nec tinctus viola pallor amantium,

Nec vir Pieria pellice saucius

15

Curvat; supplicibus tuis

Parcas, nec rigida mollior esculo,

Nec Mauris animum mitior anguib.

Non hoc semper erit liminis aut aquæ

Cœlestis patiens latus.

20





AD MERCURIUM.

ODE XI.

Mercurium rogat, ut cantus sibi diceret, quibus animum Lydes flectat in ejus amorem, proposita Danaidum fabula.

Mercuri, (nam te docilis magistro

Movit Amphion lapides canendo)

Tuque testudo resonare septem

Callida nervis,

(Nec loquax olim neque grata, nunc &

5

Divitum mensis & amica templis)

Dic modos, Lyde quibus obstinatas

Adplicet aures:

Quæ, velut latis equa trima campis,

Ludit exultim, metuitque tangi,

10

Nuptiarum expers, & adhuc protervo

Cruda marito.

Tu potes tigres comitesque silvas

Ducere, & rivos celeres morari.

Cessit immanis tibi blandienti

15

Janitor aulæ

Cerberus; quamvis furiale centum

Muniant angues caput ejus, atque

Spiritus teter, saniesque (36) manet

Ore trilingui,

20

Quin & Ixion, Tityosque vultu

Risit invito: stetit urna paulum

Sicca, dum grato Danaï puellas

Garmine mulces.

Audiat Lyde scelus atque notas

25

Virginum pœnas, & inane lymphæ

Dolium fundo pereuntis imo,

Seraque fata,

Quæ manent culpas etiam sub Orco.

Impiæ, (nam quid potuere majus?)

30

Impiæ sponso potuere duro

Perdere ferro.

Una de multis, face nuptiali

Digna, perjurum fuit in parentem

Splendide mendax, & in omne virgo

35

Nobilis ævum:

Surge, quæ dixit juveni marito,

Surge, ne longus tibi somnus, unde

Non times, detur: socerum & scelestas

Falle sorores:

40

Quæ, velut nactæ vitulos lænæ,

Singulos, cheu! lacerant: ego illis

Mollior, nec te feriam, nec intra

Claustra tenebo.

Me pater sævis oneret catenis,


45

H 3

Quod viro clemens misero peperci;
 Me vel extremos Numidarum in agros
 Classe releget.

I, pedes quo te rapiunt & auræ,
 Dum favet nox & Venus: i secundo
 Omine; & nostri memorem sepulcro
 Scalpe (a) querelam.

50



AD NEOBULEN.

ODE XII.


*Neobule, Hebri adolescentis amore capta, vitam
 agit inertem & desidiosam.*

Miserarum est, neque amor dare ludum,
 Neque dulci mala vino lavere; aut ex-
 animari, metuentes patruæ verbera linguæ.
 Tibi qualum (37) Cythereæ puer ales,
 Tibi telas, operosæque Minervæ
 Studium aufert, Neobule, Liparæi nitor Hebri.
 Eques ipso melior Bellerophonte,
 Neque pugno, neque segni pede victus,
 Simul unctos Tiberinis humeros lavit in undis,

5

(a) sculpe vulgo.

Catus idem per apertum fugientes. 10
 Agitato grege cervos jaculari, &
 Celer alto latitantem fruticeto excipere aprum.



AD FONTEM BANDUSIÆ.

ODE XIII.

*Sacrificium fonti promittit, ejusque amœnitatem
 summo pere commendat.*

O Fons Bandusiæ (38), splendidior vitro,
 Dulci digne mero, non sine floribus,

Cras donaberis hædo;

Cui frons turgida cornibus

Primis, & Venerem & prælia destinat

Frustra: nam gelidos inficiet tibi

Rubro sanguine rivos

Lascivi soboles gregis.

Te flagrantis atrox hora Caniculæ

Nescit tangere: tu frigus amabile. 10

Fessis vomere tauris:

Præbes, & pecori vago

Fies nobilium tu quoque fontium,

Me dicente cavis impositam ilicem

Saxis, unde loquaces

Lymphae desiliunt tuae.

15



AD POPULUM ROMANUM.

O D E XIV.

Hæc Ode laudes continet Augusti ex Hispania, devictis Cantabris, revertentis.

Herculis ritu modo dictus, o plebs (39),

Morte venalem petiisse laurum

Cæsar, Hispana repetit penates

Victor ab ora.

Unico gaudens mulier marito

Prodeat, justis operata (40) divis (a);

Et soror clari ducis, & decoræ

Supplicæ vitta (41)

Virginum matres, juvenumque nuper

Sospitum. Vos o pueri, & puellæ

Jam virum expertæ, male ominatis (b)

Parcite verbis.

Hic dies vere mihi festus atras

Eximet curas: ego nec tumultum,

(a) sacris plerique Lambin.

(b) male nominatis alii.

Nec mori per vim metuam, tenente

15

Cæsare terras.

I, pete unguentum, puer, & coronas,

Et cadum (42) Marsi memorem duelli (43);

Spartacum si qua potuit vagantem

Fallere testa.

20

Dic & argutæ properet Neæræ

Myrrheum nodo cohibere crinem:

Si per invisum mora janitorem

Fiet, abito.

Lenit albescens animos capillus

25

Litium & rixæ cupidos protervæ.

Non ego hoc ferrem calidus juvena,

Consule Planco (44).



IN CHLORIM.

O D. E. XV.

*Ut, jam vetula, petulantia & libidini modum
constituat.*

UXor pauperis Ibyci,
Tandem nequitiae fige (a) modum tuæ,

(a) pone *Bemb. edit. Muret.*

Famosisque (45) laboribus:

Maturo propior desine funeri

Inter ludere virgines,

5

Et stellis nebulam spargere candidis.

Non, si quid Pholoen satis,

Et te, Chlōri, decet: filia rectius

Expugnat juvenum domos,

Pulso Thyas uti concita tympano.

10

Illam cogit amor Nothi

Lascivæ similem ludere capræ:

Te lanæ prope nobilem

Tonsæ Luceriam, non citharæ, decent,

Nec flos purpureus rosæ,

15

Nec poti vetulam fæce (a) tenuis cadi.



AD MÆCENATEM.

O D E XVI.

Exsecratur insanum divitiarum amorem, seque parvo beatum ostendit.

Inclusam Danaen turris aenea,
Robustæque fores, & vigilum canum

(a) vetula fæce *Bemb. Cruq.*

Tristes excubiæ munierant satis

Nocturnis ab adulteris:

Si non Acrisium, virginis abditæ

5

Custodem pavidum, Jupiter & Venus

Risissent: fore enim tutum iter & patens,

Converso in pretium Deo.

Aurum per medios ire satellites,

Et perrumpere amat saxa, potentius

10

Ictu fulmineo. Concidit auguris

Argivi domus, ob lucrum

Demersa excidio (a): diffidit urbium

Portas vir Macedo, & subruit æmulos

Reges muneribus: munera navium (46)

15

Sævos illaqueant duces.

Crescentem sequitur cura pecuniam,

Majorumque fames: jure perhorru

Late conspicuum tollere verticem,

Mæcenas, equitum decus.

20

Quanto quisque sibi plura negaverit,

A Dīs plura feret. Nil cupientium

Nudus castra peto; & transfuga divitum

Partes linquere gestio,

Contentæ (b) dominus splendidior rei,

25

Quam si quidquid arat non piger (c) Appulus

(a) exitio *Lamb. Cruq. & alii.*

(b) contentæ *duo Codd. Torrent.*

(c) non piger *Vatic. impiger omnes Codd. Cruquii & Pulmanni.*

Occultare meis dicerer horreis,
Magnas inter opes inops (47).

Puræ rivus aquæ, silvaque jugerum
Paucorum, & segetis certa fides meæ, 30
Fulgentem imperio fertilis Africæ
Fallit, sorte beatior.

Quanquam nec Calabræ mella ferunt apes,
Nec Læstrygonia Bacchus in amphora
Languescit mihi, nec pingua Gallicis 35
Crescunt vellera pascuis;

Importuna tamen pauperies abest:
Nec, si plura velim, tu dare deneges.

Contracto melius parva cupidine
Vestigalia porrigam, 40
Quam si Mygdoniis (48) regnum Alyattici
Campis continuem. Multa petentibus

Desunt multa: bene est, cui Deus obtulit
Parca quod satis est manu.





AD ÆLIUM LAMIAM.

O D E XVII.

*Ejus nobilitatem laudat; deinde admonet, ut diem
crastinum bilariter exigat.*

ÆLI, vetusto nobilis ab Lamo,
(Quando & priores hinc Lamias ferunt
Denominatos, & nepotum
Per memores genus omne fastos
Auctore ab illo ducit originem, 5
Qui Formiarum mœnia dicitur
Princeps, & innantem Maricæ
Litoribus tenuisse Lirin,
Late tyrannus) cras foliis nemus
Multis, & alga litus inutili 10
Demissa tempestas ab Euro
Sternet; aquæ nisi fallit augur
Annosa cornix. Dum potes, aridum
Compone lignum: cras genium mero
Curabis (49), & porco bimestri, 15
Cum famulis operum solutis.





AD FAUNUM.

ODE XVIII.

*Deum silvestrem precatur, ut per suos transiens
agros sibi suisque sit propitius.*

FAune, Nympharum fugientum amator,
Per meos fines & aprica rura
Lenis incedas, abeasque parvis

Æquus alumnis:

Si tener pleno cadit hœdus anno,

5

Larga nec desunt Veneris sodali

Vina crateræ (50); vetus ara (51) multo

Fumat odore.

Ludit herboso pecus omne campo,

Quum tibi Nonæ redeunt Decembres:

10

Festus in pratis vacat otioso

Cum bove pagus.

Inter audaces lupus errat agnos:

Spargit agrestes tibi silva frondes:

Gaudet invisam pepulisse fossor

15

Ter pede terram.





AD TELEPHUM.

ODE XIX.

Reprehendit eum jocose, quod, veteres historias describens, ea negligat, quæ ad jucunde vivendum pertinent.

Quantum distet ab Inacho
 Codrus, pro patria non timidus mori,
 Narras, & genus Æaci,
 Et pugnata sacro bella sub Illo:
 Quo Chium pretio cadum 5
 Mercemur, quis aquam temperet ignibus,
 Quo præbente domum, & quota
 Pelignis caream frigoribus, taces.
 Da lunæ propere novæ,
 Da noctis mediæ, da, puer, auguris 10
 Murenæ (52): tribus aut novem
 Miscentur (a) cyathis pocula commodis.
 Qui Musas amat impares,
 Ternos ter cyathos attonitus petet
 Vates: tres prohibet supra 15
 Rixarum metuens tangere Gratia,

(a) miscentur Janus Rutgersius.

Nudis juncta sororibus.

Insanire juvat: cur Berecynthiæ
Cessant flamina tibiæ?

Cur pendet tacita fistula cum lyra? 20
Parcentes ego dexteras

Odi: sparge rosas: audiat invidus
Dementem strepitum Lycus,
Et vicina seni non habilis (a) Lyco.

Spissa te nitidum coma (53), 25

Puro te similem, Telephe, vespero,
Tempestiva petit Chloe:

Me lentus Glyceræ torret amor meæ.



AD PYRRHUM.

ODE XX.

Ne formosum Nearchum a sua puella abstrahat.

NON vides quanto moveas periclo,
Pyrrhe, Getulæ catulos lænæ?
Dura post paulo fugies inaudax
Prælia raptor;

Quum

(a) habili *unus cod. Cruq.*

Quum per obstantes juvenum catervas 5

Ibit insignem repetens Nearchum.

Grande certamen, tibi præda cedat

Major, an illi.

Interim dum tu celeres sagittas

Promis, hæc dentes acuit timendos; 10

Arbiter pugnae posuisse nudo

Sub pede palmam

Fertur, & leni recreare vento

Sparsum odoratis humerum capillis;

Qualis aut Nireus fuit, aut aquosa 15

Raptus ab Ida.



AD AMPHORAM.

O D E XXI.

Jocose eam admonet, ut vinum vetustum in Corvini gratiam effundat.

O Nata mecum consule Manlio,
Seu tu querelas, sive geris jocos,
Seu rixam, & insanos amores,
Seu facilem pia testa somnum:

Q. Horat. T. I.

I

Quocunque lectum nomine Massicum 5
Servas, moveri digna bono die;
Descende, Corvino jubente
Promere languidiora vina.
Non ille, quanquam Socraticis madet
Sermonibus, te negligit horridus: 10
Narratur & prisci Catonis
Sæpe mero caluisse virtus.
Tu lene tormentum ingenio admoves
Plerumque duro: tu sapientium
Curas, & arcanum jocosum 15
Consilium retegis Lyæo:
Tu spem reducis mentibus anxiis,
Viresque; & addis cornua pauperi,
Post te neque iratos trementi
Regum apices, neque militum arma. 20
Te Liber, &, si læta aderit, Venus,
Segnesque nodum solvere Gratiæ,
Vivæque producent lucernæ,
Dum rediens fugat astra Phœbus.





IN DIANAM.

O D E XXII.

Ei pinum villæ suæ imminentem consecrat.

MOntium custos nemorumque, virgo,
 Quæ laborantes utero puellas
 Ter vocata audis, adimisque leto,
 Diva triformis;
 Imminens villæ tua pinus esto,
 Quam per exactos ego lætus annos
 Verris obliquum meditantis iclum
 Sanguine donem.





AD PHIDYLEN.

ODE XXIII.

*Dii puris manibus & conscientia vitæ bene actæ
sunt colendi.*

Cælo supinas si tuleris manus
Nascente Luna, rustica Phidyle,

Si ture placaris & horna

Fruge Lares, avidaque porca;

Nec pestilentem sentiet Africum 5

Fœcunda vitis, nec sterilem seges

Rubiginem, aut dulces alumni

Pomifero grave tempus anno.

Nam, quæ nivali pascitur Algido

Devota, quercus inter & ilices, 10

Aut crescit Albanis in herbis (54)

Victima, Pontificum secures

Cervice tinget. Te nihil attinet

Tentare multa cæde bidentium

Parvos coronantem marino 15

Rore Deos, fragilique myrto.

Immunis aram si tetigit manus,

Non sumtuosa blandior hostia

77 Mollibit aversos (a) Penates.

Farre pio, & saliente mica.

20



IN AVAROS.

O D E XXIV.

Sæculi sui vitia insectatur, & eorum remedium proponit.

Intactis opulentior

Thesauris Arabum, & divitis Indiæ,

Cæmentis licet occupes

Tyrrhenum omne tuis, & mare Ponticum (b);

Si figit adamantinos

Summis verticibus dira necessitas

Clavos; non animum metu,

Non mortis laqueis expedies caput.

Campestres melius Scythæ

(Quorum plaustra vagas rite trahunt domos)

Vivunt, & rigidi Getæ,

Immetata quibus jugera liberas

Fruges & Cærerem ferunt,

Nec cultura placet longior annua,

(a) adversos *duo Cruq.*

(b) Apulicum *alii.*

Defunctumque laboribus 15

Æquali recreat sorte vicarius.

Illic matre carentibus

Privignis mulier temperat innocens;

Nec dotata regit virum

Conjux, nec nitido fudit adultero. 20

Dos est magna parentium

Virtus, & metuens alterius viri

Certo fœdere castitas;

Et peccare nefas, aut pretium est mori.

O quisquis volet impias 25

Cædes, & rabiem tollere civicam;

Si quæret Pater urbium

Subscribi statuis, indomitam audeat

Refrænare licentiam,

Carus (a) postgenitis: quatenus, heu nefas! 30

Virtutem incolumem odimus,

Sublatam ex oculis quærimus invidi.

Quid tristes querimoniam,

Si non supplicio culpa reciditur?

Quid leges sine moribus 35

Vanæ proficiunt? si neque fervidis

Pars inclusa caloribus

Mundi, nec Boreæ finitimum latus,

Duratæque solo nives

(a) clarus *unigo*.

Mercatorem abigunt? horrida callidi

40

Vincunt æquora navitæ.

Magnum pauperies opprobrium, jubet
Quidvis & facere & pati,

Virtutisque viam deserit arduæ.

Vel nos in Capitolium,

45

Quo clamor vocat & turba faventium;

Vel nos in mare proximum

Gemmas, & lapides, aurum & inutile,
Summi materiam mali,

Mittamus. Scelerum si bene pœnitet,
Eradenda cupidinis

50

Pravi sunt elementa, & teneræ nimis
Mentes asperioribus

Formandæ studiis. Nescit equo rudis

Hæreere ingenuus puer,

55

Venarique timet; ludere doctior,

Seu Græco jubeas trocho (55),

Seu malis vetita legibus alea:

Quum perjura patris fides

Consortem socium fallat, & hospitem,

60

Indignoque pecuniam

Hæredi properet. Scilicet improbæ

Crescunt divitiæ: tamen

Curtæ nescio quid semper abest rei.



AD BACCHUM.

ODE XXV.

Oſtaviani laudes, Baccho auspice, exsequi meditatatur.

QUO me, Bacche, rapis tui
 Plenum? quæ in nemora, aut quos agor in specus
 Velox mente nova? quibus
 Antris egregii Cæsaris audiar
 Æternum meditans decus
 Stellis inserere, & concilio Jovis?
 Dicam insigne, recens, adhuc
 Indictum ore alio. Non secus in jugis
 Exsomnia stupet Euias,
 Hebrum prospiciens, & nive candidam
 Thracen, ac pede barbaro
 Lustratam Rhodopen: ut mihi devio
 Rupes (a) & vacuum nemus
 Mirari libet! O Naiadum potens,
 Baccharumque valentium
 Proceras manibus vertere fraxinos,

(a) ripas recentiores.

Nil parvum, aut humili modo,
 Nil mortale loquar. Dulce periculum est,
 O Lenæ, sequi Deum
 Cingentem viridi tempora pampino.

20



AD VENEREM.

ODE XXVI.

*Seneſtute jam confectus, lyræ & rebus amatorijs
 vale dicit.*

Vixi puellis nuper idoneus,
 Et militavi non sine gloria:
 Nunc arma defunctumque bello
 Barbiton hic paries habebit,
 Lævum marinæ qui Veneris latus
 Custodit. Hic, hic ponite lucida
 Funalia, & vestes, & arcus
 Oppositis foribus minaces.
 O, quæ beatam diva tenes Cyprum, &
 Memphin carentem Sithonia nive,
 Regina, sublimi flagello
 Tange Chloen semel arroganti.

10



AD GALATEAM.

O D E XXVII.

*Eam a navigando debortatur, præcipue exemplo
Europæ.*

IMpios parræ recinentis omen
 Ducat, & prægnans canis, aut ab agro
 Rava decurrens lupa Lanuvino,
 Fœtaque vulpes;
 Rumpat & serpens iter institutum,
 Si per obliquum similis sagittæ
 Terruit mannos (56). Ego cui (a) timebo
 Providus auspex,
 Antequam stantes repetat paludes
 Imbrium divina avis imminetum,
 Oscinem (57) corvum prece suscitabo
 Solis ab ortu.
 Sis licet felix ubicumque mavis,
 Et memor nostri, Galatea, vivas:
 Teque nec lævus vetet ire picus,
 Nec vaga cornix.
 Sed vides quanto trepidet tumultu
 Pronus Orion? ego, quid sit ater
 (a) quid plures Codd. MSS. cur unus Cod.

5

10

15

Adriæ novi sinus; & quid albus

Peccet Iapix.

20

Hostium uxores puerique cæcos

Sentiant motus orientis Austri (a), &

Æquoris nigri fremitum, & trementes

Verbere ripas.

Sic & Europe niveum doloso

25

Credidit tauro latus, & scatentem

Belluis pontum, mediasque fraudes

Palluit audax.

Nuper in pratis studiosa florum, &

Debitæ Nymphis opifex coronæ,

30

Nocte sublustri nihil astra præter

Vidit & undas.

Quæ simul centum tetigit potentem

Oppidis Creten, Pater o relictum

Filiæ nomen, pietasque! dixit

35

Victa furore.

Unde? quo veni? levis una mors est

Virginum (58) culpæ: vigilansne ploro,

Turpe commissum? an vitiis carentem

Ludit imago

40

Vana, quæ porta fugiens eburna

Somnium ducit? meliusne fluctus

Ire per longos fuit, an recentes

(a) hædi Murr.

Carpere flores?

Si quis infamem mihi nunc juvencum 45

Dedat iratæ, lacerare ferro, &

Frangere enitar modo multum amati

Cornua tauri (a).

Impudens liqui patrios Penates,

Impudens Orcum moror. O Deorum 50

Si quis hæc audis, utinam inter errem

Nuda leones!

Antequam turpis macies decentes

Occupet malas, teneræque succus

Defluat prædæ, speciosa quæro 55

Pascere tigres.

Vilis Europe, pater urget absens:

Quid mori cessas? potes hac ab orno

Pendulum zona bene te sequuta

Lædere (b) collum. 60

Sive te rupes, & acuta leto

Saxa delectant: age, te procellæ

Crede veloci: nisi herile mavis

Carpere pensum

Regius sanguis, dominæque tradi 65

Barbaræ pellex. Aderat querenti

Perfidum ridens Venus, & remisso

Filius arcu.

(a) monstri septem Cruq.

(b) e-lidere *Lambin. Muret.*

Mox ubi ludit satis, Abstinetor

(Dixit) irarum, calidæque rixæ;

Quum tibi invisus laceranda reddet


Cornua taurus.

Uxor inviâi Jovis esse nescis?

Mitte singultus: bene ferre magnam

Disce fortunam: tua sectus orbis

Nomina ducet.



AD LYDEN.

O D E XXVIII.

*Hortatur illam, diem Neptuno sacrum in potu &
cantu hilariter transigere.*

FEsto quid potius die

Neptuni faciam? prome reconditum,

Lyde strenua, Cæcubum,

Munitæque adhibe vim sapientiæ.

Inclinare meridiem

Sentis; ac, veluti stet volucris dies,

Parcis deripere horreo

Cessantem Bibuli consulis amphoram.

Nos cantabimus invicem

Neptunum; & virides Nereidum comas:

Tu curva recines lyra

Latonam, & celeris spicula Cynthiæ.

Summo carmine, quæ Cnido-

Pulgentesque tenet Cycladas, & Paphon

Iunctis visit oloribus.

Dicetur merita Nox quoque nænia.



AD MÆCENATEM.

ODE XXIX.

Invitat eum ad cœnam hilarem, publicis curis omissis.

TYrrhena regum progenies, tibi

Non ante verso lene merum cado

Cum flore, Mæcnas, rosarum, &

Pressa tuis balanus capillis

Jamdudum apud me est: eripe te moræ;

Ne semper udum Tibur & Æsulæ

Declive contempleris arvom, &

Telegoni juga parricidæ.

Fastidiosam desere copiam, &

Molem propinquam nubibus arduis:

Omitte mirari beatæ

Fumum & opes, strepitumque Romæ.

CARMINUM LIB. III.

Plerumque gratæ divitibus vices,
Mundæque parvo sub lare pauperum.
Cœnæ, sine aulæis & ostro,
Sollicitam explicuere frontem.
Jam clarus occultum Andromedæ pater
Ostendit ignem: jam Procyon furit,
Et stella vesani Leonis,
Sole dies referente siccos.
Jam pastor umbras cum grege languido
Rivumque fessus quærit, & horridi
Dumeta Silvani; caretque
Ripa vagis taciturna ventis.
Tu civitatem quis deceat status,
Curas, & urbi sollicitus times,
Quid Seres, & regnata Cyro
Bactra parent, Tanaisque discors.
Prudens futuri temporis exitum
Caliginosa nocte premit Deus;
Ridetque, si mortalis ultra
Fas trepidat. Quod adest, memento
Componere æquus: cetera fluminis
Ritu feruntur, nunc medio alveo
Cum pace delabentis Etruscum
In mare, nunc lapides adesos,
Stirpesque raptas, & pecus, & domos
Volventis una, non sine montium
Clamore, vicinæque silvæ,

Quum fera diluvies quietos 40
 Irritat amnes. Ille potens sui
 Lætusque deget, cui licet in diem
 Dixisse, Vixi: cras vel atra
 Nube polum Pater occupato,
 Vel sole puro: non tamen irritum 45
 Quodcunque retro est, efficiet; neque
 Diffinget, infectumque reddet,
 Quod fugiens semel hora vexit.
 Fortuna sævo læta negotio, &
 Ludum insolentem ludere pertinax, 50
 Transmutat incertos honores,
 Nunc mihi, nunc alii benigna.
 Laudo manentem: si celeres quatit
 Pennas, resigno quæ dedit, & mea
 Virtute me involvo, probamque 55
 Pauperiem sine dote quæro.
 Non est meum, si mugiat Africis
 Malus procellis, ad miseræ preces
 Decurrere, & votis pacisci,
 Ne Cypriæ Tyriæque merces 60
 Addant avaro divitias mari.
 Tunc me biremis præsidio scaphæ
 Tutum per Ægæos tumultus
 Aura feret, geminusque Pollux.



AD MELPOMENEN.

O D E XXX.

Famæ perennitatem sibi ab suis versibus pollicetur.

EXegi monumentum ære perennius,
 Regalique situ pyramidum altius,
 Quod non imber edax, non Aquilo impotens
 Possit diruere, aut innumerabilis
 Annorum series, & fuga temporum. 5
 Non omnis moriar: multaque pars mei
 Vitabit Libitinam (59). Usque ego postera
 Crescam laude recens, dum Capitolium
 Scandet cum tacita virgine Pontifex.
 Dicar, qua violens obstrepit Aufidus, 10
 Et qua pauper aquæ Daunus agrestium
 Regnator (a) populorum, ex humili potens (60)
 Princeps Æolium carmen ad Italos
 Deduxisse modos. Sume superbiam
 Quæsitam meritis, & mihi Delphica 15
 Lauro cinge volens Melpomene comam.

(a) regnavit multi.



Q. HORATII FLACCI
 CARMINUM
 LIBER IV.

AD VENEREM.

ODE I.

*Ætate sua se jam rebus amatoriis & carminibus
 ludicris haud esse idoneum.*

INtermissa Venus diu,
 Rursus bella moves. Parce, precor, precor.
 Non sum qualis eram bonæ
 Sub regno Cynaræ. Desine dulcium
 Mater sæva (1) Cupidinum,
 Circa lustra decem flectere mollibus
 Jam durum imperiis: abi

Quo blandæ juvenum te revocant preces.
 Tempestivus in domo
 Pauli, purpureis (2) ales oloribus, 10
 Comessabere Maximi,
 Si torrere jecur quæris idoneum.
 Namque & nobilis & decens,
 Et pro sollicitis non tacitus reis,
 Et centum puer artium, 15
 Late signa feret militiæ tuæ.
 Et quandoque potentior
 Largis muneribus riserit æmuli,
 Albanos prope te lacus
 Ponet marmoream, sub trabe citrea (a). 20
 Illic plurima naribus
 Duces tura; lyræque & Berecynthiæ
 Delectabere tibiæ (b),
 Mistis carminibus, non sine fistula.
 Illic bis pueri die (3) 25
 Numen cum teneris virginibus tuum
 Laudantes, pede candido (4)
 In morem Salium ter quatient humum.
 Me nec femina, nec puer
 Jam, nec spes animi credula mutui, 30
 Nec certare juvat mero,
 Nec vincere novis tempora floribus.

(a) cypria plures MSS.

(b) lyræque & Berecynthia-tibia antiquiss. codd. Crug.

Sed cur, heu! Ligurine, cur

Manat rara meas lacryma per genas?

Cur facunda parum decoro

35

Inter verba cadit lingua silentio?

Nocturnis te ego somniis

Jam captum teneo, jam volucrem sequor

Te per gramina Martii

Campi, te per aquas, dure, volubiles (5). 40

AD ANTONIUM JULUM.

ODE II.

Pindari desperat granditatem assequi.

PIndarum quisquis studet æmulari,

Jule, ceratis ope Dædalea

Nititur pennis, vitreo daturus

Nomina ponto.

Monte decurrens velut amnis, imbres

5

Quem super notas aluere ripas,

Fervet, immensusque ruit profundo

Pindarus ore,

Laurea donandus Apollinari (6),

Seu per audaces nova dithyrambos

10

Verba devolvit, numerisque fertur

Lege solutis:

Seu Deos, regesque canit, Deorum

Sanguinem, per quos cecidere justa

Morte Centauri; cecidit tremendæ

15

Flamma Chimæaræ:

Sive, quos Elea domum reducit

Palma cœlestes, pugilemve equumve

Dicit, & centum potiore signis

Munere donat:

20

Flebili sponsæ juvenemve raptum

Plorat; & vires animumque moresque

Aureos educit (a) in astra, nigroque

Invidet Orco.

Multa Diræum levat aura cygnum,

25

Tendit, Antoni, quoties in altos

Nubium tractus: ego, apis Matinæ (?)

More modoque

Grata carpentis thyma per laborem

Plurimum, circa nemus, uvidique

30

Tiburis ripas, operosa parvus

Carmina fingo.

Concines majore poeta plestro

Cæsarem, quandoque trahet feroces (§)

Per sacrum clivum, merita decorus

35

(a) reducit *multi MSS.* deducit *vulgo.*

Fronde, Sicambros (9):

Quo nihil majus, meliusve terris
Fata donavere, bonique Divi;
Nec dabunt, quamvis redeant in aurum

Tempora priscum.

40

Concines lætosque dies, & urbis
Publicum ludum, super impetrato
Fortis Augusti reditu, forumque

Litibus orbum.

Tum meæ (si quid loquar audiendum)
Vocis accedet bona pars: & o sol
Pulcher, o laudande, canam, recepto

45

Cæsare felix.

Tuque (a) dum procedis, Io triumphe!
Non semel dicemus, Io triumphe!
Civitas omnis: dabimusque Divis

50

Tura benignis.

Te decem tauri, totidemque vaccæ,
Me tener solvet (ro) vitulus relicta
Matre, qui largis juvenescit herbis


55

In mea vota;

Fronte curvatos imitatus ignes
Tertium Lunæ referentis ortum,
Qua notam duxit, niveus videri,
Cetera fulvus.

60

(a) teque *alii*.



AD MELPOMENEN.

ODE III.

Se artis poeticæ beneficio immortalitatem consecuturum esse.

Quem tu, Melpomene, semel
 Nascentem placido lumine videris,
 Illum non labor Isthmius
 Clarabit pugilem, non equus impiger
 Curru ducet Achaico (11) 5
 Victorem; neque res bellica Deliis
 Ornatum foliis ducem,
 Quod regum tumidas contuderit minas,
 Ostendet Capitolio:
 Sed quæ Tibur aquæ fertile præfluunt (a), 10
 Et spissæ nemorum comæ,
 Fingent Æolio carmine nobilem.
 Romæ principis urbium
 Dignatur soboles inter amabiles
 Vatum ponere me choros; 15
 Et jam dente minus mordeor invido.
 O testudinis aureæ

(a) perfluunt plures.

Dulcem quæ strepitum, Pieri, temperas,
 O mutis quoque piscibus
 Donatura cygni, si libeat, sonum, 20
 Totum muneris hoc tui est,
 Quod monstror digito prætereuntium
 Romanæ fidicen (12) lyræ:
 Quod spiro, & placeo (si placeo) tuum est.



AD URBEM ROMAM.

ODE IV.

Drusi victoriam de Rhætis & Vindelicis celebrat.

Q Ualem ministrum fulminis alitem,
 (Cui rex Deorum regnum in aves vagas
 Permisit, expertus fidelem
 Jupiter in Ganymede flavo)
 Olim juvenas & patrius vigor 5
 Nido laborum propulit (a) inscium;
 Vernique, jam nimbis remotis,
 Insolitos docuere nisus
 Venti paventem; mox in ovilia
 Demisit hostem vividus impetus; 10

(a) protulit vulgo.

Nunc in reluctantes dracones

Egit amor dapis atque pugnae:

Qualemve lætis caprea pascuis

Intenta, fulvæ matris ab ubere

Jam lacte depulsum leonem,

15

Dente novo peritura, vidit:

Videre Rhœti bella sub Alpibus

Drusum gerentem, & Vindelici; quibus

Mos unde deductus per omne

Tempus Amazonia securi (13)

20

Dextras obarmet, quærere distuli:

(Nec scire fas est omnia) sed diu

Lateque victrices catervæ

Consiliis juvenis revictæ

Sensere quid mens rite, quid indoles

25

Nutrita faustis sub penetralibus

Posset; quid Augusti paternus

In pueros animus Neronis.

Fortes creantur fortibus, & bonis:

Est in juvenis, est in equis patrum

30

Virtus; nec imbellem feroces

Progenerant aquilæ columbam.

Doctrina sed vim promovet insitam,

Reliquæ cultus pectora roborant:

Utcunque defecere mores,

35

Dedecorant (a) bene nata culpæ.

(a) indecorant *Acron* & *Porphyrus*.

Quid debeas, o Roma, Neronibus,
 Testis Metaurum flumen (14), & Asdrubal
 Devictus, & pulcher fugatis

Ille dies Latio tenebris (15), 40

Qui primus alma risit adorea;

Dirus per urbes Afer ut Italas,

Ceu flamma per cædas, vel Eurus

Per Siculas equitavit undas.

Post hoc secundis usque laboribus 45

Romana pubes crevit; & impio

Vastata Pœnorum tumultu

Fana Deos habuere rectos:

Dixitque tandem perfidus Annibal,

Cervi, luporum præda rapæium, 50

Seclamur ultro, quos opimus

Fallere & effugere est triumphus.

Gens, quæ cremato fortis ab Illo

Jactata Tuscis æquoribus, sacra,

Natosque, maturosque patres 55

Pertulit Ausonias ad urbes,

Duris ut ilex tonsa bipennibus

Nigræ feraci frondis in Algido,

Per damna, per cædes, ab ipso

Ducit opes animumque ferro. 60

Non hydra secto corpore firmior

Vinci dolentem crevit in Herculem:

Monstrumve summisere Colchi

Majus, Echioniæve Thebæ.

Merses profundo, pulchrior evenit: 65

Lustere, multa prouet integrum

Cum laude victorem, geretque

Prælia conjugibus loquenda.

Carthagini jam non ego nuntios

Mittam superbos: occidit, occidit 70

Spes omnis, & fortuna nostri

Nominis Asdrubale interempto.

Nil Claudix non efficient (a) manus,

Quas & benigno numine Jupiter

Defendit, & curæ sagaces 75

Expediunt per acuta belli.



AD AUGUSTUM.

ODE V.

Ut reditum in urbem maturet.

Divis orte bonis, optime Romulæ
Custos gentis, abes jam nimium diu:
Maturum reditum pollicitus patrum
Sancto concilio, redi.

(a) perficient, perficiunt *alii*.

Lucem (16) redde tuæ, dux bone, patriæ; 5

Instar Veris enim vultus ubi tuus

Adfulsit populo, gratior it dies,

Et soles melius nitent.

Ut mater juvenem, quem Notus invido

Flatu Carpathii trans maris æquora 10

Cunctantem spatio longius annuo

Dulci distinet a domo,

Votis, ominibusque, & precibus vocat,

Curvo nec faciem litore dimovet (a);

Sic, desideriis ista fidelibus, 15

Quærit patria Cæsarem.

Tutus bos etenim rura perambulat;

Nutrit rura Ceres, almaque Faustitas;

Pacatum volitant per mare navitæ;

Culpari metuit fides; 20

Nullis polluitur casta domus stupris;

Mos & lex maculosum (17) edomuit nefas;

Laudantur simili prole puerperæ;

Culpam pœna premit comes.

Quis Parthum paveat? quis gelidum Scythen? 25

Quis, Germania quos horrida parturit,

Fœtus, incolumi Cæsare? quis feræ

Bellum curet Iberiæ?

Condit quisque diem collibus in suis,

(a) demovet *Lambin.*

Et vitam viduas ducit ad arbores; 30
Hinc ad vina redit lætus, & alteris

Te mensis (18) adhibet Deum.

Te multa prece, te prosequitur mero
Defuso pateris (19); & Laribus tuum
Miscet numen, uti Græcia Castoris, 35

Et magni memor Herculis.

Longas o utinam dux bone ferias
Præstes Hesperia, dicimus integro
Sicci mane die; dicimus uvidi
Quum sol Oceano subest. 40



AD APOLLINEM ET DIANAM.

O D E VI.

Carmen sæculare.

DIve, quem proles Niobæa (20) magnæ
Vindicem linguæ, Tityosque raptor
Sensit, & Trojæ prope victor altæ
Phthius Achilles,
Ceteris major, tibi miles impar; 5
Filius quamvis Thetidos marinæ (21)
Dardanas turres quateret tremenda
Cuspide pugnax.

Ille, mordaci velut ista ferro
 Pinus, aut impulsa cupressus Euro, 10
 Procidit late, posuitque collum in
 Pulvere Teucro.

Ille, non inclusus equo Minervæ
 Sacra mentito, male feriatos
 Troas, & lætam Priami choreis 15
 Falleret aulam:

Sed palam captis (a) gravis (heu nefas, heu!)
 Nescios fari pueros Achivis
 Ureret flammis, etiam latentes (b)
 Matris in alvo: 20

Ni tuis victus, Venerisque gratæ
 Vocibus, Divûm pater annuisset
 Rebus Æneæ potiore ductos
 Alite (22) muros.

Doctor argutæ fidicen Thaliæ, 25
 Phœbe, qui Xantho lavis amne crines:
 Dauniæ defende decus Camœnæ,
 Levis Agylleu.

Spiritum Phœbus mihi, Phœbus artem
 Carminis, nomenque dedit poetæ. 30
 Virginum primæ (23) puerique claris
 Patribus orti,

Delix tutela Deæ, fugaces

(a) captos *Ascensius*. victos *unus Torrent.*

(b) latentem *codd. multi*. jacentem *Pulm.*

Lyncas & cervos cohibentis arcu,
 Lesbium servate pedem, meique * 35
 Pollicis ictum:
 Rite Latonæ puerum canentes,
 Rite crescentem face noctilucam (a),
 Prosperam frugum, celeremque pronos
 Volvere menses. 40
 Nupta jam dices; Ego Dîs amicum,
 Sæculo festas referente luces,
 Reddidi carmen, docilis modorum
 Vatis Horatî.



AD L. MANLIUM TORQUATUM.

O D E VII.

*Veris adventu, & æqua moriendi conditione propo-
 sita, ad late vivendum invitât.*

Diffugere nives, redeunt jam gramina campis,
 Arboribusque comæ:
 Mutat terra vices, & decrescentia ripas
 Flumina prætereunt.
 Gratia cum Nymphis geminisque sororibus audet 5

(a) noctiluca *Bemb.*

Ducere nuda choros.

Immortalia ne speres monet annus, & alium

Quæ rapit hora diem.

Frigora mitescunt Zephyris; ver proterit ætas

Interitura, simul 10

Pomifer autumnus fruges effuderit; & mox

Bruna recurrit iners.

Damna tamen celeres reparant cœlestia Lunæ:

Nos ubi decidimus,

Quo pius (a) Æneas, quo Tullus dives, & Ancus, 15

Pulvis & umbra sumus.

Quis scit, an adjiciant hodiernæ crastina summæ (b)

Tempora Dî superi?

Cuncta manus avidas fugient hæredis, amico

Quæ dederis animo. 20

Quum semel occideris, & de te splendida Minos

Fecerit arbitria,

Non, Torquate, genus, non te facundia, non te

Restituet pietas:

Infernis neque enim tenebris Diana pudicum 25

Liberat Hippolytum;

Nec Lethæa valet Theseus abrumpere caro

Vincula Pirithoo.

(a) pater *quid.* Lamb. Cruq.

(b) vitæ *sex* Lamb. Ascens.

AD MARTIUM CENSORINUM.

O D E VIII.

Nihil carminibus esse potentius ad sui nominis memoriam ab oblivione vindicandam.

Donarem pateras, grataque commodus,
 Censorine, meis æra (24) sodalibus:
 Donarem tripodas, præmia fortium
 Grajorum; neque tu pessima munerum
 Ferres, divite me scilicet artium (25), 5
 Quas aut Parrhasius protulit, aut Scopas;
 Hic saxo, liquidis ille coloribus
 Solers nunc hominem ponere, nunc Deum.
 Sed non hæc mihi vis, non tibi talium
 Res est, aut animus deliciarum egens. 10
 Gaudes carminibus: carmina possumus
 Donare, & pretium dicere muneris.
 Non incisa notis marmora publicis, (26)
 Per quæ spiritus & vita redit bonis
 Post mortem ducibus: non celeres fugæ, 15
 Rejectæque retrorsum Annibalis minæ,
 Non incendia Carthaginis impiæ,
 Ejus, qui domita nomen ab Africa
 Lucratus rediit, clarius indicant

Q. Horatii T. I.

L.

Laudes, quam Calabræ Pierides : neque, 20
 Si chartæ sileant, quod bene feceris,
 Mercedem tuleris. Quid foret Iliæ
 Mavortisque puer, si taciturnitas
 Obstaret meritis invida Romuli?
 Ereptum Stygiis fluctibus Æacum 25
 Virtus, & favor, & lingua potentium
 Vatum divitibus consecrat insulis.
 Dignum laude virum Musa vetat mori,
 Cælo Musa beat. Sic Jovis interest
 Optatis epulis impiger Hercules: 30
 Clarum Tyndaridæ sidus ab infimis
 Quassas eripiunt æquoribus rates.
 Ornatus viridi tempora pampino
 Liber vota bonos ducit ad exitus.





AD LOLIUM.

O D E IX.

Sua & aliorum scripta nunquam interitura.

NE forte credas interiturā, quæ
 Longe sonantem natus ad Ausidum
 Non ante vulgatas (27) per artes
 Verba loquor socianda chordis.
 Non, si priores Mæonius tenet
 Sedes Homerus, Pindaricæ latent,
 Cæque, & Alcæi minaces,
 Stesichorique graves Camœnæ.
 Nec, si quid olim lusit Anacreon,
 Delevit ætas. Spirat adhuc amor,
 Vivuntque commissi calores
 Æoliæ fidibus puellæ.
 Non sola comtos arsit adulteri
 Crines, & aurum vestibus illitum
 Mirata, regalesque cultus
 Et comites, Helene Lacæna:
 Primusve Teucer tela Cydonio

Direxit arcu: non semel Ilios
 Vexata: non pugnavit ingens
 Idomeneus Schenelusve solus 20
 Dicenda Musis prœlia: non ferox
 Hec̃tor, vel acer Deiphobus graves
 Exceptit ictus pro pudicis
 Conjugibus puerisque primus.
 Vixere fortes ante Agamemnona 25
 Multi; sed omnes illacrymabiles
 Urgentur, ignotique longa
 Noctē, carent quia vate sacro.
 Paulum sepultæ distat inertiae
 Celata virtus. Non ego te meis 30
 Chartis inornatum silebo (a),
 Totve tuos patiar labores
 Impune, Lolli, carpere lividas
 Obliviones. Est animus tibi
 Rerumque prudens, & secundis 35
 Temporibus dubiisque rectus;
 Vindex (28) avaræ fraudis, & abstinens
 Ducentis ad se cuncta pecuniæ;
 Consulque non unius anni,
 Sed (29) quoties bonus atque fidus 40
 Judex honestum prætulit utili, &
 Rejecit (b) alto dona nocentium

(a) sileri omnes *Torrent.*

(b) in multis MSS. abest &.

Vultu, & per obstantes (a) catervas

Explicuit sua victor arma.

Non possidentem multa vocaveris

45

Recte beatum: rectius occupat

Nomen beati, qui Deorum

Muneribus sapienter uti,

Duramque callet pauperiem pati,

Pejusque leto flagitium timet:

50

Non ille pro caris amicis,

Aut patria timidus perire.



AD LIGURINUM.

ODE X.

Monet ne formæ suæ nimium confidat.

O Crudelis adhuc, & Veneris muneribus potens,
 Insperata tuæ quum veniet pluma superbiæ,
 Et, quæ nunc humeris involitant, deciderint comæ,
 Nunc & qui color est puniceæ floræ prior rosæ,

(a) in multis MSS. abest &.

Mutatus Ligurinum in faciem verterit hispidam, 5
 Dices, Heu! (quotieste in speculo videris alterum)
 Quæ mens est hodie, cur eadem non puero fuit?
 Vel cur his animis incolumes non redeunt genæ?



AD PHYLLIDEN.

ODE XI.

Die natali Mæcenatis invitat eam ad epulas.

EST mihi nonum superantis annum

Plenus Albani cadus: est in horto,

Phylli, nestendis apium coronis,

Est hederæ vis

Multa, qua crines religata fulges: 5

Ridet argento domus: ara, castis

Vincta verbenis (30), avet immolato

Spargier agno.

Cuncta festinat manus: huc & illuc

Cursitant mistæ pueris puellæ: 10

Sordidum flammæ trepidant rotantes

Vertice fumum.

Ut tamen noris quibus advoceris

Gaudiis; Idus tibi sunt agenda,

Qui dies mensem Veneris marinæ

15

Findit Aprilem (31);

Jure solennis mihi, sanctiorque

Pæne natali proprio, quod ex hac

Luce Mæcenæ meus adfluentes (32)

Ordinat annos.

20

Telephum, quem tu petis, occupavit

Non tuæ sortis juvenem puella

Dives & lasciva, tenetque grata

Compede vinctum.

Terret ambustus Phaethon avaras

25

Spes; & exemplum grave præbet ales

Pegasus, terrenum equitem gravatus

Bellerophontem,

Semper ut te digna sequare; &, ultra

Quam licet sperare, nefas putando,

30

Disparem vites. Age, jam meorum

Finis amorum,

(Non enim posthac alia calebo

Femina) condiscere modos, amanda

Voce quos reddas: minuuntur atræ

35

Carminæ curæ.





AD VIRGILIUM.

O D E XII.

Illum ad cœnam vocat, descripto veris adventu.

JAM veris comites, quæ mare temperant,
 Impellunt animæ lintea Thraciæ (33):
 Jam nec prata rigent, nec fluvii strepunt
 Hiberna nive turgidi.
 Nidum ponit, Ityn flebiliter gemens, 9
 Infelix avis, & Cecropiæ domus
 Æternum opprobrium, quod male barbaras
 Regum est ultra libidines.
 Dicunt in tenero gramine pinguium
 Custodes ovium carmina fistula; 10
 Delectantque (a) Deum, cui pecus, & nigri
 Colles Arcadiæ placent.
 Adduxere sitim tempora, Virgili:
 Sed pressum Calibus ducere Liberum
 Si gestis, juvenum nobilium cliens, 15
 Nardo vina merebere.
 Nardi parvus onyx (34) eliciet cadum,

(a) delectante *Bemb.*

Qui nunc Sulpiciis adcubat horreis,
Spes donare novas largus, amaraque
Curarum eluere efficax.

20

Ad quæ si properas gaudia, cum tua
Velox merce veni: non ego te meis
Immunem meditor tingere poculis,
Plena dives ut in domo.

Verum pone moras, & studium lucri;
Nigrorumque memor, dum licet, ignium,
Misce stultitiam consiliis brevem.

25

Dulce est desipere in loco.



IN LYCEN VETULAM.

ODE XIII.

*Insultat ei mordacissime, quod jam anus fiat, &
libidine flagrans contemnatur a juvenibus.*

AUdivere, Lyce, Dî mea vota, Dî
Audivere, Lyce: sis anus, & tamen
Vis formosa videri,

Ludisque & bibis impudens,
Et cantu tremulo pota Cupidinem
Lentum sollicitas. Ille virentis, &

5

Doctæ psallere Chiæ

Pulchris excubat in genis.

Importunus enim transvolat aridas

Quercus, & refugit te, quia luridi

Dentes, te quia rugæ

Turpant, & capitis nives.

Nec Coæ (35) referunt jam tibi purpuræ,

Nec clari (a) lapides tempora, quæ semel

Notis condita fastis

Inclisit volucris dies.

Quo fugit Venus? heu! quove color? decens

Quo motus? quid habes illius, illius,

Quæ spirabat amores,

Quæ me surpuerat mihi (36),

Felix post Cynaram, notaque & artium

Gratarum facies? sed Cynaræ breves

Annos fata dederunt,

Servatura diu parem

Cornicis vetulæ (37) temporibus Lycen:

Possent ut juvenes visere fervidi,

Multo non sine risu,

Dilapsam in cineres facem.

(a) cari antiquiss. Cruquii.



AD AUGUSTUM.

ODE XIV.

Drus! de Vindelicis, ac præsertim Tiberii de Rhætis viâorias, Augusti auspiciis ac felicitati adscribit.

QUÆ cura patrum, quæve Quiritium,
Plenis honorum muneribus tuas,

Auguste, virtutes in ævum

Per titulos memoresque fastos (38)

Æternæ? O, qua sol habitabiles

5.

Illustrat oras, maxime principum,

Quem legis expertes Latinæ

Vindelici didicere nuper

Quid Marte posses: milite nam tuo

Drusus Genaunos, implacidum genus,

10

Breunosque (a) veloces, & arces

Alpibus impositas tremendis

Dejecit acer plus vice simplici.

Major Neronum mox grave prælium

Commisit, immanesque Rhætos

15

Auspiciis pepulit secundis,

(a) alii Brencos, alii Brennos, alii Breucos.

Speſtandus in certamine Martio,
Devota (39) morti peſſora liberae

Quantis fatigaret ruinis:

Indomitas prope qualis undas 20
Exercet Auster, Pleiadum choro
Scindente nubes; impiger hostium
Vexare turmas, & frementem

Mittere equum medios per ignes.
Sic tauriformis (40) volvitur Aufidus, 25
Qui regna Dauni præfluit Appuli,
Quum sævit, horrendamque cultis

Diluviem meditatur (a) agris:
Ut barbatorum Claudius agmina
Ferrata vasto diruit impetu; 30

Primosque & extremos metendo,
Stravit humum sine clade victor,
Te copias, te consilium, & tuos
Præbente Divos. Nam tibi, quo die
Portus Alexandria supplex 35

Et vacuam patefecit aulam,
Fortuna lustrò prospera tertio
Belli secundos reddidit exitus,
Laudemque & optatum peractis
Imperiis decus adrogavit. 40
Te Cantaber non ante domabilis,

(a) minuitur in MSS. ante Lambin.

Medusque, & Indus, te profugus Scythes

Miratur, o tutela præsens

Italiæ, dominæque (41) Romæ!

Te, fontium qui celat origines, 45

Nilusque, & Ister, te rapidus Tigris,

Te belluosus qui remotis

Obstrepit Oceanus Britannis:

Te non paventis funera Galliæ,

Duræque tellus audit Iberiæ: 50

Te cæde gaudentes Sicambri

Compositis venerantur armis.



AUGUSTI LAUDES.

ODE XV.

PHæbus volentem prælia me loqui,

Victas & urbes, increpuit lyra,

Ne parva Tyrrenum per æquor

Vela darem. Tua, Cæsar, ætas

Fruges & agris rettulit uberes; 5

Et signa nostro restituit Jovi,

Derepta Parthorum superbis

Postibus; & vacuum duellis

Janum Quirini (42) clausit; & ordinem

Rectum evāganti (a) frena licentiæ 10
 Injecit, emovitque (b) culpas,
 Et veteres revocavit artes,
 Per quas Latinum nomen, & Italæ
 Crevere vires, famaue, & imperi
 Porrecta majestas ad ortum 15
 Solis ab Hesperio cubili.
 Custode rerum Cæsare, non furor
 Civilis, aut vis eximet (c) otium;
 Non ira, quæ procudit enses,
 Et miseras inimicat urbes. 20
 Non, qui profundum Danubium bibunt,
 Edicta rumpent Julia (43), non Getæ,
 Non Seres, infidive Persæ (44),
 Non Tanain prope flumen orti.
 Nosque & profestis lucibus, & sacris, 25
 Inter jocosī munera Liberi,
 Cum prole, matronisque nostris,
 Rite Deos prius adprecāti,
 Virtute functos, more patrum (45), duces,
 Lydis remisto carmine tibiis (46), 30
 Trojamque, & Anchisen, & almæ
 Progeniem Veneris (47) canemus.

(a) & vaganti *vulgo*.

(b) amovitque *recentiores*.

(c) exiget *Lambin. Cruq. Porphirio*.



Q. HORATII FLACCI
E P O D O N
LIBER.

AD MÆCENATEM,
ODE I.

Ei ad bellum Altiacum. profecturo comitem se offert.

IBis Liburnis inter alta navium,
Amice, propugnacula (1),
Paratus omne Cæsaris periculum
Subire, Mæcenas, tuo.
Quid nos? quibus te vita sit (a) superstitute
Jucunda; si contra, gravis?
Utrumne jussi persequemur otium

(a) si *Palm. & Torrent.*

Non dulce, ni tecum simul?

An hunc laborem mente laturi, decet

Qua ferre non molles viros?

10

Feremus: & te vel per Alpium juga,

Inhospitalem & Caucasum,

Vel Occidentis usque ad ultimum sinum,

Forti sequemur pectore.

Roges, tuum labore quid juvem meo,

15

Imbellis (2), ac firmus parum?

Comes minore sum futurus in metu,

Qui major absentes habet:

Ut adsidens implumibus pullis avis (3)

Serpentium adlapsus timet,

20

Magis relictis; non, ut adsit, auxili

Latura plus præsentibus.

Libenter hoc & omne militabitur

Bellum in tuæ spem gratiæ:

Non ut juvencis illigata pluribus

25

Aratra nitantur meis (a),

Pecusve Calabris ante, sidus fervidum

Lucana mutet pascua (b);

Nec ut superni villa candens Tusculi

Circæa tangat moenia.

30

Satis superque me benignitas tua

Ditavit. Haud paravero,

(a) alligata-nequantur *quidam MSS. Torr. mea cod. Canteri.*

(b) pascuis *vulgo.*

Quod

Quod aut avarus, ut Chremes, terra premam,
Discinſus aut perdam ut nepos.



VITÆ RUSTICÆ LAUDES.

ODE II.

BEatus ille, qui procul negotiis,
 Ut prisca gens mortalium,
 Paterna rura bobus exercet suis,
 Solutus omni fœnore:
 Neque excitatur classico miles truci, 5
 Neque horret iratum mare;
 Forumque vitat, & superba civium
 : Potentiorum limina.
 Ergo aut adulta vitium propagine
 Altas maritat populos, 10
 Inutilesque falce ramos amputans,
 Feliciores inserit;
 Aut in reduſta valle mugientium
 Proſpectat errantes greges;
 Aut preſſa puris mella condit amphoris; 15
 Aut tondet infirmas oves;

Q. Horat. T. I.

M

Vel, quum decorum mitibus pomis caput
 Autumnus arvis extulit,
 Ut gaudet insitiva decerpens pira,
 Certantem & uvam purpuræ, 20
 Qua muneretur te, Priape, & te, pater
 Silvane, tutor finium!
 Libet jacere modo sub antiqua ilice,
 Modo in tenaci gramine.
 Labuntur altis interim ripis (a) aquæ; 25
 Queruntur (4) in silvis aves;
 Fontesque lymphis obstrepunt manantibus,
 Somnos quod invitet leves.
 At quum tonantis annus hibernus Jovis
 Imbres nivesque comparat, 30
 Aut trudit acres hinc & hinc multa cane
 Apros in obstantes plagas,
 Aut amite (5) levī rara tendit retia,
 Turdis edacibus dolos,
 Pavidumque leporem, & advenam laqueo gruem, 35
 Jucunda captat præmia.
 Quis non malarum, quas amor curas habet,
 Hæc inter obliviscitur?
 Quod si pudica mulier in partem juvet (b)
 Domum, atque dulces liberos, 40

(a) rivis multi.

(b) juvens Turnebis male.

(Sabina qualis, aut perusta solibus

Pernicis uxor Appuli)

Sacrum vetustis extruat lignis focum (6),

Lassi sub adventum viri;

Claudensque textis cratibus lætum pecus,

45

Distenta siccet ubera;

Et horna dulci vina promens dolio,

Dapes inemtis adparet;

Non me Lucrina (7) juverint conchyliis,

Magisve rhombus, aut scari (8),

50

Si quos Eois intonata fluctibus

Hiems ad hoc vertat mare:

Non Afra avis (9) descendat in ventrem meum,

Non attagen (10) Ionicus

Jucundior, quam lecta de pinguisimis

55

Oliva ramis arborum,

Aut herba lapathi prata amantis, & gravi

Malvæ salubres corpori,

Vel agna festis cæsa Terminalibus (11),

Vel hædus ereptus lupo.

60

Has inter epulas, ut juvat pastas oves

Videre properantes domum!

Videre fessos vomerem inversum boves

Collo trahentes languido,

Positosque vernas, ditis examen domûs,

65

Circum renidentes Lares!

Hæc ubi loquutus scænerator Alphius,

Jamjam futurus rusticus,
 Omnem relegit (a) Idibus pecuniam;
 Quærit Kalendis ponere.

79



AD MÆCENATEM,

ODE III.

Allii detestatio.

Parentis olim si quis impia manu
 Senile guttur fregerit,
 Edit (b) cicutis allium nocentius.
 O dura messorum ilia!
 Quid (c) hoc veneni sævit in præcordiis?
 Num viperinus his cruor
 Incoctus herbis me fefellit? an malas
 Canidia tractavit dapes?
 Ut, Argonautas præter omnes, candidum
 Medea mirata est ducem,
 Ignota tauris illigaturum juga,
 Perunxit hoc Iasonem;

10

(a) redegit Cruquius & Torr.

(b) edit *meliores*. edat vulgo.

(c) queis Scaliger-Rutgers.

Hoc delibutis ulta donis pellicem,

Serpente fugit alite.

Nec tantus unquam siderum insedit vapor

15

Siticulosæ Apuliæ;

Nec munus humeris efficacis Herculis

Inarsit æstuosius.

At, si quid unquam tale concupiveris,

Jocose Mæcenas, precor,

20

Manum puella suavio opponat tuo,

Extrema & in sponda eubet.

AD VOLTEJUM MENAM POMPEJI MAGNI LIBERTUM.

O D E IV.

In ejus, ex mutata conditione, arrogantiam invehitur.

LUpis & agnis quanta sortitò obtigit,

Tecum mihi discordia est,

Iberiois peruste funibus latus,

Et crura dura compede.

Licet superbus ambules pecunia,

9

Fortuna non mutat genus.

Videsne, sacram metiente te viam

Cum bis ter ulnarum toga,

M 3

Ut ora vertat huc & huc euntium

Liberrima indignatio?

10

Sectus flagellis hic triumphalibus,

Præconis ad fastidium,

Arat Falerni mille fundi jugera,

Et Appiam mannis terit;

Sedilibusque magnus in primis eques,

15

Othone contempto, sedet.

Quid addinet tot ora navium gravi

Rostrata duci pondere

Contra latrones, atque servilem manum (12),

Hoc, hoc tribuno militum?

20



IN CANIDIAM VENEVICAM.

ODE V.

Pueri in Canidiam veneficam diræ.

AT o Deorum quidquid in cœlo regit (a)

Terras & humanum genus,

Quid iste fert tumultus? & quid omnium

Vultus in unum me truces?

(a) regis *Ascens. Torrent.*

Per liberos te, si vocata partibus	5
Lucina veris adfuit,	
Per hoc inane purpuræ decus precor,	
Per improbaturum hæc Jovem,	
Quid ut noverca me intueris, aut uti	
Petita ferro bellua?	10
Ut hæc trementi questus ore, constitit	
Insignibus (13) raptis puer,	
Impube corpus, quale posset impia	
Mollire Thracum pectora;	
Canidia brevibus implicata viperis	15
Crines & incomtum caput,	
Jubet sepulcris caprificos (14) erutas,	
Jubet cupressus funebres,	
Et uncta (15) turpis ova ranæ sanguine,	
Plumamque nocturnæ strigis,	20
Herbasque, quas Iolcos (a) atque Iberia	
Mittit, venenorum ferax,	
Et ossa ab ore rapta jejunæ canis,	
Flammis aduri Colchicis.	
At expedita Sagana per totam domum	25
Spargens Avernales aquas,	
Horret capillis, ut marinus, asperis,	
Echinus, aut currens aper.	
Abacta nulla Veia conscientia,	

(a) & Colchos *Acron* & *plurim.*

Ligonibus duris humum 30
 Exhaustiebat, ingemens laboribus,
 Quo posset infossus puer
 Longo die bis terve mutatae dapis
 Inemori spectaculo;
 Quum promineret ore, quantum extant aqua 35
 Suspensa mento corpora:
 Exsucta (a) uti medulla, & aridum jecur,
 Amoris esset poculum,
 Interminato quum semel fixæ cibo
 Intabuissent populæ. 40
 Non defuisse masculæ libidinis
 Ariminensem Foliam,
 Et otiosa credidit Neapolis,
 Et omne vicinum oppidum:
 Quæ sidera excantata voce Thessala, 45
 Lunamque cælo deripit (16).
 Hic irresectum sæva dente livido
 Canidia rodens pollicem,
 Quid dixit? aut quid tacuit? O rebus meis
 Non infideles arbitrae, 50
 Nox, & Diana, quæ silentium regis,
 Arcana quum sunt sacra,
 Nunc, nunc adeste: nunc in hostiles domos
 Iram atque numen vertite.

(a) exsecta plerique, exerta vulgo.

Formidolosis (a) dum latent silvis feræ, 55

Dulci sopore languidæ,

Senem (quod omnes rideant) adulterum

Latrent Suburanæ canes,

Nardo perunctum, quale non perfectius

Meæ laborarint (b) manus. 60

Quid accidit? cur dira barbaræ minus

Venena Medæ valent,

Quibus superbam (c) fugit ulta pellicem,

Magni Creontis filiam,

Quum palla, tabo munus imbutum, novam 65

Incendio nuptam abstulit?

Atqui nec herba, nec latens in asperis

Radix fefellit me locis.

Indormit unctis omnium cubilibus

Oblivione pellicum. 70

Ah, ah, solutus ambulat veneficæ

Scientioris carmine.

Non usitatis, Vare, potionibus

(O multa fleturum caput!)

Ad me recurre: nec vocata mens tua 75

Marsis redibit vocibus.

Majus parabo, majus infundam tibi

Fastidienti poculum.

(a) formidolosæ *vulgare*.

(b) laborarunt *multi MSS.*

(c) superba *multi e vulgatis*.

- Priusque cœlum sidet inferius mari,
 Tellure porrecta super, 80
 Quam non amore sic meo flagres, uti
 Bitumen atris ignibus.
 Sub hæc puer, jam non, ut ante, mollibus
 Lenire verbis impias;
 Sed dubius unde rumperet silentium, 85
 Misit Thyesteas preces.
 Venena, magnum fas nefasque, non valent
 Convertere humanam vicem.
 Diris agam vos : dira detestatio
 Nulla expiatur victima. 90
 Quin, ubi perire jussus expiravero,
 Nocturnus occurram furor;
 Petamque vultus umbra curvis unguibus;
 (Quæ vis Deorum est Manium)
 Et inquietis adsidens præcordiis, 95
 Pavore somnos auferam.
 Vos turba viciatim hinc & hinc saxis petens
 Contundet obscœnas anus.
 Post insepulta membra different lupi,
 Et Esquilinæ alites: 100
 Neque hoc parentes, (heu mihi superstites!)
 Effugerit spectaculum.



IN CASSIUM SEVERUM.

ODE VI.

Maledico minatur ultionem.

Quid immerentes hospites vexas, canis
 Ignavus adversum lupos?
 Quin huc inanes, si potes, vertis (a) minas,
 Et me remorsurum petis?
 Nam, qualis aut Molossus, aut fulvus Lacon, 5
 (Amica vis pastoribus)
 Agam per altas aure sublata nives,
 Quæcunque præcedet fera.
 Tu quum timenda voce complesti nemus,
 Projectum odoraris cibum. 10
 Cave, cave: namque in malos asperrimus
 Parata tollo cornua;
 Qualis Lycambæ spretus infido gener,
 Aut acer hostis Bupalò.
 An, si quis atro dente me petiverit, 15
 Inultus ut flebo puer?

(a) vette *Ascens. & Cruq.*



AD POPULUM ROMANUM.

ODE VII.

Detestatio bellorum civilium.

QUO, quo scelesti tuitis? aut cur dexteris
Aptantur enses conditi?

Parumne campis, atque Neptuno super

Fusum est Latini sanguinis?

Non ut superbas invidæ Carthaginis

Romanus arcæ ureret,

Intactus aut Britannus ut descenderet (17)

Sacra catenatus via;

Sed ut, secundum vota Parthorum, sua

Urbs hæc periret dextera.

Neque hic lupis mos, nec fuit leonibus

Unquam, nisi in dispar, feris (a).

Furorne cæcus (b), an rapit vis acrior?


An culpa? responsum date.

(a) genus *plures* Lambin.

(b) cæcos, duo MSS. Torrent.

Tacent: & ora pallor albus inficit,
 Mentisque percussæ stupent.
 Sic est: acerba fata Romanos agunt,
 Scelusque fraternæ necis;
 Ut immerentis fluxit in terram Remi
 Sacer nepotibus cruor.

10



IN ANUM LIBIDINOSAM.

O D E VIII.

ROgare longo putidam te sæculo,
 Vires quid (a) enervet meas?
 Quum sit tibi dens ater, & rugis vetus
 Frontem senectus exaret,
 Hietque turpis inter aridas nates
 Podex, velut crudæ bovis.
 Sed incitat me pectus, & mammæ putres,
 Equina quales ubera;
 Venterque mollis, & femur tumentibus
 Exile suris additum.
 Esto beata: funus atque imagines
 Ducant triumphales tuum;

(a) quod quatuor codd. Torrent. & Porpbir.

Nec sit marita, quæ rotundioribus

Onusta baccis ambulet.

Quid? quod libelli Stoici inter sericos

15

Jacere pulvillos amant?

Illiterati num minus nervi rigent?

Minusve languet fascinum?

Quod ut superbo provoces ab inguine,

Ore laborandum est tibi.

20



AD MÆCENATEM.

ODE IX.

Æliacæ victoriæ primordia celebrat.

QUando repostum Cæcubum ad festas dapes,
Victore lætus Cæsare,

Tecum sub alta (sic Jovi gratum) domo,

Beate Mæcenas, bibam,

Sonante mistum tibiis carmen lyra,

5

Hac Dorium, illis barbarum?

Ut nuper, actus quum freto (18) Neptunius

Dux (19) fugit ustis navibus,

Minatus urbi vincla, quæ detraxerat

Servis amicus perfidis.

10

Romanus (cheu posteri negabitis)
 Emancipatus feminæ,
 Fert vallum & arma miles, & spadonibus
 Servire rugosis potest;
 Interque signa, turpe, militaria 15
 Sol adspicit conopeum.
 Ad hunc (a) frementes verterunt bis mille equos
 Galli canentes Cæsarem;
 Hostiliumque navium portu latent
 Puppes sinistrorsum citæ (b). 20
 Io triumphe, tu moraris aureos
 Currus, & intactas boves.
 Io triumphe, nec Jugurthino parem
 Bello reportasti ducem,
 Neque Africano, cui super Carthagiæm 25
 Virtus sepulcrum condidit (20).
 Terra marique victus hostis, Punico
 Lugubre mutavit sagum (21).
 Aut ille centum nobilem Cretam urbibus
 Ventis iturus non suis (22), 30
 Exercitatus aut petit Syrtes Noto,
 Aut fertur incerto mari.
 Capaciores adfer huc, puer, scyphos,
 Et Chia vina, aut Lesbia;
 Vel, quod fluentem nauseam coerceat, 35

(a) at huc duo MSS. Cruq. & Pulm.

(b) citæ plures e vulgatis.

Metire nobis Cæcubum.

Curam metumque Cæsaris rerum juvat

Dulci Lyæo solvere.



IN MÆVIUM POETAM.

O D E X.

Tempestatem & naufragium ei imprecatur.

MAla soluta navis exit alite,
 Ferens olentem Mævium.
 Ut horridis utrumque verberes latus,
 Auster, memento fluctibus.
 Niger rudentes Eurus, inverso mari, 5
 Fractosque remos differat.
 Insurgat Aquilo, quantus altis montibus
 Frangit trementes ilices.
 Nec sidus atra nocte amicum adpareat,
 Qua tristis Orion cadit: 10
 Quietiore nec feratur æquore,
 Quam Graja victorum manus,
 Quum Pallas usto vertit iram ab Illo
 In impiam Ajacis ratem.
 O quantus instat navitis sudor tuis 15
 Tibique pallor luteus,

Et


Et illa non virilis ejulatio,
 Preces & aversum ad Jovem;
 Ionius udo quum remugiens sinus
 Noto carinam ruperit.

Opima quod si præda curvo litore

Porrecta mergos juveris (a);

Libidinosus immolabitur caper,

Et agna tempestatibus.



AD PETTIUM.

ODE XL

*Se amore captum non posse ad versus faciendos
 operam & studium conferre.*

PETTI, nihil me, sicut antea, juvat

Scribere versiculos,

Amore perculsum gravi:

Amore, qui me, præter omnes, expetit

Mollibus in pueris,

Aut in puellis urere.

Hic tertius Decembris, ex quo destiti

Inachia furere,

Silvis honorem decutit.

(a) juverit ante Lambin.

Q. Horat. T. I.

N

Heu me, per urbem (nam pudet tanti mali) 10

Fabula quanta fui!

Conviviorum (23) & pœnitet,

In queis amantem & languor & silentium

Arguit, & latere

Petitus imo spiritus. 15

Contrane (a) lucrum nil valere candidum

Pauperis ingenium

Querebar, adplorans tibi;

Simul calentis inverecundus Deus

Fervidiore mero 20

Arcana promorat loco.

Quod si meis inæstuet præcordiis

Libera bilis, ut hæc

Ingrata ventis dividat

Fomenta, vulnus nil malum levantis; 25

Desinet imparibus

Certare summotus pudor.

Ubi hæc severus te palam laudaveram,

Jussus abire domum,

Ferebar incerto pede 30

Ad non amicos (heu) mihi postor, & (heu)

Limina dura, quibus

Lumbos & infregi latus.

Nunc, gloriantis quamlibet mulierculam

(a) contraque vulgar. lect.

Vincere mollitia,

35

Amor Lycisci me tenet;

Unde expedire non amicorum queant

Libera consilia,

Nec contumeliæ graves;

Sed alius ardor, aut puellæ candidæ,

40

Aut teretis pueri,

Longam renodantis comam.

IN ANUM LIBIDINOSAM.

O D E XII.

Invehitur in eam, quæ illius amores ambiabat.

Quid tibi vis, mulier nigris dignissima barris?
Munera cur mihi, quidve tabellas

Mittis, nec firmo juveni, neque naris obesæ?

Namque sagacius unus odoror,

Polypus, an gravis hirsutis cubet hircus in alis, 5

Quam canis acer, ubi lateat sus.

Quis sudor vietis, & quam malus undique membris

Crescit odor! quum pene soluto

Indomitam properat rabiem sedare; nec illi

Jam manet humida creta, colorque

10

Stercore fucatus crocodili; jamque subando

Tenta, cubilia, testaque rumpit:

Vel mea quum sævis agitat fastidia verbis,

Inachia langues minus, ac me:

Inachiam ter nocte potes; mihi semper ad unum 15

Mollis opus. Pereat malo, quæ te

Lesbia, quærenti taurum, monstravit inertem;

Quum mihi Cous adesset Amyntas,

Cujus in indomito constantior inguine nervus,

Quam nova collibus arbor inhæret, 20

Muricibus Tyriis iteratæ vellera lanæ

Cui properabantur? tibi nempe:

Ne foret æquales inter conviva, magis quem


Diligeret mulier sua, quam te.

O ego non felix (a), quam tu fugis, ut pavet acres 25

Agna lupos, capreæque leones.

(a) infelix *Carissus*.





AD AMICOS.

ODE XIII.

*Vitæ molestias vino, cantu, & amicorum alloquiis
esse mitigandas.*

Horrida tempestas cælum contraxit, & imbres
Nivesque deducunt Jovem. Nunc mare, nunc siluæ
Threicio Aquilone sonant. Rapiamus amici
Occasionem de die: dumque virent genua,
Et decet, obducta solvatur fronte senectus.
Tu vina Torquato move consule pressa meo.
Cetera mitte loqui. Deus hæc fortasse benigna
Reducet in sedem vice. Nunc & Achæmonia
Perfundi nardo juvat, & fide Cyllenea
Levare diris pectora sollicitudinibus:
Nobilis ut grandi cecinit Centaurus alumno,
Invictæ mortalis, Dea nate puer Thetide,
Te manet Assaraci tellus, quam frigida parvi
Findunt Scamandri flumina, lubricus & Simois;
Unde tibi reditum certo subtemine (a) Parcæ
Rupere: nec mater domum cærule te revehet.
Illic omne malum vino cantuque levato,
Deformis ægrimoniæ dulcibus adloquiis.

(a) sub stamine *Estib.*



AD MÆCENATEM.

O D E XIV.

Phrynes amorem obstare, quominus Iambos promissos absolvat.

Mollis inertia cur tantam diffuderit imis
 Oblivionem sensibus,
 Pocula Lethæos ut si ducentia somnos
 Arente fauce traxerim,
 Candide Mæcenas, occidis sæpe rogando. 5
 Deus, Deus nam me vetat
 Inceptos, olim promissum carmen, Iambos
 Ad umbilicum adducere (14).
 Non aliter Samio dicunt arsisse Bathyllo
 Anacreonta Teium; 10
 Qui persæpe cava testudine flevit amorem,
 Non elaboratum ad pedem.
 Ureris ipse miser. Quod si non pulchrior ignis
 Accendit obsessam Ilion,
 Gaude sorte tua: me libertina, neque uno 15
 Contenta, Phryne macerat.



AD NEÆRAM.

ODE XV.

Non servatam ab ea spem conqueritur.

NOX erat, & cœlo fulgebat Luna sereno
 Inter minora sidera,
 Quum tu, magnorum numen læsura Deorum,
 In verba jurabas mea,
 Ardius atque edera procera adstringitur illex, 5
 Lentis adhærens brachiis:
 Dum pecori lupo, & nautis infestus Orion
 Turbaret hibernum mare,
 Intonsosque agitare Apollinis aura capillos,
 Fore hunc amorem mutuum. 10
O dolitura mea multum virtute, Neæra!
 Nam si quid in Flacco viri est,
 Non feret adsiduas potiori te dare noctes,
 Et quæret iratus parem.
 Nec semel offensæ cedit constantia formæ, 15
 Si certus intrarit dolor.
 At tu, quicumque es felicior, atque meo nunc
 Superbus incedis malo,
 Sis pecore & multa dives tellure licebit,
 Tibique Pactolus fluat, 20

Nec te Pythagoræ fallant arcana renati,
 Formaue vincas Nirea;
 Eheu (a), translatos alio mœrebis amores:
 Ast ego vicissim risero.



AD POPULUM ROMANUM.

ODE XVI.

Queritur bellorum civilium nullum esse finem.

ALtera jam teritur bellis civilibus ætas,
 Suis & ipsa Roma viribus ruit.
 Quam neque finitimi valuerunt perdere Marsi (25),
 Minacis aut Etrusca Porsenæ manus,
 Æmula (26) nec virtus Capuæ, nec Spartacus acer, 5
 Novisque rebus infidelis Allobrox (27);
 Nec fera cærulea domuit Germania pube,
 Parentibusque abominatus Annibal;
 Impia perdemus devoti (28) sanguinis ætas,
 Ferisque rursus occupabitur solum. 10
 Barbarus, heu, cineres insistet victor, & urbem
 Eques (29) sonante verberabit ungula;

(a) Heu, Heu, in MSS. aliis.

Quæque carent ventis & solibus, ossa Quirini (30)
 (Nefas videre) (a) dissipabit insolens.

Forte, quid expediat (b), communiter, aut melior
 pars 15

Malis carere quæritis laboribus.
 Nulla sit hæc potior sententia: (Phocæorum

Velut profugit exsecrata civitas,
 Agros atque Lares patrios (c), habitandaque fana
 Apris reliquit & rapacibus lupis) 20

Ire, pedes quocumque ferent, quocumque per undas
 Notus vocabit, aut protervus Africanus.

Sic placet? an melius quis habet suadere? secunda
 Ratem occupare, quid moramur alite?

Sed juremus in hæc: simul imis saxa renarint 25
 Vadis levata, ne redire sit nefas;

Neu conversa domum pigeat dare lintea, quando
 Padus Matina laverit cacumina;

In mare seu celsus procurrerit Apenninus,
 Novaque monstra junxerit libidine 30

Mirus amor; juvet ut tigres subsidere cervis,
 Adulteretur & columba milvio;

Credula nec flavos (d) timeant armenta leones,
 Ametque salsa levis hircus æquora.

Hæc, & quæ poterunt reditus abscindere dulces, 35

(a) videri *multi* MSS.
 (b) (quod expediat) *Rutgersius*.
 (c) proprios *Muret. ed.*
 (d) fulvos *Lamb. sævos, rivos alii.*

Eamus omnis execrata civitas,
 Aut pars indocili melior grege: mollis & expes
 Inominata perprimat cubilia.
 Vos, quibus est virtus, muliebrem tollite luctum,
 Etrusca præter & volate litora. 40
 Nos manet Oceanus circumvagus: arva, beata
 Petamus arva, divites & insulas,
 Reddit ubi Cererem tellus inarata quotannis,
 Et imputata floret usque vinea;
 Germinat & nunquam fallentis termes olivæ, 45
 Suamque pulla ficus ornat arborem;
 Mella cava manant ex ilice; montibus altis
 Levis crepante lympha desilit pede.
 Illic injussæ veniunt ad mulctra capellæ,
 Refertque tenta grex amicus ubera; 50
 Nec vespertinus circumgemit ursus ovile,
 Nec intumescit alta viperis humus.
 Pluraque felices mirabimur: ut neque largis
 Aquosus Eurus arva radat imbribus,
 Pinguis nec siccis urantur semina glebis; 55
 Utrumque rege temperante cœlitum.
 Non huc Argoo contendit remige pinus,
 Neque impudica Colchis intulit pedem:
 Non huc Sidonii torserunt cornua (31) nautæ,
 Laboriosa nec cohors Ulysei: 60
 Nulla nocent (32) pecori contagia; nullius astri
 Gregem æstiosa torret impotentia.

Jupiter illa piæ secrevit (a) litora genti,

Ut inquinavit ære tempus aureum:

Ære, dehinc ferro duravit sæcula, quorum 65

Piis secunda, vate me, datur fuga.



AD CANIDIAM.

O D E XVII.

Horatius veniam ab ea ironice petit.

JAM jam efficaci do manus scientiæ,
 Supplex & oro regna per Proserpiæ,
 Per & Dianæ non movenda numina,
 Per atque libros carminum valentium
 Refixa (b) cælo devocare sidera, 5
 Canidia, parce vocibus tandem sacris,
 Citumque retro solve, solve turbinem.
 Movit nepotem Telephus Nereium,
 In quem superbus ordinarat agmina
 Mysorum, & in quem tela acuta torserat, 10
 Unxere (c) matres Iliæ addictum feris

(a) sacravit *duo Torrent.*

(b) defixa *vulgar. lect.*

(c) luxere *Lamb. & alii.*

Alitibus, atque canibus homicidam Hectorem,
 Postquam reliâis mœnibus rex procidit
 (Heu) pervicacis ad pedes Achillei.
 Setosa duris exuere pellibus.
 Laboriosi remiges Ulyssei,
 Volente Circe, membra: tunc mens & sonus
 Relapsus, atque notus in vultus honor.
 Dedi satis superque pœnarum tibi,
 Amata nautis multum & institoribus.
 Fugit juvenas, & verecundus color
 Reliquit ossa pelle amicta lurida.
 Tuis capillus albus est odoribus,
 Nullum a labore me reclinat otium.
 Urget diem nox, & dies noctem; neque est
 Levare tenta spiritu præcordia.
 Ergo negatum vincor ut credam miser,
 Sabella pectus increpare carmina (33),
 Caputque Marsa dissilire nænia.
 Quid amplius vis? o mare & terra! ardeo,
 Quantum neque atro delibutus Hercules
 Nessi cruore, nec Sicana fervida
 Virens (a) in Ætna flamma. Tu, donec cinis
 Injuriis aridus ventis ferar,
 Cales venenis officina Colchicis.
 Quæ finis? aut quod me manet stipendium?
 Effare: jussas cum fide pœnas luam,

(a) vibrans Lamb. in 1. edit.

Paratus expiare, seu poposceris
 Centum juvencos, sive mendaci lyra
 Voles sonari: tu pudica, tu proba 40
 Perambulabis astra sidus aureum.
 Infamis Hêlenæ (34) Castor offensus vice,
 Fraterque magni Castoris, victi prece,
 Adempta vati reddidere lumina.
 Et tu (potes nam) solve me dementia, 45
 O nec paternis obsoleta sordibus (35),
 Nec in sepulcris pauperum (36) prudens anus
 Novendiales dissipare pulveres (37).
 Tibi hospitale pectus, & puræ manus;
 Tuusque venter Partumejus (a); & tuo 50
 Cruore rubros obstetrix pânno lavit,
 Utcunque fortis exsilis puerpera.

CANIDIÆ RESPONSIO.

Quid obseratis auribus fundis preces?
 Non saxa nudis surdiora navitis
 Neptunus alto tundit hibernus salo. 55
 Inultus ut tu riseris Cocyttia (b)
 Vulgata, sacrum (c) liberi Cupidinis?
 Et Esquilini (38) Pontifex veneficâ

(a) Partumeus *cod. Petr.*

(b) Cocyttia *ante Lambin.*

(c) sacra *Petr.*

Impune ut urbem nomine impleris meo?
 Quid proderit ditasse Pelignas (39) anus, 60
 Velociusve miscuisse toxicum,
 Si (a) tardiora fata te votis manent?
 Ingrata misero vita ducenda est, in hoc,
 Novis ut usque suppetas doloribus (b).
 Optat quietem Pelopis infidus (c) pater, 65
 Egens benignæ Tantalus semper dapis:
 Optat Prometheus obligatus aliti:
 Optat supremo collocare Sisyphus
 In monte saxum; sed vetant leges Jovis.
 Voles modo altis desilire turribus, 70
 Modo ense pectus Norico recludere;
 Frustraque vincla gutturi innectes (d) tuo,
 Fastidiosa tristis ægrimonia.
 Vectabor humeris tunc ego inimicis eques,
 Mæque terra cedit insolentiæ. 75
 An, quæ movere cereas imagines (40),
 Ut ipse nosti curiosus, & polæ
 Deripere lunam vocibus possum meis,
 Possum crematos excitare mortuos,
 Desideri que temperare poculum, 80
 Plorem artis in te nil habentis (e) exitum?

(a) sed sine nota interrogat. alii.

(b) laboribus quid. Lamb.

(c) infidi in aliis MSS.

(d) nectes duo Cruq.

(e) nil habentis Lambin. nil agentis plures MSS.



Q. HORATII FLACCI

CARMEN SÆCULARE

AD APOLLINEM ET DIANAM.

Pro Imperii Romani incolumitate.

PHœbe, silvarumque potens Diana,
 Lucidum cœli decus, o colendi
 Sæmper, & culti, date quæ precamur

Tempore sacro;

Quo Sibyllini monuere versus,
 Virgines lætas, puerosque castos (41),
 Dfs, quibus septem placuere colles,

Dicere carmen.

Alme Sol, curru nitido diem qui
 Promis & celas, aliusque & idem
 Nasceris; possis nihil urbe Roma

Visere majus.

Rite maturos aperire partus
 Lenis Ilithyia, tuere matres;
 Sive tu Lucina probas vocari,
 Seu genitalis (42).

Diva, producas sobolem, patrumque
 Prosperes decreta super jugandis (43)
 Feminis, prolisque novæ feraci

Lege marita (44).

20

Certus undenos (a) decies (45) per annos
 Orbis ut cantus referatque ludos,
 Ter die claro, totiesque grata

Nocte frequentes.

Vosque veraces cecinisse Parcæ,

25

Quod semel dictum est, stabilisque rerum
 Terminus servet (b), bona jam peractis

Jungite fata.

Fertilis frugum, pecorisque tellus

Spicea donet Cererem corona:

30

Nutrient foetus & aquæ salubres,

Et Jovis auræ.

Condito mitis, placidusque telo (46)

Supplices audi pueros Apollo:

Siderum regina bicornis audi

35

Luna puellas.

Roma si vestrum est opus (47), Iliæque

Litus Etruscum tenuere turmæ,

Jussa pars mutare Lares, & urbem

Sospite cursu:

40

Cui

(a) ut denos *edd. Aldi & Muret.*

(b) servat *vulgo.*

Cui per ardentem sine fraude Trojam
 Castus Æneas patriæ superstes
 Liberum munivit iter, daturus
 Plura reliâis.

Dî probos mores docili juventæ, 45

Dî senectuti placidæ quietem;

Romulæ genti date remque prolemque

Et decus omne.

Quique (a) vos bobus veneratur albis

Clarus Anchisæ Venerisque sanguis, 50

Imperet (b) bellante prior, jacentem

Lenis in hostem.

Jam mari terraque manus potentes

Medus, Albanasque (48) timet sæcures:

Jam Scythæ responsa petunt, superbi 55

Nuper & Indi.

Jam fides, & pax, & honor, pudorque

Priscus, & neglecta redire virtus

Audet; adparetque beata pleno

Copia cornu. 60

Augur, & fulgente decorus arcu

Phœbus, acceptusque novem Camœnis,

Qui salutari levat arte fessos

Corporis artus;

(a) quæque *Torrent.*

(b) impetret *Torrent.*

Si Palatinas videt æquus arces (a), 65
 Remque Romanam, Latiumque felix,
 Alterum in lustrum, meliusque semper
 Proroget ævum.

Quæque Aventinum tenet, Algidumque,
 Quindecim Diana preces virorum 70
 Curet, & votis puerorum amicas
 Adplicet aures.

Hæc Jovem sentire, Deosque cunctos
 Spem bonam certamque domum reporto (b),
 Doctus & Phœbi, chorus & Dianæ, 75
 Dicere laudes.

(a) aras Porphir. & quinque Torrent.
 (b) reportet Stephanus in MSS.

FINIS LYRICORUM.

IN LIBRUM PRIMUM

CARMINUM NOTÆ. (*)

- (1) *Præsidium* *decus*. Præsidium, quia Patronus; decus, quia Augusti gratia potens.
- (2) *Curriculo*. Curriculum nunc pro stadio accipiendum, non pro curru; quod nonnulli putant.
- (3) *Ad Deor.* De græcis stadiis loquitur, apud quos ad Deorum fastigium evehi sibi & præconibus suis videbantur certaminum sacrorum victores. G.
- (4) *Tergeminis* . . . *honoribus*. Finitus numerus pro infinito; id est ad multiplices honores extollere & provehere. Neque tamen displicent, qui tergeminos honores volunt esse Ædilitatem, Præturam, & Consulatam. G.
- (5) *Plagas*. Plagæ funes sunt, quibus retia tenduntur, pro-
dente Servio.
- (6) *Barbiton*. Lyra septichordis eburnea. Vet. Schol. *Lesboum* autem ad imitationem Alcæi atque Sapphus.
- (7) *Sic*. Votum indicat, cui velut condicio aut effectus adeo adjectus est felix navigatio Virgilii. G.
- (8) *Audax lapeti genus*. Prometheus, postquam figmentum suum, homines, igne e sole surrepro instruxit, eodem fecit, ut mollitis calidisque cibus ac potionibus, vaporatis item diætis, febres sibi pararent; metallis tractandis mortifera arma in mutuam perniciem pararent &c. G.
- (9) *Machinæ*. Jacobus Cruquius putavit, machinas istas *palangas* fuisse, navium carinis suppositas: crediderim & trochleare machinamentum aliquod fuisse insuper adhibitum.
- (10) *Adamantina*. Adamas non solum de lapide dicitur, verum etiam de durato ferro, ex quo lorice: nempe etymologice ponit pro indomita, impenetrabili. G.
- (11) *Domus Albunea resonantis*. Ipse cataraetes est Anienis, quem incolæ hodie *la Cascata* vocant. Fortasse Albunea Nympha non alia erat quam ipsa *Ilia* Anienis uxor; nomen

(*) *Has Notas & Animadversiones Willielmi Baxteri, Joannis Matthiæ Gesneri, aliorumque excerptimus ex editione Lipsiensi anni 1752.*

- habuit ab Albulæ Anienis fonte. Hanc Lactantius tradit Sybillam fuisse Tiburtinam. Erat etiam Tiburi Albunæ lucus.
- (12) *Ambiguum*. Ambiguam cognominem dixit: erat enim altera Salamis Cypri, quam hodie *Famagustam* vocant.
- (13) *Flavum*. Posuit flavum ut perpetuum epitheton. *Qui in Campo Martio exercebantur, etiam natabant post exercitium, quia & hoc videtur necessarium militiæ esse.* Vet. Schol.
- (14) *Disco*. Discus e ferro fieri solebat, vel ex ligno, vel ex ære, ex lapide vero ut plurimum, loro medio ejus circumdato, quo contorquebatur, & emittebatur. *Postnactum* dicebant certi ponderis discum, quo juvenes in agone contendebant. Vet. Schol. Cruq.
- (15) *Thaliarche*. Magistrum convivii notare videtur: sed potuit etiam certum amicum ita designare. G.
- (16) *Diotæ*. Diotam esse amphoram, quatenus mensuræ id nomen est, non ausim confirmare. *Sabinam* malit dici Torrentius a patria ipsius Diotæ, quam vini; cum vinum *Sabinum vile* vocet iose Poeta innox XX, 1. Sed tamen hoc ipso loco Mæcenati illud promittit. G.
- (17) *Viduus pharetra, risit*. Inter ipsas minas Apollinis Mercurius etiam pharetram illi subduxit, & risum ea re expressit licet irato. *Viduus risit*, græco more, risit se viduum vel privatum, fraude Mercuriali, pharetra sua. Suaviter illa Mercurii furta pinguntur in Hymno in Mercurium Homeric. co. G.
- (18) *Virgaque*. Virgam dicit Caduceum, quod primo Apollo habuit, & donavit Mercurio, lyra sibi tradita. Vet. Schol. Veteres etiam regum sceptris, quæ a Diis ipsis tradita credebant, vim quamdam divinam inesse existimabant: quæ de re Homerus passim.
- (19) *Babylonios . . . numeros*. Dicit Babylonios numeros, quos Cicero alicubi *Chaldaicas rationes*. Babylonii enim astrologiam invenisse traduntur, per quam genesis colligitur. Vet. Schol. B. *Babylonios numeros* intelligere juvat præsertim *ephemeridas*, in quibus cursus, conjunctiones, comparationes planetarum descriptæ ad usum divinandi: quos etiam *Trarylli numeros*, forte cum respectu ad hunc locum, vocat Juvenalis VI, 176. G.
- (20) *Vocalem*. Vocales dicuntur homines summæ vocis. Vet. Schol.
- (21) *Proximos*. Ob usum fulminis atque ægidis, quibus reliqui cælestes non erant armati. B.

- (22) *Parum castis . . . lucis*. Pollutis, secundum Pontificum & Aruspicum documenta, quia dicunt, nunquam fieri fulmina, nisi in lucis pollutione aliqua alienis. Vet. Schol. B. Expiare tales lucos fulmine attactos opus Fratrum Arvalium; de qua re supersunt antiquæ inscriptiones publicatæ a F. Ursino ad Cat. R. R. 141. G.
- (23) *Fletu*. Nereus tamquam vates claram habet eorum quæ prædicat visionem: atque hæc causa suspirii est.
- (24) *Ægida*. Ægis pectoris est munimentum, habens in medio Gorgonis caput. Quod si in pectore numinis fuerit, ægis vocatur: si in hominis pectore, ut in antiquis Imperatorum statuvis videmus, *Torica* dicitur. Servius, adnotante Jacobo Cruquio.
- (25) *Flamma . . . mari*. Solebant veteres, quidquid detestabantur ut prodigia, vel in ignem, vel in aquam projicere. Hinc Nonius Marcellus, prodigium a porro adigere. Torrent.
- (26) *Dindymene*. Dindyma Phrygiæ mons, ubi mater Deûm furiosis cerimoniis colebatur: hinc ipsa *Dindymene*. G.
- (27) *Aratrum*. Condendis atque evertendis civitatibus hæc consuetudo fuit, ut aratro fieret. Vet. Schol.
- (28) *Cyrum*. Non censeo cum Jacobo Cruquio Cyrum istum significare Tyndaridis vitum zelo incitatum; verum turpem illum & publicum adulterum, quem nominat Ode 33.
- (29) *Vare*. Credibile est hunc fuisse Q. Varum Imperatorem, non Poetam Cremonensem; quod tamen in medio relinquitur. B. L. Varum Epicureum, Cæsaris amicum, intelligit Massonius, de quo Quintil. 6, 3, 78. G.
- (30) *Crepate*. Crepate, assidue de re aliqua loqui. Lambin.
- (31) *Hostia*. Aliquando etiam Venus colebatur sanguine, ut ostendit Cruquius contra Servium.
- (32) *Persæ*. *Persæ* proprie dicti ante victoriam Alexandri, & post instauratum ab Artaxerxe A. C. 230 imperium; medio tempore *Parthi* &c. G.
- (33) *Integer vitæ*. Gentiles se inhocentes & Diis caros credebant, si a perjuriis, cædibus, & rapinis immunes essent; reliqua vitia cum Diis ipsis habebant communia.
- (34) *Malusque Jupiter*. Malus Jupiter de cælo, sive aere, ut *hibernus*, *humidus*, *pluvius* apud bonos poetas. G.
- (35) *Rex gelide metuatur ora*. Hoc tempore Phraates a Tiridate ob sævitiam regno pulsus cum ingenti Scytharum exercitu reditum minabatur.
- (36) *Quid Tiridatem terreat*. Hoc unice terrebat Tiridatem, ne Augustus (quod boni omnes verebantur) a partibus suis

non staret: quod, hercules, neque fecit. B. Vid. Justin. I. 42. G.

(37) *Novis*. Novis dixit, quia subiecturus erat *Lesbio plestro*, h. e. Alcæi & Saphus, Romanis hæcenus incognito. Erat autem plestrum acuminati bacilli forma.

(38) *Beatus*. Sarcasmus est satis amarus.

(39) *Chimæra*. Symbolum impudici amoris chimæram faciebant veteres. Vid. Fulgent. Mythol. 3, 1. G.

(40) *Fugit*. Credebant veteres, ægrotantes mori non posse priusquam Proserpina cinem de vertice secuisset. B.

(41) *Culullis*. Proprie cululli calices dicuntur fœiles, quibus Pontifices & Virgines Vestales in sacris utuntur: hæc autem pro urceolis & conchis posuit. Vet. Schol.

(42) *Poscimus*. Vet. Schol. Cruq. cum omnibus Lambini Codd. habet *Poscimus*, non *Poscimus*. Poscebatur enim dicta sua edere. Vet. Schol. Alter. Forsan a Mæcenate. *Poscimus*, jubemur scribere. Si quod ergo unquam carmen vidurum cecinimus, nunc optamus tale nobis contingere. Votum hoc exprimitur allocutione ad Barbitum Alcæi, cujus laude Oden absolvit. G.

(43) *Latinum*. Potest respectum habere ad ferias latinas, quas eo tempore studiose celebrari solitas constat. G.

(44) *Sub jugum*. Sub jugum mittit qui domat cum turpitudine. Vet. Schol. Milites qui sub jugum mittebantur, exinde pro mancipiis habebantur.

(45) *Volucrumque currum*. Ex vulgi opinione tonitrua dicuntur strepitus esse currus & quadrigarum Jovis. Vet. Schol.

(46) *Apicem . . . sustulit; hæc postuisse gaudet*. Phrahati Parthorum Regi tiaram (multis apicibus circumseptam) ablatam significat, & Tiridatis capiti impositam.

(47) *Stantem columnam*. Innuit emphatice Augustum esse unicam Reipublicæ columnam, subtractis jam aliis, præsertim Quintilio Varo. B.

(48) *Cressa . . . nota*. Cretensibus moris erat dies lætos albis calculis, nigris contrarios numerare, ut ex lætorum dierum numero una & tempus metiri. Malos enim in annorum numerum non ducebant. Vet. Schol. Verum mos iste fuit Cretensibus commune cum aliis gentibus: quare censeo, *cressam notam* esse albam notam, creta dustam. Romani enim creta & carbone albos & nigros dies notabant. Creta ista erat factitia, sicuti & alias carbo factitius; quibus notabant felices dies atque infelices. B.

(49) *Morem in Salium*. Salii Sacerdotes Martis & Herculis

- dicebantur. Vet. Schol. Juxta Dionysium Halicarnasense non alii erant quam Græcorum Curetes, seu Corybantes.
- (50) *Basrum*. Immanis cujusdam potatoris nomen.
- (51) *Ornare pulvinar Deorum*. Ornare pulvinar, id est mensas vel templa, quæ pulvinaria dicuntur propter Lectisternia quæ ibi fiebant, præterquam in templo Herculis, qui nunquam quieti assuetus erat. Vet. Schol. B. Nempe aræ Deorum sunt mensæ, ad quas invitantur, quin disponuntur eorum statuæ accumbentium modo in lectis & pulvinaribus. G.
- (52) *Fatale monstrum*. *Monstrum* jam pro prodigium ob insolitos animos; quod & fœmina & peregrina Imperio Romano inhiaret. *Fatale* referri videtur ad aliquod vaticinium in Sybillinis carminibus de ea acceptum.
- (53) *Nec muliebriter expavit ense*. Conspecto Proculeio, qui ab Augusto missus fuerat ad eam vivam ad se deducendam; gladio, quo erat accincta, se trucidare voluit. Hoc adnotavit Mancinellus ex Plutarcho.
- (54) *Liburnis*. Liburnis posuit pro Liburnis nautis, quorum opera potissimum Augustus victoriam adeptus est.
- (55) *Perricos . . . adparatus*. Persarum gentis unguenta erant. Plinius.
- (56) *Philyra*. Ex tenuissimo tilia arboris libro, quem veteres *Philyram* vocabant, delicatis coronarum lemnisci conficiuntur; ut erudite ostendit Angelus Politianus. *Philyra cortex tilia arboris*. Vet. Schol.

IN LIBRUM SECUNDUM

CARMINUM NOTÆ.

- (1) *Metello consule*. Q. Cæcilio Metello, & L. Afranio Coss. A. U. C. 694 Pompejus, Crassus, Cæsar societatem iniere, quam recentiores quidam Triumviratum appellant (ipsi nusquam eo nomine utuntur) reipublicæ exitiabilem: unde initium historiæ suæ bellorum civilium cœpisse Pollionem probabile est. Quod dicit *ex Metello*, hoc ipsum indicat, non tum cœpisse bellum; sed inde accessendam ejus originem. G.

- (2) *Cea . . . naniæ*. Simonides, Cea insula oriundus, threnos, seu naniæ composuit.
- (3) *Lamne*. Lamnani per contemptum dici bene monuit Cruquius. *Lamnæ* sunt quibus veteres patellæ atque sartagine ab ærariis circumforaneis sarciri solent. B.
- (4) *Proculius*. Proculium Equitem Romanum, qui pius sic erga fratres suos Scipionem & Murenam fuit, ut cum spoliatis bello civili patrimonium suum ex integro divideret, quod cum eis jam ante diviserat. Vet. Schol. B.
- (5) *Uterque Pænus*. Garthago & in Hispania est, quam *Spartariam* vocant. Vet. Schol. B. *Uterque Pænus* accuratius forte a Porphyrio declaratur, tum qui Carthaginem & Uticam habet in Africa, tum qui Gades condidit: ita erit epe-gegesis jucunda & erudita. Colonie Carthaginensium aliæ in Hispania non excluduntur. G.
- (6) *Virtus*. Sapientia, seu philosophia Stoica. Stoicis nemo rex est præter unum sapientem, ut quibus nihil bonum quod extra ipsum animum est, quodve auferri possit.
- (7) *Virgine raptâ*. Cassandra; etsi cognosset, eam ab Ajace Oilei raptam atque vitiatam.
- (8) *Scelesta*. Servilli. Vet. Schol. Cruq. Certe *mancipium* & *scelus* usitatæ erant servorum. compellationes.
- (9) *Malobathro*. Malobathrum posuit figurate pro unguento foliato, ex malobathro scilicet, sive indico folio, confecto, quod Indorum *Bathrum*, sive *Berre* esse & Cruquius, & alii docti viri docuere.
- (10) *Juvenis*. Juveni non tantum boves dicuntur, sed homines: quamvis in usu sit, ut non nisi per diminutionem *juvenculos* dicamus. Vet. Schol.
- (11) *Ter æto*. Nonaginta annis: unam enim ætatem triginta annos ponebant. Vet. Schol.
- (12) *Bene præparatum pestus*, studiis philosophiæ, atque historiarum, usu vitæ, cogitationibus ipsis illis, quas hic ponit Poeta. G.
- (13) *Nec trepidus in usum poscentis ævi pauca*. Puto construendum græco more, *Nec trepidus ævi*, vel vitæ hujus causa, quæ *pauca poscit in usum*, i. e. ad sumptus necessarios, modo possis avidum cupidinem domare. G.
- (14) *Rosa*. Oleo rosaceo. Vet. Schol. Cruq. Succus rosæ longe antequam unguenta repertus est. Plin. citante Landino.
- (15) *Nefasto*. Non fasto & abominando. Vet. Schol. Notum est antiquis Romanis postriduanos, h. e. dies postridie Kalendarum, Nonas atque Idus fuisse *nefastos*, neque licuisse

- Prætori sine piaculo jus dicere. Ut a jus justus, ita a fas fastus.
- (16) *Triste*. Infelix. Infelices erant arbores in Deorum Mænium tutela; quales agrifolium, ruscus, rubus, sentis &c. Hoc dudum adnotavit Landinus. B.
- (17) *Catenas Paribus & Italum robur*. *Catenas & robur* forte jungere oportet, ut sit paraphrasis triumphî, in quo catenati primum ducuntur, mox necantur in carcere, qui *roboris* appellatione significatur. G.
- (18) *Puellis de popularibus*. Arthide, Telesippa, Megara &c. quas misere deperibat. Mancinellus.
- (19) *Aureo, Alceæ, plestro*. Alceus aureo plestro merito donatur in ea parte operis, qua tyrannos insectatus est. Quintil. citante Mancinello. Dedit olim pœnas tyrannis Byzantinis & insulsis parasitis, flammis absumptus, quod sane dolendum.
- (20) *Centiceps*. Cerberum designat propter multitudinem anguium, qui in capite ejus eminebant. Vet. Schol.
- (21) *Nec curat Orion leones*. Orion, dum vivus, insignis erat venator; sic & apud Manes, ex vulgari opinione.
- (22) *Cupressos*. Mos fuit ut ante domum defuncti ramus e cupresso poneretur, indicium Pontifici, quod si domum funestatam ingressus esset, pollueretur. Christoph. Landinus.
- (23) *Platanusque cælebs*. Cœlibem platanum ait eleganter, quoniam e contrario maritali arbores dicuntur, quibus vites junguntur. Vet. Schol.
- (24) *Intonsi*. Non nisi post 454 urbis annos Romæ tonsores fuerant, ut notavit Landinus ex Plinio. Unde *intonsus* & *barbatus* pro vetusto, ut idem docte monuit.
- (25) *Porticus . . . Arcton*. Cœnatio ad ventum Boream. Erant & centenariæ, & millenariæ pro passuum numero, adnotante Cruquio.
- (26) *Fortuitum*. Notandum hoc loco *fortuitum* esse penultima longa; contra apud Juvenalem penultima brevi.
- (27) *Cespitem*. Cum scribat Festus, *cespitem terram esse in modum lateris casam*, illud intelligendum est de Romano latere, qui tegulis nostris latior erat atque crassior. Vult autem, veteres Romanos privatas domos vel ex cespitibus, vel ex rudibus saxis fecisse; publica autem ædificia ex lapidibus quadratis.
- (28) *Novo . . . saxo*. Ideo *saxum novum* dixit, quia veteribus Romanis lapides quadrati penitus erant incogniti; & primum solis oppidorum muris, & Deorum templis condendis

- adhibebantur. B. *Novo saxo* licet forte simplicius interpretari renovato, novam figuram a quadratarum manu adepto. G.
- (29) *Laqueata testæ*. Lacunaria. Laquearia dicuntur opera camerae in lacus collectæ. Vet. Schol. Arcuatæ veterum camerae auratis lacunis, fortasse rotundis & quadratis, pingi solebant, e quibus pendebant lucernæ.
- (30) *Salinum*. Est patella, in qua Diis primitiæ cum sale offerebantur. Notum est, pauperiores pro pane & butyro, pane & sale vesci solitos.
- (31) *Clarum*. Respicit ad fatum Achillis, cui optio proposita erat, velletne producto inglorius ævo vivere, an cita morte æternam redimere gloriam. G.
- (32) *Hora*. Figurata *Hora* pro *Genio*. Erat enim unicuique Horæ suum numen.
- (33) *Parca*. Septimo post natum infantem die Parcæ credebantur pueri fata describere; immo ad hanc rem advocabantur, ut ex Turnebo adnotavit Torrentius.
- (34) *Nymphasque discentes*. Nymphæ & Satyri erant in Bacchi clientela: atque hi erant Dii Manes qui a vulgo creduntur etiam hodie in silvis saltitare. Bacchus & Ægyptius Osiris, uti & reliqua sidera, ad Manes pertinebant. Astra autem Deorum quadrigæ habebantur, equibus Dii nocturno tempore descendere credebantur.
- (35) *Capripedum*. Satyri ideo *capripedes*, quod primis temporibus silvestres homines caprinis pellibus amiciebantur. Etiam hodie priorum sæculorum habitu, albis scilicet & cæruleis vestimentis, saltare feruntur.
- (36) *Metu*. Metus hic est horror sacer & religiosus, cujus excessus est pavor fanaticus, furor temporarius bacchanitium. G.
- (37) *Vinique fontem*. Thyades, sive Bacchæ, præstigiatura sua, terra scilicet vel rupe aliqua ferulis suis percussa, fontes vini, & lactis, itidemque rivos mellis ex arborum truncis elicuisse ferebantur. Significare voluerunt, præcipua Solis munera ex generatione nobis provenire.
- (38) *Mare barbarum*. Indicum, sive Rubrum, vel Æthiopicum: significat Indicam Bacchi expeditionem.
- (39) *Bistonidum . . . crines*. Thraces mulieres, quæ cum in Sacris Liberi patris crinibus solutis versantur, angues & in capite & in manibus gestant. Vet. Schol.
- (40) *Retoristi leonis unguibus*. In Gigantomachia Bacchus se mutavit in leonem, qua forma gigantes profligavit.

- (41) *Superne*. Superne, ultima brevi, ut in talibus Lucretius. B.
 (42) *Marsa*. Figurata pro *Italia*. Marsi & Appuli bello feroces.

IN LIBRUM TERTIUM

CARMINUM NOTÆ.

- (1) *Non prius audita . . . virginibus puerisque canto*. Hoc est, *non prius audita virginibus puerisque*, non autem *canto virginibus puerisque*, ut hæcenus Interpretes. Significat enim, juventutem levibus & lascivis næniis corrumpi solere: magnifice autem de suis carminibus sentit, tanquam utilibus & proficuis. B.
 (2) *Urna*. Hæc secundum vulgarem illam opinionem, qua affirmabant sorte singulos ad mortem ab Orco trahi. Vet. Schol. B. Hæc est illa sortitio animorum, de qua nota Platonis fabula, & multa Philosophi ab Heraclito. G.
 (3) *Costum*. Unguentum Costinum, quod & Nardinum.
 (4) *Incesto*. Incestus est qui sacra polluit, vel non caste adit: adeoque impurus atque impius.
 (5) *Martis equis*. Hoc est, quadrigis Martis cælum conscendit. Quirinum in honorem Augusti laudat. Vet. Schol.
 (6) *Destituit Deos*. Laomedon pro murorum Trojæ perfectione non solverat votum numinibus promissum. Vet. Schol. Tangit infidam Antonii Triumviri amicitiam, quam Suetonius dicit, *semper fuisse dubiam, & reconciliationibus variis male focillatam*.
 (7) *Invisum nepotem*. Nepotem vocat Romulum, quatenus Mars est ipsius Junonis filius: *invisum* vero, quatenus est e stirpe Veneris per Æneam. G.
 (8) *Dum*. Conditionem ponit, sub qua pati velit Trojanos exules rerum dominos esse: modo ne Ilion faciant denuo caput rerum, ne Romani transferant in Asiam. G.
 (9) *Nimium pii*. Fuere sane Romani in Illienses semper pii, eorumque urbem a C. Finibria in bello Mithridatico deletam recondidere. *Fabulam de transferendo* ab Augusto *Ilum imperio* (uti eruditi viri Petri Rodellii verbis utar) e cerebello suo commentus est Tanaquillus Faber, quod legerit apud

Suetonium in divi Julii vita, *famam percrebuisse, eum vel Alexandriam, vel Ilium migraturum*. Quid hoc ad Augustum? Antonius erat qui accepta in matrimonium Cleopatra orientis ambiebat imperium. Bene sane & convenienter Horatius, quo efficacius probet *eternum* Junonis *vulnus* jam sanatum, & firmam cum Romanis pacem conciliatam, fingit iracundam & suspicacem Deam cum illis pepigisse de non condendo Ilio. B.

- (10) *Regina*. Reginas & reges dicunt Romani non modo qui rerum potiuntur, sed qui regio sunt genere. Tanto magis Musæ Jovis filiæ hoc nomen convenit. Calliopæ principatum Musarum assignat Hesiodus Theog. 79, & regibus dat comitem. G.
- (11) *Pior . . . lucos*. *Pior* modo pro *sanctior* & *castor*. Notum est, lucos fuisse terrestrium Deorum templa, præsertim primis temporibus.
- (12) *Præneste . . . Tibur . . . Baja*. Ostendit, se secessus illos frigidis æstare, hieme tepidos, querere non voluptatis & ignobilis otii causa, sed ut cum Musis, & in literis versari sine interpellatione possit. Forte causam dicit, cur non velit assiduus esse in domo vel Augusti, vel Mæcenatis. Vid. Vita Suetonio tribui solita. Itaque vafre subjicit, quantum debeat Cæsari, quantum illi optet. G.
- (13) *Hospitibus feror*. Britanni immolare hospites ferebantur. Vet. Schol. Hoc de Hibernis magis intelligendum.
- (14) *Concanum*. Concani Scythica gens. Torrent. Erant & Cantabri horum, ut fertur, coloni. B.
- (15) *Gelonos*. Alanos dicit, ut ego sentio.
- (16) *Scythicum . . . amnem*. Tanaim dicit. Vet. Schol.
- (17) *Mare . . . ventosum, & urbes*. Urbes hîc cum mari ventoso videtur eodem epitheto conjunxisse Poeta, ut indicaret non majores esse maris tempestates, quam fluctus civiles: utrisque moderatorem intercedere Jovem. G.
- (18) *Anciliorum*. Ancile posuit pro oraculo, quod cum ancile datum est, ibi fore imperium ubi fuisset ancile. Landinus. Ancilia (teste Varrone) eadem forma erant, qua & Thracum peltæ, h. e. utrinque ancisa, ut *Crota* nostra, vel etiam character quo vulgo octonariorum numerum signamus. B.
- (19) *Extricata*. Expedita. Erant enim *Trica* tendiculæ ex pilis factæ, quibus aucupes illaqueandis avibus urebantur.
- (20) *Capitis minor*. Minuitur capite qui amissa libertate desinit esse in numero civium. Capitibus enim veteres nume-

- rabant. Civium Romanorum capita Censorum libris describebantur.
- (21) *Immeritus*. Supple *quamvis*. Hoc ex tradita persuasione sumtum est, quia ajunt pœnas in posteros insontes sæpe differti, quas majores effugerint. Vet. Schol. Cruq.
- (22) *Minorem*. Veteres *maiores & minores* dicebant quos hodie *superiores & inferiores* dicimus. Sic amicos in *maiores*, h. e. *patronos*, & *minores*, h. e. *clientes* dividebant.
- (23) *Jans bis*. Et ante Crassum, & post Didium Saxam Antonii legatum cum exercitibus suis occiderunt. Vet. Schol. Cruq.
- (24) *Moneses & Pacori*. Monases & Pacorus Reges Persarum fuerant, Orodii Parthorum Regis filii. Torrent. B.
- (25) *Dacus*. Daci ab Augusto spretri ad Antonium inclinaverant, ut adnotavit Cruquius ex Dione.
- (26) *Raptim*. Est aliquando plus quam *furtim*: addit celeritatis notionem. Pulchra etiam emphasis in *improvisa*, (quæ vox loco *impermessa* in aliquibus legitur) si forte sit a Flacco. G.
- (27) *Dirus*. Dirus est cujus vel ipsum nomen malo omni est, & ob diritatem abominatur. Vid. Od. 16 Epodorum.
- (28) *Thyna*. Bithyni juncti sunt Thynis; utraque autem gens Ponto confinis est. Vet. Schol.
- (29) *Gygen*. Fictum pulchri adolescentuli nomen.
- (30) *Oricum*. Oppidum Epiri juxta Acrocerania positum. Mancinellus.
- (31) *Mulier perfida*. Notissima est Sthenobœa, sive Antææ & Bellerophontis historia. B. Ex Iliad. 7, 155. Breviter: quem perducere ad amorem & stuprum mulier non poterat, stupri sibi intentati accusat. Præter Jobati socero ultionem commendat literis Bellerophonteis: hic Chimæram & alia pericula objicit &c. G.
- (32) *Pelea*. Peleus eadem ab Hippolyta Acasti uxore passus est, quæ Bellerophon a Sthenobœa. G.
- (33) *Martius*. . . *Kalendis*. Omnes Kalendæ in tutela Junonis erant, maxime Martiæ, quo die ædes Junonis Lucinæ condebatur.
- (34) *Fumum bibere*. In usum convivii vinum fumo invecrabatur. Vet. Schol. In fumario domus suæ collocabant. Alter Schol.
- (35) *Consule Tullo*. L. Volcatius Tullus Consul proximo ante Horatium natum anno. Cruq. In fundo nomen Consulis scribebant. Vet. Schol. Vinum hoc 47 annos habebat. Cruq.

- (16) *Sanietque*. *Sanies* quasi *sanguis*: est enim mortui sanguinis corruptela, ut tabum vivi; ut bene Servius. *Sanien* cadaverum dixit quibus vescitur Cerberus. Vet. Schol.
- (17) *Qualum*. Calathum, metonymice pro lanificio. Vet. Schol. Cruq. Lanarii Calathi a mulieribus *Quasilli* dicti, auctore Festo & Vet. Schol.
- (18) *O fons Bandusiae*. Omnes Cruquii MSS. (etiam Gott. & coll. Sax.) cum vet. etiam Schol. *Bandusia* habent pro *Blandusia*. Quin & alteri Schol. in Epist. 16 hoc versu *Fons etiam rivo dare nomen idoneus*; dicitur fons *Bandinus*, & vet. Schol. Cruq. *Bandusius*. Bandusia Sabinensis agri regio est, in quo Horatii ager fuit. Vet. Schol. Hoc erat nomen pagi, ubi Horatius degebat; neque longe aberat *Mandela*, *rugosus frigore pagus*, de quo Epist. 18. Verisimile mihi videtur *Digentiam* rivum ab hoc ipso fonte fluxisse, atque ipsi fonti fuisse nomen *Digentia*.
- (19) *O plebs*. Conjicere licet eo tempore perccebuisset famam, eum (uti olim Hercules) ab inimicis in belli pericula foras missum; forsitan etiam & veneno sublatum. Certe *modo dictus* habet emphasisim; significat enim, Augustum præter spem omnem reversum. B. Placet hoc eo magis, quod sic ratio potest reddi, cur plebem, rumoribus turbatam scilicet, alloquatur Poeta: & ægrotum fuisse in expeditione Cantabrica refert Dio 53, 25. G.
- (40) *Operata*. Operationes veteres sacrificia dixerunt. Vet. Schol.
- (41) *Supplice vitta*. Non vitta supplice, sed vittis solutis supplicantes. Vet. Schol. Vittæ & sacerdotalis & matronalis sanctitatis insignia, tempore sacrificii humilitatis ergo demittebantur. B.
- (42) *Cadum*. Cadus, lagena, orca. Vet. Schol. Ejusdem enim formæ erant, etsi forsitan diversæ mensuræ. Erant enim dolia testacea ventricosa adducto collo. Metreta item & Kermion, sive testa, cum cado conveniebant, ut bene notavit Lambinus ex Nicandri Scholiaste.
- (43) *Marsi memorem duelli*. Vinum hoc erat 64 annorum teste Cruquio.
- (44) *Consule Planco*. L. Munatius Plancus fuit Consul cum M. Æmilio Lepido anno Urbis 712, quo tempore Horatius 23 annorum erat. Cruquius.
- (45) *Famosisque*. Cum *fama* sit vox mediæ significationis, & tam ad malam quam ad bonam famam spectet; *famosus* tamen plerumque pro *infami* usurpatur.

- (46) *Munera navium*. Ad sua tempora respexit, ut de Mæna Sexti Pompeji liberto. Torrentius. Odit enim Horatius Pompejanarum partium transfugas & proditores.
- (47) *Inter opes inops*. In animo habuit Tantalum, vel Midam; quod etiam sensit Landinus.
- (48) *Mygdoniar*. Mygdones, qui & Macedones & Edonii, antiquis temporibus pertinebant ad Thracas, unde in Phrygiam commigravere. Cruquius ex Solino & Plinio.
- (49) *Genium . . . curabis*. Futurum indicativi pro imperativo. Curant genium, qui genio indulgent, & opipare epulantur. Notum est, veteres in conviviis primitias & vini & dapum in salino, quod & patellam appellabant (hæc parvæ sartaginis forma erat) Geniis, sive Laribus ad focum apposuisse.
- (50) *Cratera*. Crateribus vina consecrabantur coronis, & aquæ miscebantur. Crater erat pelvis imposita tripodi.
- (51) *Vetus ara*. Erat enim ara publica: privatæ e cespitibus fieri consueverant.
- (52) *Murena*. Incertum an hic fuerit Terentiæ Mæcenatis uxoris frater. B. Incertum etiam hoc videtur, utrum voluerit poeta hic simpliciter habere honorem Murenæ novo Auguri: an simul ita signare tempus illud supremum noctis & antelucanum, quo ad auspicia capienda surgunt Augures, quo convivæ de cœna hilariores redeunt. G.
- (53) *Spissa te nitidum coma*. Nam & crinium compositio in juvenibus amatur. Vet. Schol. Notum est, veteres totum capillitium in strias, seu funiculos, interplicuisse, & deinde hos funiculos unguentis delibutos extendisse: bene igitur subjecit *nitidum*.
- (54) *Albanis in herbis*. In Albano antiquitus monte nullos alios licebat quam nivei tauros immolare candoris. Arnobius, citante Ludovico Desprez.
- (55) *Trocho*. Trochus circulus erat æneus, cui crepitacula, vel tintinnabula quædam appensa sunt, & a pueris agebantur.
- (56) *Mannos*. Manni equi dicuntur pusilli, quos vulgo *burdos* vocant. Vet. Schol. Burdus ex equo & asina est, uti mulus ex asino & equa. Burdis & mulis meritorias rhedas trahebant Roma Brundisium.
- (57) *Oscinem*. Oscines dicuntur aves quæ voce augurium faciunt, præpetes quæ volatu. Vet. Schol.
- (58) *Virginum*. Nomine virginum & se intelligit, quæ tauro insidioso fidem habuerit, & suas comites, quæ se non re-

traxerint, eripuerint: & unam mortem nimis levem culpæ pœnam prædicat. G.

(59) *Libitinam*. Libitina, læstulus, in quo mortui efferebantur. Vet. Schol. Est autem Libitina locus in urbe quo constituntur qui efferenda corpora conducunt, & præbent funeribus necessaria. Vet. Schol. Deæ Libitinæ sive Proserpinæ fanum erat.

(60) *Potens*. Potens lyræ, carminis: potens muneribus Musarum, gratia Cæsaris &c. Quæ quidni de se prædicet, qui cætera hujus carminis? G.

IN LIBRUM QUARTUM

C A R M I N U M N O T Æ.

(1) *Dulcium . . . sava*. Pulcherrimis antithetis *sava & dulcium* ostendit quam male sibi secum conveniat; quod etiam significatur supra voce *bella*.

(2) *Purpureis*. Purpureum pro pulchro Poetæ dicere assueverunt. Vet. Schol. Albinovano etiam nix purpurea dicitur. Quidquid late splendebat, & candebat, per catachresin purpureum dicebatur: illud enim in coloribus summum erat.

(3) *Bis . . . die*. Mane scilicet, & vespere, quibus temporibus veteres orientia & cadentia sidera salutabant. B. Observa choros puerorum & puellarum, ut in Sacris aliis. G.

(4) *Pede candido*. Veteres etiam ob candorem pedum laudabantur, quia nudis pedibus incedebant. G.

(5) *Aquar . . . volubiles*. Volubiles dicit aquas Tiberis; nam post campestria exercitia natabant.

(6) *Laurea . . . Apollinari*. Credo eum habuisse in animo certamen gymnicum in honorem Apollinis ab Augusto institutum, quo victores Poetæ lauro coronabantur.

(7) *Apis Matine*. Se api contulit pro parvitate. Vet. Schol. Bene etiam *Matine* posuit, quia & ipse erat Appulus.

(8) *Feroces*. Vocat *feroces*, quia Centuriones Romanos crucibus defixere. Vet. Schol.

(9) *Sicambros*. Hi sunt qui postea, excusso scilicet Romanorum jugo, *Francos* se appellaverunt. B. Motus Sicambrorum a Druso compressos in A. U. 742 confert Dio 54, 32.

In

- In hæc tempora Odas libri quarti incidere, Bentlejo observatum est. G.
- (10) *Solvat*. Obligabant se chirographo suo qui vota suscipiebant.
- (11) *Achaico*. Puto *Achaico* jam dici pro Græco cum Vet. Schol. ad significandum quadrigale certamen Olympiæ habitum.
- (12) *Fidicen*. Honoratius Citharædi nomen: fidicines autem & fidicina fere contemptui fuere.
- (13) *Amazonia securi*. Amazonia segaris duplex erat securis uno manubrio immissa, ut ex vetusto marmore probavit Torrentius, vir usquequaque doctus.
- (14) *Metaurum flumen*. Metaurum flumen posuit, ut alias *Rhenum flumen*. Supra quinque & quadraginta millia in Asdrubalis exercitu cæsa feruntur. Vet. Schol. Alii ferunt quinquaginta sex a Claudio Nerone cæsa. B. Vid. tota historia Liv. 27, 43 sqq. G.
- (15) *Fugatis . . . tenebris*. Tenebras pro Afrorum terrore dixit. Bene igitur pulcher dies dicitur, qui tenebris fugatis ridet.
- (16) *Lucem*. Plus dixit quam *salutem*: siquidem lux pro salute poni consuevit; ut, *o lux Dardania*. Vet. Schol.
- (17) *Maculosum*. *Macula* feæda & infamia vitia dicebantur.
- (18) *Alteris . . . mensis*. Antiquorum consuetudo talis fuit, ut sublata prima mensa poneretur secunda, atque in ea positis pomis infusoque in pateras mero libaretur Diis. Vet. Schol. Cruq.
- (19) *Pateris*. Patera, Græcis scyphus, latior erat calice & ventricosior; utrinque enim manicata, vel aurita.
- (20) *Proles Niobæa*. Homerus pueros puellasque senos fuisse ait; Euripides 24; Sappho 18; Pindrus 20. Landinus.
- (21) *Thetidos marinæ*. Maternam originem a Julia gente ducebat Antonius.
- (22) *Potiore . . . alite*. Felicioribus auspiciis, quam olim Trojana mœnia. G.
- (23) *Virginum prima*. Ter novem pueri prætextati, totidemque virgines, patrimi & matrimi Carmen Sæculare Apollini atque Dianæ dicebant. Torrentius ex Zozimo l. 2. pr.
- (24) *Æra*. Æra dixit ærea vasa antiqui operis & signa.
- (25) *Artium*. Artes dicuntur curiosa opificia & archetypa.
- (26) *Notis . . . publicis*. Publicis notis posuit pro publicis literis, sive titulis: nam *notæ* poetis pro *literis* sunt.
- (27) *Non ante vulgatas*. Ostendit se primum hujus artis apud Romanos conditorem.

Q. Horatii T. I.

P

- (28) *Vindex*. Punitor: vindicare enim apud veteres non tantum defendere, sed etiam punire significabat. Vet. Schol.
- (29) *Sed*. *Sed* acuta voce pronunciandum, significat *immo etiam*.
- (30) *Verbenis*. Verbenæ sunt omnes herbæ frondesque festæ ad aras coronandas. Vet. Schol. Oportuit autem eas a locis sacris decerpî; unde & *sagmina* appellatæ sunt Latinis. G.
- (31) *Aprilem*. Aprilis in tutela Veneris erat, quod flores eo mense se aperiant.
- (32) *Adfluentes*. Ostendit senescere jam Mæcenatam æque ac seipsum: adfluunt enim quæ copia, vel numero abundant.
- (33) *Anima* . . . *Thracia*. Bene *anima* posuit pro *venti*, cum antea per prosopopejam *Veris comites* dixerit: siquidem animantium *anima* est.
- (34) *Onyx*. Metallum est geminæ simile: de hoc ad unguenta odorata parva fiebant vasa. Vet. Schol.
- (35) *Coæ*. In Co insula vestes tenuissimæ ad delicias mulieres & luxum, optimaque purpura tinguntur. Vet. Schol. Cruq. Pamphile Platis filia prima in Co bombycinam texere docuit, ut ostendit Mancinellus ex Plinio.
- (36) *Surpuerat mibi*. Mente alienatum se significat.
- (37) *Cornicis vetula*. Credebatur cornicem vivere mille annos.
- (38) *Fastor*. Fasti sunt Annales, qui ad commemorationem honorum, vel rerum gestarum inventi sunt. Vet. Schol.
- (39) *Devota*. Significare videtur Gallorum Soldurios, qui se devovebant, cum ducibus suis perituri.
- (40) *Tauriformis*. Omnium fluminum famosorum vultus cum cornibus finguntur propter impetus & mugitus aquarum. Vet. Schol.
- (41) *Dominæque*. Dominam dicit Romam ob Senatum, pro cuius Principe se gerebat Augustus.
- (42) *Janum Quirini*. Janus dicitur Quirinus quasi bellipotens, ab hasta, quæ lingua Sabina *Quiris* dicitur. Landinus ex Macrobio *Saturn.* l. 9. Erat Italis Janus idem qui Græcis Apollo Agyieus, qui ante fores sub forma hastæ, vel acuminatæ columnæ coli solebat.
- (43) *Edicta* . . . *Julia*. Maxime laboravit Augustus, ut rata essent quæ Julius instituerat. Suetonius, adnotante Badio Ascensio.
- (44) *Infidive Persæ*. Infidos vocat Persas, quia Crassum simulata pace necaverant. Vet. Schol. Cruq.
- (45) *More patrum*. Cicero lib. I Tuscul. cap. 2 scribit esse in Catonis Originibus, *solitus esse in epulis canere convivæ ad tibicinem de clarorum hominibus virtutibus*. Mancinellus.

- (46) *Lydis... tibiis*. Tibiis Lydis læta cantabantur, Phrygiis tristitia: tres enim modos habebant tibiærum, Ionicum, Lydiæum, & Phrygium, quem & barbarum. Vet. Schol.
 (47) *Progeniem Veneris*. Id est Gentem Juliam. Vet. Schol.

IN LIBRUM

EPODON NOTÆ.

- (1) *Navium... propugnacula*. Ut in muro, ita & in navibus fiunt propugnacula, post quæ dimicantes armati consistunt. Vet. Schol. Turritas Antonii naves significare videtur, a quibus ingens Mæcenati periculum.
 (2) *Imbellis*. Respicit militiam suam sub Bruto, seque ab Antonio fugatum meminit.
 (3) *Adsidens implumibus pullis avis*. Comparatio plane nulla est in pullis, sed in hoc sólo: ut avis etiam adsidet pullis, quos præsentia sua tueri non potest; ita ego te sequar, non quo tueri possim, sed quo minus metuum. G.
 (4) *Queruntur*. Vetæres omnium animalium voces, præterquam hominis, querelam dicebant. Vet. Schol.
 (5) *Amite*. Amites hodieque appellantur fûculæ, quibus retia in venatione, vel in aucupio suspenduntur. Vet. Schol.
 (6) *Sacrum... focum*. Vestæ consecratum: juxta focum Dii Penates positi fuere, Laresque inscripti, idcirco quod ara Deorum Larium focus sit habitus. Vet. Schol. Cruq.
 (7) *Lucrina*. Lucrina ostrea inter præcipua erant, & summi pretii.
 (8) *Scari*. Scarus, piscis ingens græci maris, qui & ruminatur, & voce utitur; de quo vide Athenæum, Eustathium, & Tzetzen in Lycophronem.
 (9) *Afra avis*. Afram avem gallinam Nûmidicam dicit, quæ magna est & pinguis, quam & Garamaniam vocant & Africanam. Vet. Schol.
 (10) *Attagen*. Lagopus est, vel Asiatica perdix, quam Fræncolinum vocant. Cum Attagenas fœminino genere vulgò dicant, attendendum quod masculinò genere hic dixerit. Vet. Schol.
 (11) *Terminalibus*. Ad excludenda jurgia Terminaliorum dies

fuerat constitutus, qui per epularum festivitatem cæsis agnis servari faceret dies constitutos. Vet. Schol.

- (12) *Servilem manum*. Sextus Pompejus sexaginta servorum millia collegit. Mancinel. Immo & Augustus ipse manumisi viginti millia uno tempore: quod monet Torrentius ex Suetonio.
- (13) *Insignibus*. Regionum puerorum insignia prætextæ erant & bullæ. Prætexta toga erat candida purpureo limbo circumsepta; bulla autem aureum fascinum, quod hodie corallo & bullis constat.
- (14) *Caprificos*. Caprificus, quod ex veteribus monumentis plerumque erumperet, arborque esset intrugifera, Deorum Manium fuisse credebatur, adeoque infelix. B.
- (15) *Unctæ*. Sulphure, tædis, & ovis lustrabant se veneficæ; phyltris etiam ea immiscuisse vel ex hoc loco pater.
- (16) *Lunamque celo deripit*. Credebant veteres, veneficas elicere Deos e curtibus suis. *Carminè Dii placentur, carminè Manes*. Putabatur enim venefica Diis superior; hujus enim carminibus vel inviti cedebant, uti & sacerdotum precibus rite peractis.
- (17) *Descenderet*. Erat sacra via declivis a carinis ad forum, & acclivis a foro ad Capitolium. Lambinus. B. Descenderet flexu sinistro de sacra via in carcerem ibi strangulandus; quo factò demum sacrificia in Capitolio incipiunt. Vid. Cicer. Ver. 3, 30. G.
- (18) *Actus . . . freto*. Sextus Pompejus freto Siciliensi victus fugatusque est. Vet. Schol. Vult significare magnam fuisse fugato Pompejo Romæ lætitiā, ob metum scilicet servilis manus.
- (19) *Neptunius Dux*. Eo stultitiæ processit, inflammatus marinarum rerum felicitate, ut Neptuni filium se diceret, & Cyanea veste obduceretur. Vet. Schol. Erat enim trecentarum quinquaginta navium dominus, ut scribit Aurelius Victor. B.
- (20) *Virtus sepulcrum condidit*. Cum victor rediret ab Africa, neque eum Romanus populus recipere vellet ob invdiam; ille est reversus in privatū agrum Linterni, ubi tamquam a Romanis in exilio positus vixit: quare jussit in tumulo suo scribi quod patria careret sepultura. Vet. Schol. Cruq.
- (21) *Mutavit sagum*. Deposuit coccineam clamydem Antonius, & accepit nigram; utrum ob luctum victarum partium hoc fecit, an aut fuga lateret? Vet. Schol.

- (22) *Non suis.* Non aptatis, non prosperis. Vet. Schol. B. Totus hic locus ostendit, scriptam esse hanc Oden ad primos nuntios prælii, cum nondum constaret quid factum esset classi fugienti, & speciatim Cleopatæ atque Antonio. G.
- (23) *Conviviorum.* Convivia nocturnas dicit compotationes, quæ produnt animi consilia.
- (24) *Ad umbilicum adducere.* Pro finire & consummare, quia in fine libri umbilici ex ligno aut osse solent poni. Vet. Schol. Veterum volumina circumvolvebantur bacillis, in quorum summitate umbilici isti fuerant.
- (25) *Marsi.* Hi duce Popedio universam Italiam in urbem Romanam concitavere; quod bellum & Sociale, & Italicum appellatum est.
- (26) *Æmula.* Æmulam eam vocat, quia imperium ereptum iri Romanis speravit. Vet. Schol. Promittebat enim Annibal, eam deleta Roma fore Italiæ caput.
- (27) *Infidelis Allobrox.* Allobroges Galli rufi, & Sequanici dicti, incolentes illum tractum Alpium, qui est a Visontio in Germaniam, Lentulo & Catilinæ in principio consensere, sed postea illos Senatui prodidere, timore magis quam amore affecti. Vet. Schol. Cruq. Nam C. Pomptinius represserat eorum motum, ut ostendit Torrentius ex Cicerone. Veteribus Celtis alienigenæ & hostes *Galli, Alli, & Gualli* dicebantur.
- (28) *Devoti.* Veteribus legibus devoveri consuevere majores nocentes & piaculares; quæ quidem devotio Jurisconsultis Romanis capitis diminutio major appellabatur.
- (29) *Eques.* Omnes antiqui scriptores ut hominem equo insidentem, ita & equum cum portaret hominem, *equitem* vocarunt. Mancinellus ex Macrobio Sat. 6, 9. B.
- (30) *Ossa Quirini.* Varro pro rostris (alter Schol. post rostra) sepulcrum Romuli dixit, ubi etiam in hujus rei memoriam duos leones fuisse erectos constat; unde factum est ut pro rostris mortui laudarentur. Vet. Schol. Cruq.
- (31) *Cornua.* Capita velorum cornua dicuntur: cornua velatarum obvertimus antennarum. Vet. Schol.
- (32) *Nulla nocent.* Hi duo versus, qui nunc sunt 61 & 62, collocandi videntur post versum 52. Rationem dixit vir doctus *Miscell. Observat.* a Burmanno editis vol. 2, pag. 381. Ne quidem opus videtur alia ratione, quam ut attente quis legat primo vulgato ordine, tum ita uti diximus. Librarius antiquissimus, quos versiculos incuria omiserat, eos paullo

post posuit, & minutis notis ad ordinem suum revocavit. Illæ notæ perierunt &c. G.

- (33) *Sabella ... carmina*. Posuit Sabella carmina pro Marsis. Vet. Schol. Nam Samnites Peligni & Marsi erant Sabini generis.
- (34) *Infamis Helenæ*. Stesichorus poeta græcus scripsit Helenæ vituperationem: quare irati Castor & Pollux illi lumina ademerunt: sed postea monitus Stesichorus illius laudes decantavit; quare oculos iterum illi reddiderunt. Vet. Schol. Cruq. B.
- (35) *Sordibus*. *Sordes* humilium natales dicebantur, ob immunditiam scilicet victus atque cultus.
- (36) *In sepulcris pauperum*. Nam divitum sepulcra suis custodibus erant curæ. Vet. Schol. Cruq. Humilium maxime umbræ a magicis suscitari solent. Id. Schol.
- (37) *Novendiales . . . pulveres*. Cineres reliquiarum vult intelligi: nam novendiale dicitur sacrificium, quod mortuo fit nona die, qua sepultus est. Vet. Schol. Apud majores ubicunque aliquis extinctus fuisset, ad domum suam referebatur, ibique septem erat diebus; oclava die incendebatur; nona sepeliebatur. Servius, quod adnotavit Lambinus.
- (38) *Esquilini*. Extra portam Esquilinam, hoc est in aggeribus, religiones & sepulcra erant. Vet. Schol.
- (39) *Pelignas*. Indicat Canidia, se pretio didicisse magicas artes a Pelignis mulieribus, quæ tota Sabinorum, Marsorumque vicinia eo nomine male audiebat, ut in Græcia Thesalæ. Primum ergo indignatur tarditatem successus: deinde solatur impatientiam suam. Non statim petunt te veneficia meæ, sed manent te fata votis tuis tardiora. Miserri- mum est querere mortem & non invenire. G.
- (40) *Movere cereas imagines*. *Movere*, hoc est, animare. Credebant enim veneficæ, se defigendorum animas corporibus suis evocatas carminibus, ceteris imaginibus infigere potuisse.
- (41) *Castos*. Castos dicit patrimonios & inatrimonios, parentum scilicet funere non funestatos. Veteres enim mortem Apollinis atque Dianæ iratis sagittis tribuebant.
- (42) *Genitalis*. Genitalem vocavit Dianam, quam & Lunam intelligi voluit, quia ut calore Solis animantur semina; ita Lunæ humore nutriuntur; penes ipsam enim & corporum omnium ratio esse dicitur, & potestas. Vet. Schol.
- (43) *Super jugandis*. Legem Juliam dicit de maritandis ordinibus. Cum enim bello civili prope octoginta armatorum

millia interiissent, ne' deficeret populus Augustus Legem Julianam augendæ proli instituit.

- (44) *Marita*. Pro *maritali*. Vox antiqua & Plautina, ut annotavit Vet. Schol. B. *Lex marita* per notam metonymiam, quæ maritos facit; nec enim placet, *marita* esse imperativum. G.
- (45) *Undenos decies*. Sæcularis Carminis duplex devotio esse consueverat: aut enim pro sedanda aut vitanda pestilentia; aut pro certo & constituto numero annorum: centesimo enim decimo anno in Capitolio a pueris & puellis impuberibus cantabatur. Vet. Schol.
- (46) *Condito mitis . . . telo*. Hic sensus secundum eorum opinionem conceptus est, qui Apollinem pestilentem Deum putant esse. Vet. Schol. Eadem enim interitus causa quæ & ortus. Huc spectat & vetus dictum, *Omnes animæ ab Apolline, & ad Apollinem*.
- (47) *Vestrum . . . opus*. Hoc est, ædificium. In animo erant Trojani muri ab Apolline conditi: hoc autem loco Lycias & Delias sortes significat, quarum monitu Æneas Italiam petiit, ut vel sequentia demonstrant.
- (48) *Medus, Albanasque*. Medus pro *Partibus*, Albanas pro *Romanas*: nam vetusta nomina in carmine magis splendent.

Pag. 27 lin. 5 direptum lege dereptum.

NOI RIFORMATORI

Dello Studio di Padova.

AVendo veduto per la Fede di Revisione, ed Approvazione del P. F. *Gio: Tommaso Mascheroni* Inquisitor Generale del Santo Offizio di *Venezia* nel Libro intitolato *Collectio Auctorum Classicorum &c. stampato*, non vi esser cosa alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni Costumi, concediamo Licenza a *Nicolò Bettinelli* Stampator di *Venezia*, che possa essere stampato, osservando gli ordini in materia di Stampe, e presentando le solite Copie alle Pubbliche Librerie di Venezia, e di Padova.

Data li 5. Settembre 1781.

(ANDREA QUERINI Rif.

(ALVISE VALLARESSO Rif.

(GIROLAMO ASCANIO GIUSTINIAN Kr. Rif.


Registrato in Libro a Carte 19. al Num. 186.

Davidde Marchesini Seg.

Addi 24. Settembre 1782.

Registrato in Libro de' Privilegj dell' Università de' Librari e Stampatori.

*Marc' Antonio Manfrè.*JA 1
155161757
51
15



110
111
112

